



PROGRAMA DI GOBERNACION 2021-2025

CU BO
ARUBA
TA AVANSA





CU BO

ARUBA TA AVANSA

DANKI N'ABO!

Conciudadanonan

Sea orguyoso di boso mes y boso pais. Como hende y como pueblo. Locual cu Aruba a bin ta superando desde maart 2020, ta un peso di magnitud sin precedente cu hamas por a keda supera si no ta pa ABO. ABO cu ta carga Aruba den bo curason y Aruba su bienestar na pecho. P'esey na prome luga permiti mi den number di Movimiento Electoral di Pueblo (MEP), gradici boso pa e confiansa duna na MEP na 2017 y asina permiti nos forma gobierno y traha na bo bienestar den Gobernacion 2017-2021. Na di dos luga nos kier gradici boso pa para firme cu nos den temponan di mas dificil cu Aruba a yega di enfrenta como nacion. Y por ultimo un danki na nos rumannan den Reino, specialmente Hulanda cu a sa di para banda di Aruba y demostra tur disponibilidad pa yuda cu sosten di likides y asina yuda Aruba supera momentonan dificil.

E vision cu MEP a drenta Gobernacion cu ne na 2017, apesar di tur reto a keda demostra den 2018 y 2019. A dedica na sana y pone e fundeshinan necesario pa crecemento di nos pais. Cu e pandemia na maart 2020 tur e plannan pa pais Aruba mester a wordo restructura y adapta na un situacion nobo. Pero Aruba un bes mas a demostra su poder di coherencia.

Na momento dificil nos a sa di pone orguyo un banda y acepta di otro pa bienestar di e pueblo Arubano. Aruba ta di nos tur y su bienestar tin cu keda nos meta.

Cu hopi optimismo, determinacion y dedicacion a goberna durante Gobernacion 2017-2021 y a logra puntonan di atencion importante pa Aruba. Cu mesun optimismo, determinacion y dedicacion nos lo goberna pais Aruba den Gobernacion 2021-2025 si ABO duna nos e confiansa un bes mas. Nos a demostra di por goberna den tempo menos bon debi na e crisis financiero y social hereda, pero nos a demostra di goberna den tempo hopi malo tambe debi na e pandemia y e diferente crisisnan cu esaki a trece cu ne.

Awe nos por wak bek riba decisionnan tuma y e resultado positivo di esakinan. Cu satisfaccion nos por wak con Aruba ta saliendo mas fuerte como pais. Nos hendenan den forma modera ta bayendo bek trabao, Aruba su turismo ta regresando, comercio ta habriendo su portanan bek, muchanan y hobennan ta sigui cu nan estudio. Aruba ta garando su forsa bek, y poco poco ta yega bek na e normalidad prome cu pandemia.

Aruba, ta ora di cosecha! Nos ta cla pa goberna nos pais den temponan bon awo! Nos ta invita bo pa forma parti di e historia aki. Uni bo mes cu e vision y e metanan cu nos kier wak realiza pa nos dushi Aruba. Humildemente mi ta acerca BO un bes mas pa bo sosten. Pa hunto CU BO nos sigui traha durante 2021-2025. Awo ta ora pa recuperacion di nos pais y pa nos duna continuacion na e trabaonan importante andando y pa finalmente esakinan keda realiza den Gobernacion 2021-2025. Aruba tin mester di BO! Hunto CU BO Aruba ta AVANSA!

Un saludo cordial

Evelyn Wever-Croes

Evelyn Wever-Croes
Lider di MEP
Mei 2021



DANKI NA ABO! Evelyn Wever-Croes	3
1. NOS BARANCA A MUSTRA SU FORSA	5
2. REPOSICIONANDO E RUMBO DI NOS PAIS	8
3. HACI LO CORECTO, HASTA ORA NINGUN HENDE TA WAK	13
4. MENTE INNOVATIVO	18
5. SIÑA BON AWE PA COSECHA MAÑAN	24
6. BIBA SALUD Y SEA ACTIVO	38
7. E MOTOR MESTER DRAAI PA TIN MOVECION	52
8. DERECHONAN A BASE DI IGUALDAD	71
9. PREVENCION TA E SOLUCION	80
10. INFRASTRUCTURA SOSTENIBEL DESAROYO PA FUTURO	95
11. RUMAN TA KEDA RUMAN	107
12. SI BO NO CUIDE AWE, MAÑAN BO NO TIN PA YUDA BO MES ...	114

CONTENIDO

PROGRAMA DI GOBERNACION **2021-2025**



NOS BARANCA A MUSTRA SU FORSA

1

NOS BARANCA A MUSTRA SU FORSA

Credibilidad financiero, e ser humano central y integridad. Na inicio di gobernacion na 2017 MEP a hay'e confronta cu tres crisis. Un crisis financiero debi na redoblacion di debe door di gobierno anterior, un crisis social debi na falta di inversion den e sector social na Aruba y un crisis di integridad caminda personanan sospechoso den casonan penal a keda den posicion di gobernante y representante di pueblo.

MEP den gobierno a para duro pa maneha tur tres crisis di un forma mas lihe posibel y consistente. A base di un Memorandum Financiero Economico a yega na palabracionnan realistico con por pone Aruba bek riba e ruta corecto pa su finanzas publico. Na segundo luga a base di un Plan di Crisis Social a pone e base pa suavisa e problemanan grandi constata den e sector social. Den e parti di integridad MEP a pone e bandera di integridad como prioridad y a logra establece un Oficina di Integridad cual mester duna guia na e proceso di integridad nacional. MEP tabata cla y a demostra liderazgo y a tuma decision nan rapido pa cu esakinan. Resultado di e decisionnan aki a muestra positivo den un tempo hopi cortico y riba tur tres tereno a constata logronan cu di berdad a muestra un cambio di rumbo pa Pais Aruba.

Despues di a inicia e preparacionnan pa e cambio di rumbo den aña 2018, a conoce un aña 2019 y comienso di aña 2020 positivo. Lamentablemente pais Aruba a conoce e pandemia Covid-19 na maart 2020. 13 di maart 2020 ta e fecha cu e Covid-19 a bati na porta di Aruba. Esaki a pone nos tur para keto y realisa con vulnerabel nos ta como hende, como pais y mundo henter. Aruba a yega di confronta hopi reto den pasado pero esaki ta un reto di magnitud sin precedente.

MEP bou liderazgo di sra. Evelyn Wever-Croes tabata cla y prepara pa enfrente retonan grandi na bienestar di pais Aruba.

Un bes mas MEP a demostra liderazgo den haci e miho escogencianan cu curashi y determinacion den tempo dificil poniendo un bes mas e hende prome.

Niun momento MEP den gobernacion a duda y inmediatamente a adapta e rumbo cu a cuminsa cune na 2017. MEP a haci su mes fuerte pa e hende. E hende ta keda central y na e momento ey un bes mas a muestra esaki cu accionnan.

A cambia e rumbo dirigi pa saca Aruba for di e deterioro financiero y cu e mesun forsa di convivencia a scoge pa salvaguardia bida, entrada y sobrevivencia di e pueblo Arubano.

E lemanan **"NOS PAIS LO NO KIBRA"** y **"ARUBA TA DI NOS"** tabata e principionan riba cual a tuma decisionnan inmediato pa cera nos fronteranan y asina evita cu nos pueblo ser contagia. A yega na acuerdo cu Hulanda pa por garantisa subsidio di salario, mantene e servicio di calidad den salubridad publico riba nivel y garantisa entrada pa un gran parti di nos poblacion cu na e momento ey lo a keda sin trabou y sin salario.

A pidi un contribucion di solidarismo di esnan cu ta traha den gobierno y entidadnan gubernamental p'asina aporta na e fondo di FASE pa tur esnan cu a perde trabou of tabata funciona riba nan propio forsa no keda sin niun entrada.

A yuda comercio pa medio di subsidio di salario pa mantene e gastonan di esnan cu ta traha den comercio, a yuda empresanan mediano y chikito cu un suma pa kwartaal pa yuda den nan gastonan fiho.

Y por ultimo a yuda individualnan y comercio cu ayudonan fiscal I y II pa suavisa e peso fiscal p'asina duna un rosea te ora pais Aruba recupera.

A lidera un programa nacional di vacunacion Ban Vacuna cu e meta pa garantiza salud di nos hendenan, menos presion riba nos hospitalnan, mantene fayecimento di nos hendenan mas abou posibel y crea asina espacio pa nos economia bin bek riba pia.

E programa aki a resulta den un exito caminda Aruba a comprende e importancia y acudi pa nan vacuna. HUNTO cu BO Aruba lo recupera di e situacion aki.

MEP den gobernacion y durante e Covid-19 no a para keto. Durante e periodo di crisis a inicia cu preparacion pa recuperacion di nos pais asina e pandemia aki pasa, pasobra esaki tambe lo pasa.

Un total di 17 taskforce consistiendo di un grupo grandi di mas cu 125 persona for di tur sector na Aruba a bin hunto durante varios luna pa prepara un Masterplan "Reposicionando e Rumbo di Nos Pais" den cual a diseña un strategia pa por tuma decisionnan y implementacion di reformanan cu lo hiba Aruba den e fase di recuperacion despues di e pandemia.

E areglo firma cu Hulanda conoci como "Landspakket" ta encera procesonan cu ta acopla na e Masterplan diseña pa nos propio hendenan. E Masterplan aki, hunto cu e acuerdo firma cu Hulanda y Nos Plan Nos Futuro lo guia e caminda pa Aruba cana e añanan nos dilanti pa logra un Aruba fuerte y resiliente.

Pa MEP reforma no ta un simpel palabra sino accionnan concreto cu mester tuma luga den e periodo nos dilanti pa por haci Aruba mas fuerte pa enfrenta futuro.

A inicia cu un maneho nobo pa diversifica e economia mediante 6 sector prometedor.

Esaki cu e pensamiento cu Aruba mester depende di mas sector economico y no solamente di turismo. Un maneho a wordo stipula pa 2019-2022 caminda a identifica e siguiente 6 sectornan prometedor: turismo, economia di conocimiento, logistica, sector primario, economia circular, e industria creativo y cultural manera arte y musica, diseño grafico.

E formulacion di e sectornan aki tambe a ser conclui a base di combersacionnan hunto cu stakeholdernan di diferente sector na Aruba bou guia di conseheronan internacional. Tanto e Masterplan como e Sectornan Prometedor ta plannan cu a ser desaroya a base di contribucion y pensamiento dentro di e diferente sectornan na Aruba hunto cu Gobierno di Aruba y cualnan lo hunga un rol importante den e siguiente periodo di gobernacion.

Awe nos ta wak cu e resultado di e decisionnan tuma ta dunando su frutanan. Nos economia a cuminsa bin bek ariba pia. Turismo ta yegando, turismo crucero a anuncia su regreso, rapportnan di instancianan internacional manera IMF, Standard and Poor's y FITCH ratings a mostra riba e desaroyo positivo debi na e tumbamento di decision durante e crisis.

Nos hendenan a cuminsa bay bek na trabou y poco poco nos ta regresando na e normalidad cu nos a conoce prome cu Covid-19.

Nos no a yega ainda caminda nos kier ta pero e horizonte ta muestra positivo.

Nos infraestructura turistico ta cla pa ricibi e demanda grandi cu tin pa Aruba.

Cu bo nos lo avansa pa surpasa e momentonan cu nos a pasa hunto den esaki.

Cu bo nos lo avansa pa surpasa nos retonan hunto.

REPOSICIONANDO E RUMBO DI NOS PAIS

2



REPOSICIONANDO E RUMBO DI NOS PAIS

Lider di MEP den su calidad como Ministro Presidente di pais Aruba, a inicia un proceso di planificacion pa sali mas fuerte di e pandemia cu mundo y Aruba a haya su mes aden. E Master Plan “Reposicionando e Rumbo di Nos Pais” ta diseña pa ta un documento dinamico cu ta provee un strategia pa por tuma decisionnan y implementacion.

E plan tin un planificacion di 3 aña y e obhetivo ta pa construi un Aruba mas fuerte, permitiendone desaroyo economico cu ta inteligente, inclusivo y resiliente. Accionnan di prioridad ta identifica cu enfasis riba establece e condicionnan fundamental pa e economia di Aruba aspira den un termino largo, mientras ta logra beneficiar inmediatamente y a corto plaso. MEP ta adopta e plan aki cu mester conduci na un Aruba fuerte y resiliente den futuro cercano.

E acuerdo firma cu Hulanda (Landspakket) tambe mester ser mira como parti di e reformanan cu MEP ta premira pa e añanan nos dilanti. Mayoría di e temanan den e acuerdo firma ta consistente na e temanan den e Masterplan. Esaki ta haci cu e caminda pa encamina ta cuadra cu e pensamiento local pa reforma y restructura Aruba pa un Aruba resiliente y fuerte den e periodo nos dilanti.

E desafio cu Aruba su economia ta enfrenta ta evidente basa ariba numeroso estudionan haci durante e ultimo dos decadanan pa tanto sector publico y stakeholdernan di sector priva. Tambe a base di estudionan y evaluacion conduci pa organisacionnan internacional manera rating agencies internacional, incluyendo International Monetary Fund (IMF) y World Bank.

Como parti di e proceso di desaroyo y pa evita 're-inventing the wheel', un total di 17 Task Force, den cual mas cu 125 persona, a haci uzo di rapportnan y estudionan existente y unda tabata necesario a revalida posicionnan clave y problemanan esencial a traves di serie di consulta cu stakeholdernan.

Resultadonan y recomendacionnan a ser elabora a base di temanan prepara pa e Task Forcenan. Como adicon, dos (2) Encuesta Digital nacional a ser conduci den e comunidad Arubano den luna di Juni 2020 p'asina confirma posicionnan clave y e resultadonan di e Task Forcenan.



DESAFIONAN PRINCIPAL Y BENEFICIONAN CONCRETO


Den corto pa medio termino recuperacion economico lo depende grandemente riba e movencion di e turistanan bishitante y nan consumo, eficiencia y medidanan di gastonan recupera pa e sector publico, tambe di otro factor y condicionnan externo.

Pa enforsa e resiliencia a medio y a largo plaso lo procede grandemente for di eheccion di diferente strategia y accion cu ta construi un base mas fuerte di cual por lansa y acelera innovacion rekeri y revitalisa e economia Arubano, incluyendo sector publico y priva, y na e mesun tempo sociedad civil.

E resultadonan di e encuesta “Building Strong Foundations for Economic Recovery & Resilience Community” ta ser presenta den e diagram aki bou. Mas di 75% di e contestanan ta indica cu bon gobernacion, basa riba evidencia y tumando decisionnan inclusivo y normanan enfatisando integridad y responsabilidad ta e yabi pa construi un base fuerte pa e recuperacion economico resiliente.

BUILDING STRONG FOUNDATIONS FOR ECONOMIC RECOVERY & RESILIENCE (Resultado di encuesta den comunidad, Juni 2020)

Con importante e siguiente factornan ta pa construi un base fuerte
pa **recuperacion economico y resiliente**?



CAMINDA PA SIGUI: ARUBA SU ASPIRACION NACIONAL

“Un transicion exitoso pa un modelo economico nobo cu ta sostenibel, inclusivo y resiliente.”



1 Reforsa capabilidadnan institucional y di Gobierno

2 Administracion eficiente, productivo y responsabel na medio ambiente









3 Stimula un Sociedad di enseñansa adapta y modelonan di empresa innovativo

ARUBA SU MODELO DI IMPULSO PA UN MISION DI RECUPERACION ECONOMICO Y RESILIENTE

A base di e tres (3) pilarnan menciona y hunto cu nan plan di implementacion lo contene tanto reforma structural como accionnan inmediato pa medio termino agrupa den un Mision Nacional y priorisa a base di posibilidadnan, realisacion y impacto.

E Aspiracion Nacional ta wordo traduci den 8 Mision Nacional y ta pone e direccion pa logra resiliencia a medio y largo plazo.

E Misionnan Nacional tin como meta recomendacion intersectoral impulsa pa accion pa un modelo economico nobo y sostenibel pa Aruba agrupa den tres (3) pilar principal (temanan general) cu ta sirbi como unificacion pa e misionnan.

3 PILAR	Enforsa capabilidadnan institucional y di Gobierno	Administracion eficiente, productivo y responsabel na medio ambiente	Un sociedad educativo cu ta stimula y adapta y modelonan economico innovativo
8 MISION NACIONAL	<p> Sector publico di Aruba ta un proveedor di servicio publico rapido, estrecho, confiable y di balor agrega.</p> <p> Logra un sistema di transicion cubriendo e isla completo na caminda pa un modelo circular cu ta accesibel y realisabel.</p> <p> Enforsa y salvaguardia e sostenibilidad, siguridad y calidad di produccion di energia y cuminda.</p> <p> E ciudadano Arubano ta orguyoso di un calidad halto di salubridad publico (cuido) y siguridad social.</p>	<p> Aruba tin un sistema operativo yamativo pa empresanan, ta responsabel pa medio ambiente y ta adelanta e frontera di competencia den region.</p> <p> Ciudadano Arubano, bishitantenan y industria local ta beneficia di un adelanto di balor comparti pa local ta turismo.</p> <p> Aruba tin un mercado laboral flexibel y un forsa laboral adaptabel cu tin e herment y habilidad pa maximalisa nan potencial di ganashi y pa adapta na e mercado den movencion.</p>	<p> E sociedad Arubano ta logra un cambio di mentalidad transformativo pa medio di envolve sistema di educacion a termino largo di bida a traves di digitalisacion.</p>

ACCIONNAN CU IMPACTO POSITIVO HALTO

E adoptacion di un plan integral ta imperativo pa logra e Misionnan Nacional door di realisa e accionnan identifica. Esaki ta nifica cu e implementacion di e Master Plan aki lo rekeri recurso humano dedica y inversionnan financiero pa haci'e procesabel. A base di prioridad lo cubri e dos rekisitonan aki. E siguiente clave cu ta e proyectonan cu impacto positivo halto (es decir aceleracion) a ser identifica pa wordo apunta como e prome orden di tarea.

TOP 5 PROYECTONAN DI ACELERACION

1 Mercado laboral reforma y modernizacion di Leynan Laboral

2 Eliminacion di e Red-Tape y improvisa eficiencia den procesonan

3 Belasting reforma sistematicamente

4 E-Government, introduci e ID Digital Nacional y un plataforma digital confiabel pa comparti data

5 Mehora y fortalece capacidad legislativo y innovacion regula

Den e programa di MEP lo duna atencion na tur proyecto di e aceleracion aki den e temanan concerni.



HACI LO CORECTO, HASTA ORA NINGUN HENDE TA WAK

3



HACI LO CORECTO, HASTA ORA NINGUN HENDE TA WAK

INTEGRIDAD DEN GOBERNACION

MEP ta pone integridad y bon gobernacion halto riba e lista di prioridad. Durante Gabinete Wever-Croes a logra pasonan importante. MEP den siguiente gobernacion, CU BO, lo ancura, fortifica y amplia esakinan pa ASINA NOS POR AVANSA e fundeshi di integridad y bon gobernacion den tur sector di gobierno en general y sector priva.

LOGRONAN DI GABINETE WEVER-CROES 2017-2021

- “Bureau Integriteit Aruba” a wordo institui na aña 2019 bou di cartera di ministerio di Asunto General cu ta cay bou di Ministro Presidente.
- Un comision ‘Corporate Governance’ a wordo institui pa bin cu reglanan di integridad pa companianan estatal. A haci un baseline study y a prepara un ley pa hancra reglanan nobo di bon gobernacion den companianan estatal. Ademas di esaki a stipula perfil pa e miembronan di huntanan di comisario y huntanan di supervision.
- Na oktober 2020 Parlamento a pasa e ley di financiamiento di partidonan politico, un ley di iniciativa di parlamentarionan di MEP, sr. Edgard Vrolijk y sr. Rocco Tjon, cu a drenta na vigor dia 1 di januari 2021.
- E ley di Ombudsman a wordo aproba unanimamente.
- Adaptacion di ley di contabilidad a wordo aproba, ehecucion ta wordo prepara awo.
- Un comision “Versterking Democratisch Bestel” a wordo institui pa fortifica nos colegionan halto di estado; a traha un plan den 3 fase:
 - Fase 1 ta pa fortifica y independisa Raad van Advies, y pa hancra Ombudsman den Constitucion, a wordo entrega na Parlamento pero Parlamento no a pasa e ley ainda.
 - Fase 2 ta e independisacion di Parlamento, y e proceso ta den man di Parlamento awo.
 - Fase 3 ta pa fortifica Algemene Rekenkamer y ya a cuminsa cu e trabounan. Door di Covid-19 esaki no por a ser finalisa ainda.
- Gabinete Wever-Croes a duna Sociaal Economische Raad (SER) mas autoridad, entre otro pa duna Parlamento consejo directo y independiente; a fortifica SER su miembronan; ta trahando riba ampliacion di secretariado di SER.



PROGRAMA INTEGRIDAD PA PERIODO DI GOBERNACION 2021-2025

- Integridad: Cu integridad MEP kier pa e gobernantenan mester por actua responsabel, aplica transparencia, duna splicacion ora ta necesario y para firme pa e consecuencianan di nan actonan.
- Aplica transparencia: gobernantenan ta publica y splica maneho y decisionnan structuralmente.
- Duna splicacion ta significa cu gobernantenan por indica con nan accionnan ta den linea cu e responsabilidnan y tareanan principal.
- Para firme ta significa mantene bo mes fuerte den cara di adversidad y tentacion y no actua di manera irresponsabel, djis pasobra esaki ta e caminda di menos resistencia. Y finalmente e gobernante ta carga responsabilidad pa su actonan.
- Aplicando balornan fundamental manera: confiansa, imparcialidad, independencia, legitimidad, servicio y trato cu respet.

GARANTISA GOBERNANTENAN INTEGRO DEN GOBERNACION

- Pa por logra mas confiansa di ciudadanonan den gobernacion, e ciudadano mester por confia riba e integridad di e politico. E ley di screening cu ta actualmente na Parlamento, lo wordo trata cu preferencia.
- Un codigo di conducta pa minister y parlamentario pa garantiza cu una bes e politico huramenta como minister of parlamentario, cu e ta keda riba e caminda corecto, y si en caso e bira un sospechoso den un caso penal, mesora e ta retira.
- Lo revisa e 'KIESVERORDENING'. Entre otro lo enfoca riba e posibilidad pa permiti e politico cu mas voto drenta Parlamento irrespecto e number riba lista. Teniendo cuenta cu e principio di proporcionalidad lo evalua si tin mas cambio cu mester wordo introduci den e ley aki.



GARANTISA PROCESONAN INTEGRO DEN GOBERNACION

- A traves di e Bureau Integriteit Aruba, promove integridad den tur departamento di gobierno. Lo aumenta conscientisacion den e aparato gubernamental con pa detecta casonan corruptivo. Lo haci estudionan intenso pa detecta e procesonan mas vulnerabel, pa por introduci mas “checks and balances”.
- Lo organisa training/charla/workshop/curso riba e topico di integridad pa empleadonan publico.
- Crea un database central di tur afspraak cu un minister tabata tin na su ministerio y haci esaki publico na fin di tur aña. Conforme 'uitvoeringsrichtlijn Openbare Agenda's.
- Cumpra licencia di 'World Check' y asina haci un screening di persona cu kier afspraak direct cu minister. Specialmente di sector comercial y di exterior.
- Introduci un ‘codigo di integridad’ pa tur empleado publico y “gelijkgestelden”, cu ta enfoca riba mehora e servicio y riba mas transparencia den e servicio di gobierno.
- Introduci un manual general estilo “company manual” cu ta hopi necesario pa gobierno. Hopi biaha hende ta cuminsa traha cu gobierno y no sa kico ta e reglanan.
- Elimina influencia politico di e proceso di nombracion y di promocion di personal di gobierno.
- Continua cu e maneho introduci na 2017 pa loke ta trata esnan cu ta traha na e ministerionan. Percura pa e hendenan ta prepara pa e funcion cu nan ta asumi, y cu esnan cu ta traha den un ministerio wordo paga di acuerdo cu reglanan salarial di gobierno.

GARANTISA PROCESONAN INTEGRO DEN COMPANIANAN ESTATAL

- A traves di e Comision di “Corporate Governance” lo finalisa e trabounan di introduci un codigo nobo di corporate governance pa companianan estatal.
- Den e codigo aki lo delinea e perfil di miembronan di huntanan di comisario y di supervision, lo regla con pa evita conflicto di interes, y stipula beneficianan primario y secundario pa directoman y pa miembronan di staf.
- E “Wever-Croes”norm lo drenta na vigor, den cual ta stipula cu un director di un compania estatal no por ricibi un salario cu ta mas halto cu 130% di e salario di minister president.

PROTECCION DI DEFENSOR DI PUEBLO

- Awor cu e ley di Ombudsman, defensor di pueblo, a wordo aproba, e enfoke ta bay ta riba estructuracion di e oficina di e Ombudsman, pa e por traha eficientemente y independientemente, atendiendo kehonan di ciudadanonan. Den esaki lo busca acercamento cu e institucionan igual den Reino.
 - Lo bolbe haci un intento pa hancra e Ombudsman den Constitucion. Esfuersonan pa haci esaki na comienso di 2021 tabata envano, debi cu no a logra haya sosten di 2/3 parti di Parlamento.
- E Ombudsman ta garantisa proteccion riba tur nivel. E Ombudsman lo atende cu kehonan di
- ciudadanonan riba decisionnan inadecua, mal motiva of sin base legal, tambe mal servicio di departamentonan gubernamental.

FORTIFICA COLEGIONAN HALTO DI ESTADO

- E trabounan cu a cuminsa bou di Gabinete Wever-Croes pa fortifica colegionan halto di estado, lo wordo finalisa.
- E ley di Raad van Advies lo wordo modernisa, dunando e Colegio aki mas autoridad y libertad, pa por ehecuta e funcion di conseho consultativo.
- Parlamento lo wordo mas independisa pa por eherce e tarea di controla gobierno mas imparcial posibel.
- Algemene Rekenkamer lo wordo fortifica y empodera pa haci controlnan mas eficiente.
- Asina ta garantisa cu e colegionan halto di estado ta ekipa pa por eherce control riba funcionamiento di gobierno y parlamento.





MENTE INNOVATIVO

4



4

MENTE INNOVATIVO

Innovacion no ta un producto, pero un herment pa por logra metanan di gobernacion y mehoracion di calidad di bida pa e ciudadano. Innovacion ta un herment importante den desaroyo di un pais y di su hendenan.

INNOVACION

Desde inicio Gabinete Wever-Croes a pone innovacion como un tema central den su maneho di gobernacion.

E compromiso pa hancra innovacion den e forma di traha di gobierno y den proyectonan importante pa Aruba ta evidente den e maneho di e ultimo 3 año y mey.

Tambe na un manera consistente a pone hopi esfuerzo pa conscientisa comunidad di e importancia di innovacion pa nos pais y awe nos por mira e fruto di e esfuerzo aki di MEP den Gabinete Wever-Croes.

Nos a yega un punto unda cu e palabra of tema innovacion ya no ta algo nobo mas, e ta mas comun cu nunca antes y un exigencia basico den tur sector pa por sigui avansa.

STRATEGIA NACIONAL DI INNOVACION

- Desde 2018 a crea un strategia nacional di innovacion cu e ser humano central y metanan concreto p'asina por realisa un Aruba Innova pa 2030.
- Un Aruba resiliente unda cu e ciudadano y nos muchanan tin tur locual nan mester na recursonan y habilidadnan pa por ta exitoso den siglo 21.
- Impacto riba e ser humano y asina trece innovacion mas cerca di e ciudadano cu proyectonan pa nos grandinan y muchanan.
- Mehoracion di servicio di gobierno cu e proyecto ambicioso di e-Government.
- Innovacion lo keda un tema central den MEP su maneho y lo sigui enfoca pa pone e ser humano central ora di desaroya y implementa proyectonan di innovacion.
- Un ehempel di con ta pone e ser humano central, ta ora cu a logra ekipa tur cas di cuida di nos grandinan cu tabletan digital, p'asina nan por a keda den contacto cu nan sernan keri na un manera sigur durante e pandemia di Covid. Esaki a trece hopi felicidad y tranquilidad pa nos grandinan cu merece esaki y hopi mas.
- e-Government lo trece beneficiaran grandi pa departamentonan di Gobierno, y pa sector priva.
- Lo habri porta pa programanan y inversionnan nobo pa Aruba.
- e-Government lo posiciona Aruba como un di e poco paisnan lider rond di mundo cu ta implementando solucionnan digital pa gobierno.
- Den un tempo cortico por a experiencia menos red-tape, introduccion di varios servicio digital di gobierno, entre otro transaccionnan di belasting y censo, vergunning di negoshi y rijbewijs.

MANEHO DI INNOVACION

- A crea un plataforma innovativo, Futura Innovation Lab.
- A ehecuta mas cu 50 proyecto di innovacion den 3 aña den colaboracion extenso cu varios stakeholder.
- A demostra e talento y capacidad di nos mesun hendenan local cu trahando hunto cu diferente instituto, NGOs y sector priva den un forma habri tabata sumamente exitoso den trece innovacion mas cerca di e ciudadano.

DESARROYO DI TALENTO

- Diferente coding y innovation camps pa muchanan.
- Introduccion di Mo-B Lab; bus di tecnologia cu a bay rond di Aruba y a bishita diferente scol unda mas cu 10.000 mucha por a siña coding, 3D printing, robotics y ciencia.
- Colaboracion cu expertonan local pa introduci dos makerspace lab na bibliotecanan na Oranjestad y San Nicolas.
- Varios workshop innovativo pa tur edad y specialmente pa 60+.
- Ehecucion di dos proyecto di eLearning unda cu a ekipa scolnan basico y kleuter cu computer, borch digital y VR Goggles y alabes a train maestronan p'asina por brinda nos studiantenan e ekiponan y conocimiento necesario pa desaroya nan 21st century skills.

CREACION DI RECURSONA INNOVATIVO

- Varios workshop pa entrepreneurs.
- Plataforma di 100 Innovations unda cu a traha di cerca cu empresarionan social cu ideanan pa negoshinan cu tin un impacto positivo riba nos sociedad, planeta y medio ambiente, p'asina yuda concretisa nan idea y conecta nan cu recursonan pa nan por ta exitoso. Mas di 100 idea a wordo administra via e plataforma aki.
- Desaroyo di 100 Innovations Academy; un plataforma digital unda lo ofrece diferente curso digital na empresarionan y tur ciudadano cu kier sigui siña y expande nan habilidadnan.
- Desaroyo di e plataforma digital Arubaactiva.com unda cu empresarionan por haya acceso na crowdfunding p'asina por colecta fondo pa nan proyectonan.

DESARROYO DI PLATAFORMA


- Plataforma District 297 a wordo lansa y a logra conecta cu Arubianonan bibando den exterior, entre otro na Hulanda, Costa Rica, y Merca.
- A organisa varios sesion (webinar) informativo hunto cu expertonan Arubano rond di mundo unda cu nan a contribui cu nan conocimiento na proyectonan importante pa Aruba.
- Na 2019 a lansa e plataforma District297.com unda cu tur Arubiano por crea un account y busca oportunidadnan na Aruba pa trabou y stage.

E-GOVERNMENT - TRANSFORMACION DIGITAL DI SERVICIO DI GOBIERNO

- E plan di maneho nacional di transformacion digital a wordo publica na fin di 2020.
- E trayecto mes di transformacion digital di servicio di gobierno a cuminsa medio 2018 cu trabounan di estudio y preparacionnan intenso cu a culmina den februari 2021 cu e acuerdo cu compania di tecnologia di Estonia Cybernetica (Cybernetica a traha e plataforma innovativo y exitoso pa Gobierno di Estonia).
- Na december 2020 a publica e asina yama e-Government Road Map 2020-2025 di Aruba "A Better Citizen Experience".

TRAYECTO DI E-GOVERNMENT 2018 – 2020

- Den liña grandi a logra e siguiente den e prome fase preparatorio di e-Government.
- Alinea stakeholdernan pa un vision comun.
- Inversionnan grandi den infraestructura di IT critico di gobierno (hardware y software) p'asina por mantene e servicionan digital actual y operacionnan di gobierno.
- Centralisacion di software crucial den gobierno cu a resulta den bahamento di gasto y mas eficiencia.
- Introduccion di un oficina nacional di cybersecurity (NCTVI) y campaña di conscientisacion den gobierno pa cu cybersecurity.
- Introduccion di e-Kabinet p'asina por digitalisa e trabounan y decisionnan di conseho di minister cu a crea gran eficiencia den e proceso.
- Inversion, desaroyo y implementacion di varios servicio nobo digital di gobierno como parti di e vision y maneho integral di e-Government, entre otro:



PROYECTO PILOTO CONEXION 2020

- Implementacion di e proyecto Conexion cu ta e proyecto piloto importante di e interoperability platform cu lo establece e fundeshi nacional pa e digitalisacion di servicionan di Gobierno den colaboracion cu departamentonan crucial.
- E proyecto piloto Conexion lo crea un base tecnologico pa Gobierno di Aruba p'asina por ofrece servicionan moderno y digital na e publico di Aruba. Den futuro e ciudadano lo por tin acceso na mayoria di e servicionan di gobierno na un manera sigur via nan telefon celular, computer of tablets (entre otro).



• PROGRAMA INNOVACION PA PERIODO DI GOBERNACION 2021-2025

MANEHO DI INNOVACION

- Innovacion lo fungi como e catalisador pa recuperacion di economia y creacion di cuponan nobo di trabou den futuro.
- Pa sigura un continuacion di un maneho integral di innovacion a crea un Departamento di Innovacion.
- E Departamento aki lo bira operacional den e di tres kwartaal di 2021 y lo ta encarga cu ehe-cucion di maneho nacional di innovacion di 2021-2025.

DESAROYO DI HABILIDADNAN PA SIGLO 21 Y FUTURO DI TRABOU

- Acelera e maneho di innovacion den enseñansa pa percura cu tur mucha y estudiante na Aruba tin acceso na e hermentnan y habilidadnan cu nan tin mester pa ta exitoso den siglo 21.
- Esaki lo inclui un programa nacional pa implementa e proyecto di e-Learning na tur kleuter, scol basico, y scol secundario na Aruba y ekipa scolnan cu entre otro borchí digital (e-boards), computer y virtual reality goggles.
- Alabes lo desaroya un centro di educacion digital/IT y desaroyo di 21st century skills pa tur maestro na Aruba por ekipa nan mes cu e conocimiento necesario pa brinda e miho exper-encia posibel na e alumnonan den e era digital.
- Continuacion di desaroyo di un plataforma di educacion profesional y vocacional y crea un centro di life-long learning virtual y fisico unda cu ciudadanonan di tur edad na Aruba por sigui desaroya nan mes y nan conocimiento. Lo tin programa special pa 60+, conocemen-to basico digital (digital literacy) entrepreneurship, IT management/cybersecurity, coding, negoshi sostenibel, multi-media design y hopi mas.

OBHETIVONAN STRATEGICO DI E-GOVERNMENT

- Crea un sistema integral di e-Government.
- Introduci identificacion (ID) digital nacional.
- Desaroya un cuadro di ley pa transaccionnan digital y proteccion di datonan.
- Simplifica y digitalisa servicionan di gobierno.
- Sigura un modelo robusto di privacidad di datonan y cybersecurity.
- Inverti den e capacidad humano di empleado publico y e ciudadano.
- Diseña un campaña inclusivo di conscientisacion pa e-Government.
- Institui un plataforma di maneho central pa coordina e-Government.
- Implementa un modelo di financiamiento y inversion (procurement) sostenibel.
- Crea un ecosistema cu ta complementa y acelera transformacion digital.

Pa mas detaye di e plan di maneho y e obhетivonan strategico y accionnan concreto pa 2021-2025 ta referi na e documento e-Government Road Map "A Better Citizen Experience", version December 2020.

SIÑA BON AWE PA COSECHA MAÑAN

5



SIÑA BON AWE PA COSECHA MAÑAN

Enseñansa ta ocupa un funcion cardinal den desaroyo di un pais. Enseñansa mester ofrece tur hende espacio pa nan por desaroya tur conocimiento, habilidad y actitud cu nan mester, pa nan por funciona bon y logra exito den nan bida. Ta importante pa henter comunidad y sector di enseñansa en particular haci su maximo esfuerzo pa sigura cu cada ciudadano por siña durante henter su bida y asina desaroya y progresa.

EDUCACION DI CALIDAD

Den e acuerdo firma cu Hulanda tin como proyecto un evaluacion di enseñansa na Aruba.

E meta ta pa realisa un enseñansa basico di calidad, realizacion di enseñansa acopla na e mercado laboral y garantiza e conexion entre e sistema di enseñansa na Aruba cu paisnan den Reino y Europa.

Hunto NOS TA AVANSA y eleva e balor y aprecio pa enseñansa den nos comunidad. Lo cultiva un ambiente di conscientisacion pa tanto e alumno, mayor, e bario, instancianan social y educativo y comunidad en general, sostiene e scol den su tarea importante di educacion y enseñansa di nos futuro generacion.

Un pueblo educa ta un pueblo cu **vision y futuro.**

PROGRAMA ENSEÑANSA PA PERIODO DI GOBERNACION 2021-2025



MANEHO DI IDIOMA

- Lo explora e miho forma pa crea un instituto di maneho y planificacion di idioma cu lo ta e autoridad den maneho nacional di idioma na Aruba.
- Garantisa maneho multilingual den enseñansa primario, secundario/preuniversitario.
- Percura y stimula introduccion di Papiamento como idioma di instruccion (den enseñansa primario, secundario/pre-universitario (Curaçao Scol Humanista SKAIH) banda di otro idioma manera Hulandes, Ingles, Spaño.
- Percura pa introduccion di Papiamento como idioma di instruccion y como materia den e sistema di enseñansa, segun maneho di idioma nacional cu lo ta e.o. coordina, supervisa y sosteni pa e Instituto Linguistico Nacional Arubano. E instituto aki lo percura pa e planificacion di e.o. e parti di adkision cu ta hopi relevante pa enseñansa.
- Introduccion di programa di incorporacion di muchanan/hobennan den nos sistema di enseñansa multilingual, pues Scol Arubano Multilingual (SAM) y secundario y unda IPA lo mester sigui cu e cursonan pa prepara e docentenan pa e SAM.
- Lo explora e posibilidad pa hobennan den enseñansa secundario/preuniversitario traha examen na Papiamento y un of mas idioma stranhero. Pa esaki por traha den un forma colaborativo cu Corsou cu ta traduci examen na Papiamento.

CURICULO, PEDAGOGIA Y ANDAGOGIA SIGLO 21

- Implementacion di programanan curricular y extracurricular riba tur nivel di enseñansa cu ta stimula desaroyo di habilidadnan di siglo 21 manera e.o. colaboracion, pensamiento critico, innovacion, comunicacion, autoregulacion y creatividad.
- Percura pa desaroya y innova programanan di enseñansa profesional (riba tur nivel) cu ta acopla na sector di comercio y laboral. E programanan cu ta stimula e.o. siña pa bida (life-long learning) bou di e studiantenan.
- Adaptacion y ampliacion di programanan curricular cu ta tene cuenta cu desaroyo holistico di e ser humano pa nan por ta bon ciudadano Arubano y di mundo. Programanan curricular cu ta stimula e.o. identidad nacional, cultura, idioma, salud, matematica, historia y derecho estatal den enseñansa primario, secundario/preuniversitario.
- Ampliacion di e ekipo di profesional nan cu ta traha riba curiculo na e mesun cantidad cu e tabata na 2019, incluyendo profesional nan den “instructional design”.

- Stimula acercamento pedagogico y andragogico cu ta tene cuenta cu ciencia di siñamento di nos mucha-, hoben- y adultonan. Acercamentonan cu ta stimula integracion (inter- of transdisciplinario) di contenido di curiculo cu ta haci siñamento mas relevante y motivante pa e mucha, hoben y adulto.

- Percura pa ofrece programanan practico y innovativo na adulto aplicando un bon andragogia y stimula siña pa bida na e adultonan. Dicho programa mester ta acopla cu sector laboral y segun nan necesidadnan.



OPERACIONALISA ENSEÑAÑA DEN UN AMBIENTE SIGUR

- Structuralmente crea y mantene plataforma di dialogo entre stakeholdernan, manera colegio di consulta di enseñansa, directivanan di scol, SIMAR, Departamento di Enseñansa di Aruba, Inspectoria di Enseñansa.
- Crea un structura eficiente, sostenibel y duradero di mantencion y renobacion di edificionan escolar.
- Percura pa condicionnan necesario caminda scolnan por crea un ambiente sigur pa e estudiante, maestro/docente por traha y desaroya optimalmente. Siguridad di scol ta basa riba e terenonan di siguridad di enseñansa, siguridad social-emocional, siguridad intrastructural y siguridad contra crimen.
- Crea condicion pa mehora structura di cuidu den e scolnan di tur tipo di enseñansa na beneficio di siguridad di enseñansa y siguridad social emocional. Dicho mehoracion mester cuadra cu e "Quality Assurance Program" QAP.

AYUDO Y SOSTEN NA DOCENTENAN

- Recapitacion y guia continuo y practico di Cabesante-/ Director- y maestronan segun nan necesidad y tambe desaroyo den enseñansa.
- Crea un plataforma caminda por comparti y sifa di otro. Duna reconocimiento pa esfuersonan haci den enseñansa y comparti esakinan cu otro scolnan como 'best practices'.
- Sigui stimula inversion responsabel den innovacion cu enfoke riba formacion y uzo di esaki den enseñansa. Mester pone como prioridad pa sigui amplia conocimiento y capacidad riba tereno di innovacion y digitalisacion di nos maestronan. Aki por pensa no solamente riba e Proyecto Digiboards cu ya ta tumando luga, pero tambe tur material digital manera programanan y metodonan nan cu ta bay cu esaki.
- Percura pa suficiente personal: un 'zorgteam' (posiblemente cu trahado social) cu por asisti e maestro debidamente.
- Bin cu structura di duna conseho explicitamente pa maestronan: lo brinda guia, coaching, asistencia tecnico, emocional y riba nivel psicologico.
- Amplia seccion di guia di Departamento di Enseñansa, unda ta brinda mas oportunidad pa guia riba formacion didactico y pedagogico nobo y unda lo haci uzo di seminario, workshops y dianan di estudio.
- Lo bini cu un sistema efectivo caminda kehonan di mayornan, docente/cabesante ta wordo atendi a corto plaso.
- Reforsa e programa preparatorio di estudiante cu ta bay studia afo den linia di recomendacion specifico haci pa e Ombudsman Hulandes pa mehora posicion di nos studiantenan na Hulanda.

INFRASTRUCTURA

Pa por siña, un alumno mester por traha den un ambiente sigur y sano. Esaki ta conta tambe pa esnan cu ta traha na scol. Mester tin suficiente scol pa tur nos alumnonan na Aruba.

- Mehora e infraestructura y haci mantencion structuralmente na scolnan, pa garantisá tur scol un edificio sano, cu ta cumpli cu e necesidadnan di e scol y ta moderno. Den esaki tambe mester percura pa e infraestructura ta cumpli pa studiantenan cu un deficiencia fisico por atende scol sin niun restriccion.
- Percura pa tin bon seguridad pa nos alumno y maestronan.
- Prioridad ta drecha edificacionan den mal estado of cu a keda cera en espera di e renobacion necesario.
- Sigui inverti den e proyecto di airco y innovacion.

ENSEÑANSA ACCESIBEL PA TUR HENDE

- Revisa e sistema di otorgacion di fianza di estudio actual, y dirigi esaki mas tanto posibel riba e necesidadnan di nos mercado laboral a largo plaso, ampliando asina e posibilidad di un empleo na momento cu e estudiante termina su estudio.
- Brinda studentenan fianza pa estudio avansa sin interes.
- Amplia educacion profesional pa adulto unda lo enfoca riba training on the job y life long learning. Den esaki lo pone hopi atencion na esnan cu no a termina scol y esnan cu pa un motibo of otro a cay den man di husticia.
- Stimula estudio online y reconoce e estudionan aki. Envolve nos profesionalnan cu ta biba afo pa medio di programanan innovativo y educativo p'asina nan por contribui cu conocimiento, experticio y guia ('mentorship') na hobennan profesional local y 'entrepreneurs' local.
- Programa di landamento escolar lo continua y unda lo percursa pa tur mucha den cuadro di inclusion tambe por haya acceso na e programa aki.

REFORMA ENSEÑANSA

- Percursa pa structuralmente y hunto cu docentenan trece cambio den curiculo escolar.
Traha riba e motivacion di docentenan y brinda cursonan di recapacitacion pa docentenan.
- Amplia e cantidad di facultadnan tanto na EPI como na Universidad di Aruba y crea mas facilidad pa studia na Aruba mes. Den esaki lo mester logra haya acreditacion internacional pa Colegio EPI como instituto na unda por finalisa un estudio cu un Associate Degree den tur ramo.
- Revision di e cambionan haci e ultimo 3 añanan den tur area di enseñansa y unda mester trece adaptacion pa mehoracion di enseñansa esaki lo ser haci.
- Nos mester focus riba nos scolnan/institucionan di enseñansa superior aki na Aruba mes y traha hunto cu universidadnan den exterior riba tereno di e-learning.
- Y evalua introduccion di un Bachelors Degree program den e ramonan di Nursing (incentiva) y "Information and Communication Technology", Civil/Electrical/Industrial Engineering (bouwkunde/werktuigbouwkunde/ informatica/electrotechniek) y "Data Science", cu ta ramonan di estudio cu Universidad di Aruba no ta ofrece na nivel di "Bachelors".
Pa por logra esaki mester busca cooperacion riba e tereno aki cu University of Curaçao y tambe institucionan na Hulanda y Merca.
- Percursa pa cambio, adaptacion y creacion di diferente ley di enseñansa tuma luga pa garantiza implemenacion di PEN 2030 den consulta constante cu docentenan.

- Restructuracion di IPA pa por percura cu e formacion di docentenan ta cumpli cu desaroyo actual di enseñansa mundial principalmente riba tereno di innovacion y uzo di tecnologia. A base di data percura pa yena e necesidadnan cu tin den enseñansa caminda na mes momento ta brinda incentivanan pa stimula mas hoben pa studia pa bira docente aki na Aruba mes. Y alabes percura pa mantene e acreditacion di e instituto.
- Percura pa un maneho di Enseñansa profesional (EPB/EPI) cu ta dirigi riba necesidad di nos mercado laboral a corto y largo plaso y alabes percura pa e mehoracion di e conexion entre EPB y EPI.
- Institui un Fondo Nacional pa Innovacion di Enseñansa, banda di e fondo di Enseñansa regular.
- Crea un ‘Raad van Onderwijs’ independiente cu lo por duna conseho riba maneho y cambionan.
- Lo incorpora den e forma di traha na tur scol un sistema di calidad. Lo implementa un “Quality Assurance Program” (QAP) cu ta encera un proceso continuo unda a base di “Key Performance Indicators” (KPIs) e scolnan ta wordo midi y evalua. E programa aki lo salvaguardia calidat di implementacion di PEN 2030.

METANAN MUNDIAL PA DESARYO SOSTENIBEL

- Crea conscientisacion entre docentenan actual y futuro docentenan riba e tema di Sostenibilidad y esaki relaciona cu e Metanan Mundial pa Desaroyo Sostenibel den e contexto local y internacional.
- Lansa campananan escolar educativo riba e tema di Metanan Mundial di Desaroyo Sostenibel.
- Incorpora y adresa e importancia di sostenibilidad den e curriculo actual den cada nivel di enseñansa, den su forma adecua. Identifica y educa studiantenan tocante e problematica, preocupacion, perspectiva, habilidad y balor cu ta central den desaroyo sostenibel. Poniendo atencion na medio ambiente y unda entre otro mester educa riba e 7-R’s of Sustainability: Rethink, Refuse, Reduce, Repurpose, Reuse, Recycle, Rot y conocimiento di nos propio flora y fauna, Geografia.



- Relaciona e tres componentenan di e Metanan Mundial pa Desaroyo Sostenibel – Medio Ambiente, Sociedad y Economía - na e lesnan diario. Asina por stimula perspectivanan mas holistico y interconecta.
- Crea espacio den klas pa promove y stimula pensamiento critico pa resolve problema y tuma accion. Den e forma aki por fomenta confiansa propio na momento cu mester adresa retonan relaciona cu desaroyo sostenibel. Den e forma aki por prepara studiantenan for di trempan, pa nan tuma miho decision pa nos isla y planeta den futuro.
- Incorpora material educativo durante les, manera video/ilustracion/buki, cu ta toca e tema di sostenibilidad.
- Incorpora material educativo pa crea studiantenan cu lo bira ciudadanonan digital cu lo sa di uza tecnologia den un forma responsabel den un comunidad moderno y digitalisa.
- Presenta y adresa retonan local relaciona cu sostenibilidad den klas, y stimula studiantenan pa presenta nan propio solucion.
- Stimula accionnan practico, manera reciclahe, plantamento di mata, evita uzo singular di plastic y conservacion di awa y coriente pa proteha nos medio ambiente.
- Crea campananan escolar pa ricibi bishita di FUTURA y nan Mobile Makerspace, caminda studiantenan por asisti na un variedad di programanan tecnologico y siña mas di e mundo innovativo.
- Den cuadro di stimula scolnan saludabel y sostenibel mester stimula e parti di agricultura den scolnan manera proyecto di Colegio Laura Wernet Paskel.

CALIDAD Y ESTIMULO EFECTIVO

- Percura pa un reorganizacion den Departamento di Enseñansa pa por logra un “top-down effect”. Nos lo ekipa cada departamento pa por traha efectivamente.
- Lo ekipa Departamento di Inspeccion pa por supervisa e calidad di enseñansa miho.
- Mehora funcionamiento di e departamento curricular y introduci un departamento di IT.
- A base di investigacion y data, cuminsa e proceso di modernizacion di enseñansa cu atencion special pa prepara e docente pa e era digital.
- Lo introduci un “Quality Inspection Program” (QIP) pa Departamento di Inspectoria percura pa calidad halto di implementacion di PEN 2030.
- Percura pa Departamento di Enseñansa tin e recursonan necesario pa traha riba plannan operacional (anual y multianual) di enseñansa (maneho di e.o. QAP, idioma, finansa, infrastruttura) y pa por guia/coach y sostene scolnan y directiva di e scolnan.

- Atencion special lo wordo duna na un maneho nacional riba 'bullying'.
- Lo bin cu supervision y control di e crechenan pa garantiza educacion di calidad for di edad ya di infancia.
- Mehora calidad di Enseñansa na scolnan special, unda lo percursa pa drecha e infraestructura y percursa pa tin materialnan innovativo pa e muchanan. Tambe mester revisa e curiculo hunto cu e docentenan of percursa pa introduccion di esaki.
- Inclusion mester ser promovi na Aruba, den esaki mester percursa pa cuminsa na adapta infraestructura escolar (pa esnan cu limitacion fisico) y sigur den esaki mester cuminsa na capacita nos docentenan pa reconoce situacionnan y con pa atende cu esakinan unda por atende mas tempran cu muchanan y asina por yuda nan na e manera mas efectivo y eficiente.
- Mester percursa pa e muchanan di SPO por haya un diploma na final di nan ultimo aña escolar.

**Nos prioridad ta
mediante confianza
percursa pa mehora
calidad di enseñansa
unda hunto nos lo
percursa pa
enseñansa
por avansa.**





• CULTURA INTEGRADA EN EL DESARROLLO DURADERO DE ARUBA

Tur mucha, hoben y adulto tin e derecho di disfruta di arte y cultura como parti di nan desaroyo humano. Nos meta ta pa sigui engrandece e desaroyo di arte y actividadnan cultural pa henter pueblo di Aruba por biba y experiencia cultura.

Participacion ta e miho manera pa conscientisa y educa nos comunidad di e balor grandi di su herencia cultural. Hunto nos lo sigui fortifica nos identidad pa medio di nos idioma, expresion y productonan artistico y cultural.

Nos cultura y naturalesa ta yama un cantidad grandi di bishitante pa bin conoce nos isla, cu ta contribui na nos economia y cu kende nos ta comparti e producto 'Aruba'. Nos ta hopi orguyoso di nos pais y Hunto nos lo sigui inverti den cultura.





• LOGRONAN GABINETE WEVER-CROES 2017-2021

- Prome cu e pandemia di Covid nos a pone +/- 2 miyon florin disponibel pa 60 diferente Organizacion No-Gubernamental (NGO's). Entre otro a pone fondo disponibel pa algun proyecto cultural di Fundacion Lanta Papiamento, Carnaval di Aruba (SMAC), Pure Aruba Events & Foundation (Art Fair San Nicolas) y Fundacion Eterno (Obranan di Arte Paardenbaai).
- A publica den 2020 e buki 'BaluArte' cu ta presenta 32 historia cortico di varios persona y organizacion cu trayectoria largo trahando riba tereno di cultura. Esaki a sosode despues di 10 aña cu Departamento di Cultura Aruba (DCA) a cuminsa documenta e historia di varios baluarte riba tereno di arte y cultura.
- A logra na 2019 inicia atrobe cu e asina yama '4-Landen Overleg' entre e ministernan di Enseñansa y Cultura den Reino Hulandes. E ultimo consulta tabata na 2012. Aruba ta traha hunto cu e pais- y islanan di Reino Hulandes riba tereno di: herencia cultura inmaterial, herencia cultural sub acuatico, fondo pa investigacion cultural y educacion cultural.
- Nos a logra na 2019 pa habri Museo Arkeologico Nacional Aruba despues cu e tabata cera pa publico pa mas cu dos aña. Tambe a inicia e proceso di reorganisa y restructura e museo aki. Den cuadro di esaki a cera un convenio entre MANA, UNOCA y Banco Central pa bay traha riba un exposicion permanente nobo pa MANA.
- Ta un orguyo pa nos por a registra na 2019 e prome 'cas di cunucu' pafo di Playa como un monumento protegi riba Lista di Monumentonan.
- Nos a sigui sostene Monumenten Buro, St. Monumenten Fonds y Monumenten Raad.
- Tur ta cumpli 25 aña di existencia den 2021. E organisacionnan aki a haci posibel cu nos por a rescata y restaura varios monumento na Aruba.
- Nos a logra motiva e pueblo di Aruba pa acudi na cantidad grandi atrobe na Plaza Betico Croes riba 18 maart 2018 pa disfruta di nos artistanan, artesonan y cuminda crioyo. E añanan prome no tabata tin mucho publico presente ey nan.

PROGRAMA CULTURA PA PERIODO DI GOBERNACION 2021-2025

CULTURA INMATERIAL Y MATERIAL

- Expande lasonan importante cu instancianan internacional p.e. UNESCO riba tereno di cultura pa reenforza tur e organisacionnan cu ta traha riba tereno di herencia cultural material y inmaterial.
- Den cuadro di e Convenio Internacional pa Salvaguardia Herencia Cultural Intangibel, nos lo sigui traha den cooperacion estrecho cu e paisnan den Reino. E infraestructura di museonan lo sigui hunga un rol importante den e proceso aki.
- Sigui introduci leyman necesario pa proteha nos herencia cultural, naturalesa y monumentonan den un forma legal y estructura.

EDUCA CU CULTURA

- Amplia conocimiento di profesional-, organizacion- y instancianan cultural den colaboracion cu otro paisnan den Reino.
- Sigui crea oportunidad pa desaroya talento artistico desde un edad hoben, dunando sosten na e Organizacionnan No-Gubernamental cu ta traha riba tereno di formacion artistico, particularmente di nos muchanan y hobennan.
- Inverti den centronan di informacion y documentacion pa expande nos capacidad pa haci investigacion y educa riba tereno di arte y cultura.
- Institui un Comision Nacional pa Educacion Cultural, pa den colaboracion cu Departamento di Enseñansa, traha riba un sistema di educacion cultural tanto na scolnan como pafo di enseñansa.
- Institui un Consejo di Cultura cu e meta primordial pa vigila implementacion di e maneho cultural di Aruba y pa duna consejo pa desaroyo di e manehonan sectoral di cultura.
- Crea consciencia pa conoce nos mes cultura na prome luga, pero tambe pa siña aprecia cultura di otro. Ta importante pa respeta cultura di tur habitante cu ta forma parti di nos pais y enrikece nos mes por medio di intercambio cultural.

PLATAFORMA CULTURAL

- Departamento di Cultura lo ser someti na un evaluacion pa por crea un departamento mas eficaz y eficiente.
- Pone mas enfasis na desaroyo di nos produccionnan local y na conscientisacion di nos pueblo pa balora y reconoce nos mes talentonan.
- Crea mas oportunidad pa desaroyo di produccion den industria creativo di calidad internacional.
- Durante celebracion di Dianan Nacional pone mas enfasis na nos talento y productornan di importancia nacional, ofreciendo plataforma pa presenta creacion di nos musico-, artista-, artesano- y escritornan.
- Duna atencion na e Dianan Internacional riba tereno di cultura, arte y naturalesa pa medio di informa y conscientisa nos pueblo riba e importancia di e sectornan concerni.
- Crea lasonan mas estrecho entre Departamento di Cultura y Centronan di Bario pa crea mas participacion pa hoben y adulto riba tereno di arte y cultura.
- Garantisa continuacion di manifestacionnan cultural manera exposicion, obranan teatral, presentacionnan riba tarima, Parada di Cultura, Festival di Dande, Festival di Caha di Orgel, Fiesta di San Juan Dera Gay den e barionan, etc.

CULTURA COMO FUENTE ECONOMICO

- Nos lo sigui proteha y conserva nos sitionan natural y cultural como producto turistico. Cultura ta aporta na desaroyo economico sostenibel.
- Nos lo sigui sostiene nos musico-, artista- y artesanonan pa crea produccionnan di calidad halto y fortalece e capacidad empresarial di e sector di industria creativo.
- Realisa un exposicion na Museo Arkeologico Nacional Aruba riba historia monetario di Aruba di calidad internacional, cu tin un balor agrega pa nos comunidad y nos turistanan.



CULTURA Y IDENTIDAD

- Nos lo haci nos pueblo, particularmente nos hobennan, consciente di e balor y nificacion cu idioma materno tin den desaroyo di cada ser humano.
 - Duna mas atencion na promocion di bon uzo di nos idioma oficial Papiamentu, tanto den forma por escrito como verbal, pa medio di amplia y profundisa conocimiento di Papiamentu.
 - Desaroya un maneho y planificacion di idioma Papiamentu na bienestar di tur sector den nos comunidad na Aruba.
 - Colabora cu Corsou y Boneiro pa hunto logra fortifica posicion di Papiamentu como lenga materno riba cada isla.
 - Lo sigui duna aporte y promove nos folklore pa medio di nos musica tipico, baile di folklore, nos cumindanan crioyo y fiestanan nacional.
 - Sigui sostiene estudio y investigacion di historia di Aruba.
-

CULTURA, E HERMENT PA FUTURO

- Cultura ta e herment pa yuda construi un sociedad resiliente pa surpasa e consecuencia di e pandemia Covid 19. Nos lo sigui facilita acceso na evento y actividadnan cultural pa pueblo di Aruba y turistanan, cumpliendo cu reglanan di Departamento di Salubridad Publico.
- Nos lo duna mas oportunidad pa producto y experencianan cultural/artistico ta na disposicion di nos comunidad den forma digital y virtual. E plataforma digital ta crucial pa e sector creativo y cultural durante y despues di e pandemia actual.

BIBA SALUD Y SEA ACTIVO

6



BIBA SALUD Y SEA ACTIVO

MEP a demostra liderazgo den maneho di Covid-19. E plan nacional di vacunacion a demostra con agil pais Aruba su organisacion ta na momento di un crisis. Cu e mesun liderazgo MEP lo continua den un proximo gobernacion.



SALUBRIDAD PUBLICO

E plan nacional di vacunacion ta esencial pa garantisa salubridad publico pero tambe esencial den recuperacion di economia. MEP ta para pa promove un miho cuidu medico y un miho calidad di bida pa e poblacion di Aruba. Pa logra haci esaki realidad e unico manera tabata pa bin cu un plan nacional di prevencion riba Non-Communicable Diseases (NCD's).

E proceso pa bin cu un plan nacional di prevencion a cuminsa na november 2018 caminda a presenta un analisis di e situacion y esaki a keda discuti entre tur stakeholder. Den e analisis aki a conclui cu e causa di morto number un na Aruba ta malesanan no contagioso y e risico pa esaki aumenta ta grandi.

Datonan ta muestra cu e malesanan mas grandi cu ta causa morto prematuro na Aruba ta entre otro cancer, problema cardiovascular, diabetes, malesanan respiratorio cronico y mucho mas, tur ta NCD's

• LOGRONAN DI GABINETE WEVER-CROES 2017-2021

- Na maart 2019 a tuma luga un workshop di 2 dia caminda tur stakeholder representando diferente sector na Aruba a participa pa yega na un plan nacional.
- Pa e plan aki ta exitoso e tabata importante pa duna tur hende cu ta traha den e ramo aki e oportunidad pa duna nan input y participa activamente na e plan.
- Aruba tin su propio plan nacional multi-sectoral pa cu prevencion di malesanan no contagioso 2020-2030.
- E enfoke ta pa keda haci inversionnan den cuidado pa mehora cuidado y trata mas pashent na Aruba mes.
- Di e forma aki a converti ImSan den un di e miho centronan di radioterapia den region.
- A percursa pa inverti na hospital den interventie cardiologie.
- Inversionnan continuo a tuma luga pa por mehora nos calidad di cuidado.
- Hopi importante tabata cu porfin a finalisa e proceso di Arubig pa yiunan di tera cu studia medicina den region por wordo reconocí.
- Aruba ta e prome pais den Caribe cu tin un plan nacional di prevencion. Hopi gobierno a papia di prevencion den salud den pasado. Nos gobierno a pone den nos programa di gobernacion cu nos lo bin cu un plan nacional di prevencion p'asina yuda nos comunidad hiba un bida mas saludabel y percursa pa garantiza e sostenibilidad di e fondo di AZV.
- A logra di set up pa medio di DVG un Covid-19 bron y contact onderzoek, control di horeca, un test centrum di Covid-19, meldpunt pa Covid-19.
- A planea y logra di set up un sistema digital - Aruba Health App - cu a duna Aruba un instrumento pa monitor su turistanan y proteha salud publico, manteniendo nos calidad di servicio halto. E Aruba Health App a ser amplia pa tambe fungi como plataforma pa haci afspraak di Covid Test y e registracion pa Vacuna.
- A planea y logra di set up un test centrum na Aeropuerto cu un facilidad di 100% screening y testing.
- A planea y logra di set up e prome seguro pa Covid-19 pa tur turista na mundo cu ta bishita Aruba.
- Conhuntamente cu ATA a set up un proyecto di estimulacion di higiena cu ta e Health & Happiness code. Danki na e programa aki por a brinda un destinacion di calidad halto di higiena pa Covid-19.
- Hunto cu DVG a desaroya e proyecto di e roll out vacuna di Covid-19. Ta sigui ta responsabel pa e "vaccine roll out" programa completo interno.
- Crisisteam ta guia e transporte di vacuna na Aruba y seguridad na e localidadnan.
- A negocia cu Hulanda e cantidad y frecuencia di dosis di vacuna.
- Hunto cu DVG y Bureau Rampenbestrijding Aruba (BRA) a prepara pa cumpli cu tur e rekisitonan di Hulanda pa por ricibi e vacunan y ministerio hasta a yuda Corsou pa cu e validacion di nan vaccin freezers y a yuda St. Maarten y Saba cu converters.

- A logra pa bira e prome pais na mundo cu ta traha cu e Common Pass, un app cu ta brinda e servicio na e turista pa tin tur test valida y verifica den man y tambe tin su prueba di vacuna verifica den man. Esaki ta duna Aruba e posibilidad di verifica e turista su test of vacuna na un manera confiabel.
- A logra di maneha diferente crisis na Hospital. Di construccion, e hack y Covid pa garantiza continuacion di cuidu, door di interveni y stimula un cambio total di maneho y supervision na Hospital. Hospital awe ta hopi miho para y minister lo sigui guia e desaroyo positivo.

• PROGRAMA SALUBRIDAD PA PERIODO DI GOBERNACION 2021-2025

ACUERDO CU HULANDA (LANDSPAKKET)

- Manera palabra den e acuerdo cu Hulanda ta trahando riba e metanan di hisa e eficiencia den salubridad.
- E peticion di Hulanda pa baha gasto den cuidu, como requisito pa ricibi sosten financiero, ta encera un cooperacion entre hospitalnan den Reino.
- Esaki ta un reto hopi complica y ta rekeri negociacionnan continuo riba diferente nivel den Reino. MEP lo percura pa Aruba keda mantene y mehora su calidad di cuidu.
- A implementa un nationale zorg commissie pa tambe por studia y conseha riba e manera di maneho di gasto di cuidu na un manera responsabel.

CALIDAD DEN CUIDO

- Ta finalizando e base legal y preparacion pa institui un instituto di calidad cu lo determina e calidad di cuidu na Aruba y cu posibilidad y habilidad pa brinda e servicio aki pa e region.
- Lansamento di e app di AZV pa midi e servicio di dokternan di cas.
- E meta ta pa stimula y amplia acceso pa cuidu via plataforma digital di telemedicine local y internacional.
- A muda e Huisartsen post (HAP) di Eagle pa e New medical office building y a amplia e orarionan di servicio. Lo sigui guia e expansion di orarionan di servicio di HAP pa baha fluho y gasto di SEH.
- Conforme e vision di maneho di salud mental na Aruba a logra yega na integracion di cuidu pa esnan cu ta sufri di un malesa psiquiatrico y adiccion entre FMAA Y SPD.

OPORTUNIDAD PA YIU DI TERA DEN CUIDO


- A atende cu e landsverordening Arubig p'asina brinda oportunidad y posibilidad pa dokternan cu a specialisa den medicina den region por bolbe bek Aruba y yuda nos den e escasas di specialistanan cu nos tin. Esaki a tuma su tempo y nos ta contento di bisa cu esaki ta den su fase final pa drenta den ehecucion.
- E cambionan di e ley AruBig tambe lo haci posibel pa e basisarts cu a studia den region por continua nan specialisacion manera dokter di cas cu ta keda brinda na Aruba mes.
- A firma decreto cu ta regla organonan di acreditacion y criterianan di estudio cu ta reconoce estudionan den medicina den region.
- E decretonan aki ta regla cu banda di e registro BIG di Hulanda, Aruba ta reconoce specialismonan den medicina acredita.
- Tambe lo regla e criterianan de estudio basa riba e principio cual ta yega cerca di e sistema di educacion di Canada y hulanda y ta traha den programanan di intercambio.

EDUCACION DEN CUIDO

- Pronto tin mas oportunidad pa haci estudio di HBO den enfermeria na Aruba mes ambos na e leehuis di Dr. Horacio Hospital y Medical colleges na Aruba.

Mas apoyo y estimulacion pa e huisartsenopleiding na Aruba

- pa educa nos basisartsnan y tambe esnan di region.
- Despues di 10 aña e estudio den enfermeria den salud mental (MGZ) a inicia bek y esaki bou supervision di DVG.
- Construccion di Xavier University na Hato cu un inversion di mas di 100 mion florin y lo brinda mas luga pa cuminsa studia medicina (White coat) aki na Aruba mes.



DURABILIDAD, PREVENCIÓN Y AMPLIACIÓN DE CUIDO

- Pa prome biaha den historia tin un plan nacional di prevención, cu asistencia di tur partner den salubridad y PAHO.
- Ta finalisando e ley di Salubridad Publico, cu ta forma e base pa DVG su tarea den ramo di prevención.
- Lo bay introduci un plataforma digital pa registra indicadornan di malesanan no transmisible (Non Communicable Diseases), cu lo duna data importante pa por maneha e salubridad publico na un miho manera.
- Ta trahando riba un cooperacion entre e hermana islanan pa mantene cuidu di alto calidad, mas eficiente y pagabel.
- A implementa e ley di malesanan contagioso pa modernisa e manera di detecta y maneha malesanan contagioso.
- E ley “Landsverordening beperking tabaksprodukten” ta cla pa keda trata den Parlamento. Esaki lo ta un aporte pa prevención.
- Pa medio di e Social Crisis Plan ministerio di Salubridad hunto cu DVG a set up un FACT TEAM pa mucha y hobennan. Un number central pa meld, caminda famianan por yama y informa cu den nan famia of conocir tin un hoben cu problema mental of problema cu adiccion;
- A interveni y stimula un cambio total di maneho y supervision na Stichting FMAA cu a logra sana e mal maneho financiero y a crea estabilidad a base di cual por sigui inverti den un miho calidad di cuidu mental y adiccion.
- Lo duna informacion y stimula un moda di biba saludabel estimulando actividad fisico, un dieta balansa, salud mental bou di nos poblacion completo di baby te edad avansa. Asina nos ta traha na un Aruba mas saludable y sostenibel.



INVERSION DEN CUIDO

- A inverti den e miho centro di radioterapia di Caribe na ImSan. Un inversion di 60 miyon florin cu a crea mas di 60 cupo di trabou pa San Nicolas. E inversion aki ta aporta na durabilidad, sostenibilidad di cuidu y cuidu mas humano y cerca famia.
- A inverti den desaroyo na ImSan di un departamento 'state of the art' di oftamologia cu specialista di retina y catarata cu ta brinda servicio pa region tambe.
- A percura pa ImSan haya 22 cama pa estadia corto.
- A percura pa na Horacio Oduber Hospital (HOH) inverti pa por haci cardiologia interventivo. E inversion aki ta aporta na durabilidad, sostenibilidad di cuidu y cuidu mas humano.
- Renobacion y expansion di ImSan ta termina na November 2021.
- Lo stimula inversion di un PET/CT scan pa Aruba na ImSan.
- Esaki lo contribui na mehora e diagnostico y asina aumenta e calidad di tratamento medico pa e pueblo di Aruba en general, como tambe esun di e region.
- Aruba lo wordo señala como un Centro di Excellencia.
- Aruba lo ta e prome den regio cu lo por hasi PET/CT scan.
- Lo por detecta e señalnan mas trempan di cancer, malesa di curason y malesanan cerebral.
- Pashent lo por wordo trata mas lihe y mas eficiente.
- Aumento den e calidad y eficaz di trato di radiotherapia.
- Reduccion di gasto di AZV pa manda pashent den exterior.
- Posibilidad di Turismo Medico.
- Ta duna e medico un mihor bista di malesanan compleho systematico (complex systemic diseases).
- Ta detecta un malesa prome cu bo por wak e riba otro test di imagen (imaging tests).
- A yuda diferente instancia y scolnan cu aircu pa mehora e calidad di bida di nos grandinan y muchanan.
- Respaldo a haya un edificio nobo na Mahuma cu ta mas adecua pa cuidu di nos pashentnan.

CANNABIS MEDICINAL

- A firma e decreto ministerial pa introduci canabisiol como remedi y asina por legalisa e uzo di cannabis medicinal den cierto forma y tambe pa por duna permiso pa importa crema, capsula y azeta cu ta di CBD cu un dosis di no mas cu 0.2% di THC.
- A finalisa e cambio di e ley di Verdovende Middelen pa haci posibel pa lansa e industria di cannabis medicinal.
- A institui e Bureau Medicinale Cannabis legalmente y a apunta kwartiermakers pa guia y coordina e proceso.
- A traha y publica un peticion di interes (Request for Expression of Interest) pa midi e interes di mercado internacional pa e industria medicinal di cannabis.

INNOVACION

- A crea e aplicacion oficial cu yama “Aruba Health App”.
- DVG haciendo uzo di innovacion y tambe cu e ayudo y cooperacion di profesionalnan a diseña un tremendo aplicacion.
- Aruba Health App lo haci e proceso den Aeropuerto na yegada uno mas lihe, eficiente y placentero.
- E lo duna nos bishitantenan e tranquilidad mental door di limita e contacto directo na un minimo.
- E biahero lo ricibi e prueba di su resultado di test mas rapido.
- E lo haya informacion di salud, number di emergencia y unda mester bay den e caso aki.
- E lo haya e lista di negoshinan cu a aplica pa e “Health & Happiness Code”.
- Na momento cu e turista baha e “Aruba Health App” e lo ricibi tur e bentahanan aki p’asina e por disfruta di su estadia na Aruba cu mas seguridad.
- Pa haci e aplicacion aki accesibel pa tur hende a dicidi di pone esaki riba tur e plataformanan manera Google App, App Store y Web App.





BIENESTAR DI TUR MASCOTA

Aruba mescos cu varios otro pais rond mundo tin un problematica grandi di cacho di caya. Esaki ta debi cu no tin suficiente doñonan di mascota responsabel.

Na 2012 a revisa e Ley di Cacho existente y esaki a wordo introduci na januari 2015 pa atende cu doñonan di mascota cu no ta tene nan cacho den cura. Pero, e gobierno e tempo ey no a percura pa e condicionnan basico cu ta necesario pa e Ley di Cacho nobo por a wordo enforsa.

Por ehempel, e luga caminda cachonan por wordo poni “in be-waring” manera Ley ta stipula no a wordo crea.

Mirando cu e problematica ta hopi mas grandi cu solamente cacho riba caya a hinca a capitulo “Combati abuso di animal y solucion pa animalnan riba caya” den e programa di gobernacion 2017-2021.

• LOGRONAN DI GABINETE WEVER-CROES 2017-2021

- Petit comite: na maart 2019 a institui un comision di conseho cu a opta pa un Plan Nacional pa atende cu e maneho di e populacion di cacho, pero sin cera wowo pa e problematica di pushi.
- Actiecomite: na november 2019 a institui un comision di accion pa percura pa pasonan esencial di e Plan Nacional multidisciplinario aki wordo realisa.
- Educacion: na augustus 2019 a enfoca riba muchanan di scol basico a traves di un concurso di pintamento tocante Ley di Cacho, y na añña 2020 riba muchanan di scol primario y e klasnan mas abou di scol basico pa medio di un concurso di pinta y kleur tocante e mucha su mascota faborito.
- Ley di Cacho: na december 2019 algun ahustacion a wordo proponi na e Ley di Cacho vigente pa ehecuta e ley aki mas adecuadamente; e cambio di ley ta den fase preparatorio.
- Centro di Control di Cacho, juli 2020: cu e inauguracion di e centro aki cu ta garantiza un maneho responsabel, a elimina e mal imagen cu Aruba a hereda debi na e asina yama “kill cage” y awo si autoridadnan na Aruba por conta cu e ‘bewaarplaats’ cu ley ta prescribi.
- Stima Mi Mascota FaceBook: pareu cu e inauguracion di e centro aki a lansa un pagina social pa brinda comunidad di Aruba informacion general pa stimula actitud responsabel pa cu un mascota, pero tambe informacion tocante e cachonan cu ta wordo treci na e centro y ta buscando nan propio doño of cu ta buscando un doño nobo pa nan.
- Unidad di Control di Cacho: e meta di e unidad aki ta pa piki cachonan ambulante cu aparentemente ta sin doño y trece nan na e centro. Si en caso e cacho cu a wordo treci tin un doño, e doño por bin busca su cacho bek na e Centro di Control di Cacho cumpliendo cu responsabilidatnan stipula door di nos Ley di Cacho.
- Ekiba Bureau City Inspector pa supervisa y ehecuta e ley di cacho.
- A parte di tur esaki a yuda fundacionnan cu nan campananan di sterilisacion, cubriendo gastonan di e luga, awa, coriente, tent, etc. y tambe a percura pa aplica un impuesto mas abou riba e remedinan necesario cu a wordo importa pa realisa e tanto operacionnan aki den tempo record.



• PROGRAMA NOS MASCOTANAN PA PERIODO DI GOBERNACION 2021-2025

- Lo sigui ehecuta pasonan necesario pa e Plan Nacional por continua cual tin como meta primordial pa conscientisa doñonan riba nan responsabilidad como doño di nan mascota.
- Haci visibel cu na ful Aruba tin un ‘aanlijngedod’ y lo anuncia areanan caminda e ‘aanlijngedod’ aki no ta vigente.
- Introduccion di un number di contacto caminda preocupacionnan tocante cacho por wordo registra y atendi cu nan adecuadamente.
- Enfoca riba e database central y innovativo manera proponi.
- Traha entre otro riba reglanan pa rasa cacho.
- Enfoca riba registracion di tur cacho.
- Inculca cuida di mascota den nos muchanan a traves di material di scol.
- Lo enfoca riba adopcion y sterilisacion di mascota.
- Introduccion di un Centro di Informacion Nacional di Mascota caminda un persona cu ta interesa di busca un mascota por haya e informacion necesario pa scoge e mascota ideal cu ta pas cu e famia y e caracter di e persona (compara cu NL: Landelijk Informatie Centrum Gezelschapsdieren).
- Stimula fundacionnan pa nan sigui cu nan metanan yudando Aruba soluciona e problema.
- Evalua si ta necesario pa introduci un moratorio riba puppies.
- Amplia e Ley di Cacho pa un ley cu ta cubri bienestar di tur bestia, incluyendo pushi.
- Introduci un centro di control di pushi.
- Realisa e proyecto di TNR (trap-neuter-release) p’asina opera tur pushi na Aruba.
- Nos vision ta un Aruba caminda ta biba solamente doñonan di mascota cu ta responsabel, lagando e problematica di cacho y pushi pa olvido.



DESARROYO DEN DEPORTE

Gobernacion pa e periodo 2021-2025, tin como meta pa stimula un bida sano y activo bou di henter nos poblacion. Den e cuadro aki MEP lo enfoca riba profesionalisacion di nos sector di deporte, promocion di deporte riba tur nivel (escolar, recreativo y competitivo), mehoracion di accesibilidad di facilidadnan deportivo y conscientisacion riba e importancia di deporte pa nos salud. Hunto CU BO NOS TA AVANSA pa eleva nivel di deporte na Aruba.

• LOGRONAN GABINETE WEVER-CROES 2017-2021

- A lanza un plan nacional di prevencion cu e meta final pa mas y mas hende move y haci deporte cual a duna un resultado excelente y masivo.
- A realiza bunita proyectonan manera a.) hoben activo y feliz, b.) olimpiada escolar, c.) premio excelencia den deporte.
- A enfoca den mehoracion di infraestructura y iluminacion di nos facilidadnan y limpieza di varios veld mientras canchanan a cuminsa haya yerbe artificial (turf). Iluminacion: SC United, SC Bubali, SV Flatstone, SV Kudawecha y Caravel, Sport Centrum San Nicolas. Yerbe Artificial (Turf) : SV Kudawecha. Parke di BMX y Playground na Parke Jaburibari.
- A enfoca pa haci multiple veldnan limpi rond Aruba post pandemia pa por a restart deporte den un fase gradual y poco poco.
- A logra funda Aruba Federation Motorsport (AFM) unda Palo Marga Raceway Park a wordo destina pa e fundacion cu lo maneha Dragrace, Motorcross, Karting y Drifting.

• PROGRAMA DEPORTE PA PERIODO DI GOBERNACION 2021-2025

- Lo caba di restructura y profesionalisa Instituto Biba Saludabel y Activo (IBISA) pa e instancia aki duna mas atencion y enfoke na desaroyo di nos sector di deporte primordialmente escolar.
Prome tarea di IBISA “estilo nobo” lo ta pa formula un plan di manejo integral pa deporte cu envolvimento y participacion di tur stakeholder.
- Lo introduci un programa pa recluta boluntarionan (dirigente, referee, trainer, coach, etc.) pa stimula y sostene desaroyo di deporte en general.
- Lo introduci y traha cu un compania di Merca cu ta brinda e servicio y tin un network cu 2000 Junior College, College, Universidad rond USA cu tin programanan deportivo y ta brinda nos hobennan scholarship den diferente deporte y programa.
- Lo introduci un sistema cu e muchanan cu wordo selecta pa un of otro scholarship lo ricibi un porcentahe di ayudo di Aruba (Lotto pa Deporte) pa haci nan soño un realidad. Invertiendo den nos hobennan, banda di e oportunidad di bira un atleta profesional esnan cu no logra lo regresa cas cu un bon educacion pa sirbi nan pais.
- Lo stimula y haci inversion necesario pa haci deporte accesibel pa tur hende incluyendo gruponan special, 60 plussers y personanan cu un of otro limitacion fisico of mental.
- Lo inverti den BMX Standard Track y asina por organisa competencianan regional of centro americano. Actualmente den e deporte aki participantenan mes ta cubri 100% di nan propio gasto y ta atrae 500-800 fanaticada pa careda. Lo combina esaki cu turismo deportivo.
- Lo introduci un sistema pa recolecta tur data (scorings y stats) di tur deporte p’asina crea un data base unda historia di nos atletanan y deportistanan lo wordo balora y warda pa semper. Lo inclui entre otro CBS den e proyecto aki.
- Lo percura pa cuminsa midir cuanto placa realmente ta wordo inverti den deporte como % di GDP di pais. Lo percura pa instancia(nan) involvi desaroya e sistema aki pa den futuro deporte en general haya su fair share y desaroya nos atletanan na un manera structural pa competi den region cu exito riba nivel Centro Americano y del Caribe.
- Lo stimula y inverti pa seleccionnan di Pais Aruba bou federacionnan organisa y ta cumpli cu reglanan, por cuminsa competi atrobe den Region Centro Americano y del Caribe.
- Lo renegocia cu CBN e contract di Lotto pa Deporte, structura e manejo di Stichting Sport Subsidie Aruba y/of cambia esaki pa un otro instancia mas modernisa y lo enfoca riba un di dos posibel Lotto pa Aruba. Ley di Gaming Board a yega Parlamento unda lo aloca e cambio aki pa por logra un di dos Lotto.



PUNTONAN DI ATENCION PA REBIBA DEPORTE ESCOLAR

- Lo brinda scolnan mas material pa nan por practica deporte y movecion.
- Lo keda enfoca riba Olimpiada Escolar y promove tur scol pa participa den esaki.
- Lo keda enfoca riba prevencion y den contacto estrecho cu Departamento di salud lo promove pa siña mucha come saludabel den combinacion cu movecion.
- Lo keda stimula movimiento den tur edad a traves di entre otro caminata y tur tipo coremento.
- Lo keda stimula deporte na scol y intensifica competencianan entre scolnan y barionan.



Nos ta convenci cu e puntonan di accion cu nos a enfoca riba nan lo resulta den un bon plan di maneho cu lo sostiene y stimula sector deportivo en busca di un desaroyo positivo y continuo pa tanto nos hobennan como adultonan na Aruba.

E MOTOR MESTER DRAAI PA TIN MOVECION

7



E MOTOR MESTER DRAAI PA TIN MOVECION

MEP su vision economico ta dirigi riba crecimiento economico sostenibel. E meta no ta crecimiento riba su mes pero conecta na bienestar general di pais Aruba. E maneho economico ta dirigi riba un maneho Economico Sostenibel den cuadro di e 17 metanan sostenibel di Nacionnan Uni cual Aruba a compromete cu ne.

TURISMO

Turismo ta e pilar principal di nos economia. Pa prome biaha den nos historia nos a sinti kico e ta significa ora ningun turista bishita Aruba na momento cu nos a cera nos fronteranan aereo y maritimo. E strategianan implementa na comienso di Gabinete Wever-Croes a duna resultadonan positivo den 2018, 2019 y comienso di 2020. MEP lo continua na desaroya un producto di calidad pa turistanan. Esaki ta rekeri vision y maneho strategico.

Gabinete Wever-Croes como partner strategico a percura pa establece un maneho cu lo sigui desaroya producto Aruba a base di un maneho integral hunto cu otro sectornan manera mehoracion di infraestructura, cultura, innovacion y sostenibilidad.

MEP ta kere den un desaroyo turistico balansa y kier mira desaroyo estilo Boutique hotel. Aruba no mester mas hotel grandi sino hotelnan chikito cu un balor agrega na nos economia caminda huespednan ta laga mas placa atras den nos economia. Calidad enbes di cantidad.

• LOGRONAN DI GABINETE WEVER-CROES 2017-2021

TURISMO DI CALIDAD

- Maneho di turismo tawata dirigi riba turismo di calidad.
- A implementa un strategia di mercadeo enfoca riba turistanan afluente.
- E enfoka tabata dirigi riba e turista cu ta laga mas placa atras den nos economia.
- Pa por logra esaki mester a mercadea Aruba caminda e turistanan afluente ta.
- A enfoca riba diversificacion di nos turismo cu mercadonan nobo.

MOU AIRBNB

- Durante Gabinete Wever-Croes a percura cu desde juli 2018 Airbnb ta contribui na caha di gobierno.

INDICADORNAN TURISMO

- Añanan 2018 y 2019 tawata e miho añanan pa turismo den nos historia. Nan ta wordo considera añanan record pa turismo di Aruba. Tur e indicadornan di turismo a demostra esaki.
- E cantidad di bishitantenan stayover, e cantidad di bishitantenan crucero, e REVPAR, e ADR, e tourism receipt y grado di ocupacion tawata esun di mas halto durante añanan 2018 y 2019.
- Indicadornan crucero. Cantidad di bishitante crucero 2018: 815.161, 2019: 832.001.
- Grado di ocupacion. Aruba a keda mantene su mes como un di e miho destinacionnan den Caribe. E grado di ocupacion di hotelnan a keda solido den añanan 2018 y 2019. E ocupacion di hotelnan ta figura entre esunnan di mas halto den henter e region di Caribe. 2018: 84.6%, 2019: 84.8%.
- E ADR (average daily rate) ta e averahe di prijs di camber pa anochi cu un turista ta paga na Aruba. E indicador aki ta uno importante pasobra e ta ilustra e prijs averahe pa dia na Aruba. Por nota cu durante e periodo di gobernacion di gabinete Wever Croes nos a mira un crecemento riba crecemento di e average daily rate na Aruba. 2018: \$268.48, 2019: \$275.68.
- REVPAR ta un di e indicadornan mas importante pa midi calidad di turismo. Esaki ta e revenue per available room. Mas halto e indicador aki ta mas halto e prijs di camber di hotel pa anochi. 2018: \$227.16, 2019: \$233.89.

ISLAND FEST ARUBA

- Durante e periodo 2017-2021 a lansa e festival Island Fest na San Nicolas. Un festival diferente y di calidad caminda historia, cultura, musica, cuminda y arte ta central den e festival. Esaki tawata e festival di turismo miho bishita di ultimo añanan cu a crea hopi trafico di persona pa San Nicolas.
 - E idea tras di e gran festival aki ta pa principalmente laga e turista, nos bishitantenan, experencia y biba e herencia cultural di Aruba, hunto cu nos patrimonio. Esaki a ser haci den e miho expresion autentico posibel, manera nos isla so por ofrece.
 - Ademas, e festival aki ta sirbi di pone Aruba como un frontrunner/lider den Caribe, siendo e unico cu ta ofrece un festival cu continuidad y cu ta ofrece un demostracion di e manera cu nos ta biba den nos districtonan.
 - E festival ta fungi como instrumento pa influencia e decision di turistanan pa scoge Aruba como destinacion, mirando e experencia cu e festival ta ofrece.
-

DIVERSIFICACION TURISTICO

- A pone hopi enfasis di crea rutanen nobo pa Aruba. Asina a crea e vuelo directo cu American Airlines for di Chicago y Dallas.
 - A percursa pa vuelo directo cu American Airlines for di La Guardia, New York.
 - TUI tambe tawata tin un vuelo directo for di London.
 - Nos a percursa pa aumenta e capacidad di asientonan y tambe e load factornan.
-

INVERSIONAN DEN TURISMO

- Pa mantene Aruba como destinacion turistico riba e nivel halto cu Aruba tin y cu turistanan ta spera, a scoge pa keda inverti den varios proyecto di vital importancia pa nos turismo y nos economia.
 - Tambe a sigui haci inversionnan den embebecemento y upgrading di producto Aruba.
-

PROYECTO GATEWAY 2030

- E proyecto Gateway 2030 a continua den año 2021 y ta significa un inversion di \$150 miyon.
- E proyecto aki lo crea cuponan di trabou, lo crea entrada pa gobierno, lo stimula Aruba su economia cu mester di cje y lo contribui na un manera positivo na nos GDP.



TUGBOAT

- Aruba Ports Authority (APA) tambe a percura pa haci inversionnan continuo. Di e forma aki a inverti den compra di un tug boat nobo. Pa añanan APA no tawata dispone di un tugboat y Gabinete Wever-Croes a percura pa aloca fondonan pa e inversion aki por tuma luga.
 - E inversion di 15 milyon florin lo garantisa un bon servicio di APA na lifanan crucero.
 - Na mes momento APA a traha riba e feasibility study di PortCity. Un masterplan di entre 10-15 aña cu lo mester bira un inversion di 1 biyon florin.
-

BOARDWALK MALMOK FASE 1 Y 2

- E proyecto boardwalk Malmok por wordo considera un proyecto di signatura pa turismo.
-

EMBEYECIMIENTO NA BABY BEACH WATERFRONT FASE 1 Y 2

- E prome fase lo bay consisti di embeyecemento y ampliacion di e beach, esaki debi na e desaroyo hotelero cu tin. P'esey lo bay haci e beach mas grandi pa comunidad. Den esaki lo tene na cuenta e sostenibilidad di e parke marino.
 - Lo mehora e infraestructura, y crea espacio pa parkeo.
 - Fase 2 ta bay tin restaurantnan di clase y tambe lo bay tin kiosconan.
 - Ta bay construi facilidadnan pa nos localnan y turistanan.
 - Fase 2 lo tuma lugar unda e canchanan di tennis ta situa na Baby Beach.
 - Den e fase aki lo bay construi 2 cancha di deporte den diferente disciplina.
 - Di e manera aki ta termina e proyecto dunando ful e area aki un upgrading creando mas lugar unda nos localnan por practica deporte.
 - E vision di Gobierno ta pa stimula e economia di San Nicolas door di trece e fluho di turistanan di pabou di brug pa pariba di brug. Cu e proyectonan aki ta preparando San Nicolas pa e desaroyo cu ta na caminda.
-

EMBEYECIMIENTO BRICKEL BAY

- E trabounan pa embeyece e "highrise area" a cuminsa 9 di october 2018.
 - E trabounan ta den e area entre Brickell Bay Hotel y Hostaria da Vittorio Restaurant.
 - A embeyece e area aki cu mata, crea areanan pa parkeer, voetpadnan di klinker y instala iluminacion.
 - E trabounan aki a wordo realisa den cooperacion cu Ministerio di Infraestructura, A.T.A. y D.O.W.
-

RENOBACION DI PIER NA RODGERS BEACH

- E pier a wordo aproba den e presupuesto di Tourism Product Enhancement Fund (TPEF) di 2019 y ta cla pa inicia.


OFICINA DI TURISMO NA SAN NICOLAS

- E oficina a wordo renoba y transforma completamente haciendo uzo di hopi tecnologia y innovacion. Asina contribuyendo na e comunidad di San Nicolas.
- Awor San Nicolas ta haya bek su Oficina di Turismo cual ta fungi como e centro di informacion pa turistanan.

• PROGRAMA TURISMO PA PERIODO DI GOBERNACION 2021-2025

TURISMO

- Lo transforma e maneho di turismo enfocando pa logra diversificacion den e mesun sector turistico.
- Lo identifica hunto cu AHATA, ATA y stakeholders oportunidadnan cu no a wordo probecha.
- Lo identifica e pilarnan di crecemento den e sector.
- A continua cu un maneho dentro DVG y DEZHI cu ta duna e kader di estimulacion di desaroyo y inversion riba tereno di Turismo Medico.
- Lo desaroya Turismo Medico riba cierto area specifico.
- ImSan Aruba tin un ekipo di bestraling nobo ultra moderno.
- Lo inverti den un PET/CT scan cual lo ta e unico den nos region.
- Stimula y atrae entre otro pashentnan di tur e islanan alrededor.
- E combinacion di e dos ekiponan ultra moderno aki lo ta catalisado pa un sector nobo den turismo pa Aruba.
- Lo desaroya turismo deportivo en general.
- Entre otro enfoca y inverti riba e turista cu ta hunga golf. Eynan tin un oportunidad grandi den un mercado cu Aruba no ta probechando di dje. Tin alrededor di 77 miyon hungador di golf na USA cu ta gusta viaha pa hunga golf. Lo atrae inversionistanan pa yuda desaroya e parti aki.
- Un maneho enfoca riba Blue Economy.
- Turismo, Watersport, Marine Tourism.
- Aqua culture y pesca.
- Lo crea mas capacidad pa barconan crucero por mara na WAF. Saliendo for di pandemia, e recuperacion aki lo bay ta "booming" mientras cu ta enfoca riba e servicio di Bunker Station cual lo ta un balor agrega pa Aruba.



ECONOMIA GENERAL

Pa MEP crecimiento economico no mester ta solamente un cifra. Crecimiento economico mester tin beneficio pa esnan cu ta biba na Aruba. A base di e experiencia di Covid-19 MEP lo continua explora otro pilarnan economico pa Aruba banda di turismo. Turismo ta keda e pilar principal na cual lo traha pa e ser mas fuerte den e añanan nos dilanti. Banda di turismo lo continua na studia y analisa hunto cu sector priva oportunidadnan nobo di produccion pa pais Aruba. E resultado di esaki mester ta beneficioso pa nos hendenan y Aruba en general.

• LOGRONAN DI GABINETE WEVER-CROES 2017-2021

- A logra cu Netherlands Foreign Investment Agency (NFIA) a yuda cu un plan pa diversificacion.
- A desaroya un maneho economico Fuerte y Resiliente 2019-2022.
- A trece mas di 30 stakeholder hunto pa yuda traha un strategia pa inversion cual a carga e number di Promising Sectors.
- A logra identifica un total di 6 Promising Sectors: turismo, economia di conocemento, economia di logistica, sector primario, economia circular, industria creativo y cultural manera arte y musica.
- A logra traha un Plan Strategico Nacional "Nos Plan Nos Futuro". Pa medio di e plan aki ta guia Aruba pa logra metanan sostenibel "SDGs" di Nacionnan Uni 2030.
- A adapta e plan "Nos Plan Nos Futuro" a consecuencia di Covid 19 y a inclui accionnan di e Masterplan "Reposicionando Rumbo di nos pais".
- A logra realisa e facultad SISTEM (Sustainable Island Solutions through Science, Technology, Engineering and Mathematics) cu fondonan di inversion Europeo. Universidad KULeuven ta encarga cu e curiculo di e facultad nobo.
- A logra den cooperacion cu partnernan den Reino Hulandes pa habri mercado di transporte maritimo en busca pa importa productonan di otro paisnan.

• PROGRAMA ECONOMICO PA PERIODO DI GOBERNACION 2021-2025

SECTOR PRIMARIO

MEP su meta ta pa crea un sector primario sostenibel y duradero. P'esey mester inverti den un infraestructura moderno pa Agricultura, Cria y Pesca. Un sector primario fuerte ta crea un otro pilar economico y tambe ta diversifica nos economia.

Den cuadro di Sustainable Development Goals “SDG’s” di e organisacion di Nacionnan Uni (UNDP) y pa logra seguridad alimentario, mehora nutricion y promove agricultura sostenibel, nos mester tene cuenta cu dos obhetivo:

1. Comercialisa agricultura riba un escala mas grandi.

2. Organisa e agricultornan, criadornan chikito pa haci miho uzo di nos recursonan manera awa, coriente y suelo y alabes aplica tecnicanan moderno cu ya ta conoci y proba cu ta eficiente.

- E desaroyo aki mester ser guia estrictamente pa tur stakeholder pa asina sostene y mehora agricultura. Cu uzo di tecnologianan moderno y nobo lo duna un sosten grandi na horticultornan, agricultornan, criadornan di bestia y acuicultornan pa asina nan por mehora nan eficiencia y nan productividad.
- Di e manera aki Aruba ta haci uzo di su propio productonan y asina baha importacion y retene divisanan. Nos productornan mester traha estrecho cu nos sector di horeca, pa nan haci mas uzo di nos productonan local, di un calidad halto y ofrece un y tur cuminda autentico crioyo di calidad halto.
- E departamento di Agricultura, Cria y Pesca mester busca aliado cu centronan di investigacion den region y rond mundo. Di e forma aki Aruba ta conecta cu un base amplio di experticio y conocimiento den e sector aki y entre otro afilia na Consultative Group in International Agricultural Research, Caribbean Agricultural Research and Development Institute, Wageningen, Caribbean Israel Ventures y Universidad de la Guajira.
- Nos mester inverti den nos recursonan humano pa desaroya nos hobennan y interesa nos studentenan pa sigui nan estudio den Sector Primario. Asina nos por garantiza continuidad y sostenibilidad den e sector aki. Aparte di esaki ya caba e departamento di Agricultura, Cria y Pesca tin un gran cantidad di tereno cu nan ta cubri caba pa sostene e sector aki. Pa Aruba por garantiza calidad continuo di nos productonan local, nos mester institui un laboratorio pa por controla entre otro e calidad di nos productonan, awa y suelo.
- MEP ta comparti e pensamento di e asociacion uni di agricultornan y ta kere cu esaki ta un comienso pa por sigui desaroya e sector primario aki y ta den e plan economico cu MEP den gobierno a presenta y cu ta cumpli tambe cu varios meta di e Desaroyo Sostenibel Global manera Caba cu Hamber, Awa Limpi, Energia Limpi y Economia, Innovacion y Infraestructura, Barionan y Comunidad Sostenibel, Produccion y Consumo Responsabel y Accion riba Clima.
- Lo apoya y sostene sector priva den establece un Mercado Popular caminda e ciudadano lo por cumpra entre otro berdura y fruta na bon prijs. E mercado popular lo sostene nos pilar economico di agricultura, cria y pesca. Lo combina esaki tambe cu benta di artesanianan y cuminda crioyo. E Mercado Popular aki lo ta accesibel pa nos poblacion local y turistanan caminda lo topa otro den un bon ambiente.
- Lo continua cu e industria di Cannabis Medicinal cual lo crea un extra pilar economico den futuro pa gobierno.
- Lo percura pa promove y crea e plataformanan necesario pa nos comunidad por exporta tambe productonan cu nos ta traha of cosecha aki.



INDUSTRIA DI PESCA

- Den mesun forma cu a analisa y prepara e industria di Cannabis, MEP den gobierno lo profunda y pone un plataforma pa promocion e idea di un industria y pilar economico nobo den e area di Pesca.
- Adicionalmente e intencion di esaki ta pa atrae y genera interes, y inversion grandi den e industria aki. Meta di esaki ta pa Aruba lidera e industria aki den Caribe.
- MEP su vision ta pa avansa Aruba na un nivel nobo di economia, influencia y poder financiero.
- Actualmente Aruba ta reconoci pa ta casi 100% importador di tur loke nos mester den tur area.
- Atraves di e industria nobo aki nos lo “kibra cu e mentalidad importador,” y cuminsa cultiva un mentalidad di exportador den nos pueblo y entrepreneurs.
- Nos pasion pa innovacion lo yuda nos establece y expande e industria di Pesca cu lo por exporta pa mundo henter, y asina conecta Aruba cu Mercado y ingresonan cu antes tabata imposibel pa nos.

INDUSTRIA CREATIVO Y CULTURAL

- MEP lo introduci y sostene Aruba su Economia di Patrimonio, Creatividad y Recreacion economico – “Aruba’s Outdoor Amenity, Creative & Recreational Economy program”.
- Esaki ta un Programa di maneho cu ta coordina varios Ministerio y nan departamentonan, pa asina hunto traha riba mehoracion y innovacion di nos Patrimonionan como atraccion y alabes genera un actividad economico recreativo y creativo rond di nan. Aruba tin Patrimonionan Natural, Historico, Geologico, Monumental y Social Comunitario.
- E programa di maneho ta inclui inversion den mehoracion di e Patrimonionan pa atrae mas bishitante tanto local como turista y alabes mehora e calidad di experiencia durante e bishita.
- Lo traha den e mesun pensamiento aki na atraccion di Universidad di Arte aki na Aruba. E Academianan aki ta creciendo exponencialmente globalmente den nan popularidad y necesidad mirando con tecnologia y media ta cambiando.

ESTIMULO FISCAL

- Aruba su recuperacion economico ta rekeri un revision di e sistema di impuesto pa un sistema mas simpel y husto cu ta permiti cumplimiento, ta reduci perdida economico y ta sostene e modelo economico nobo. E transicion previsto di impuesto directo pa indirecto, tambe lo apoya un miho modelo di finanzas publico sostenibel y desaroyo economico.
- Pa maximalisa e beneficienan di un modelo di belasting nobo, lo aplica un maneho fiscal inclusivo cu ta encera consulta cu stakeholdernan. Pa sigura un sistema di belasting husto, caminda tur hende ta contribui cu nan “fair share” di impuesto, obediencia di impuesto mester ta mehora adelanta door di inversion den innovacion.
- Pa yega na un modelo di impuesto moderno, analisis adelanta ta rekeri pa sigura un sistema integra cu e incentivanan corecto for di estimulo corecto na midi cu ta mehora e clima di inversion, atrae Foreign Direct Investments (FDI) y permiti modelonan responsabel di medio ambiente y economia circular.
- Lo introduci estimulo fiscal di inversion pa incentiva comercio local pa inverti den nos economia.

ECONOMIA CIRCULAR

- MEP lo continua cu e ideanan riba e tema di economia circular. E intencion ta pa forma parti di un plataforma di Economia Circular na unda profesionalnan di diferente disciplina ta reuni pa yega na solucion y metodo con pa haci cambio di un economia linear manera nos conoce awa pa un economia circular di cual nos futuro lo bay depende di dje.
- Lo traha pa trece e conferencia di American Sustainable Development Foundation Aruba.

REDUCCION DI COSTO DI BIDA

- Manera cu a ser indica den plan di gobernacion 2017-2021 e Canasta Basico cu tabata consisti di 11 producto a ser amplia pa 22 producto. E 22 categorianan di producto aki ta inclui 1.200 producto cual nan prijs ta wordo regula y controla pa Gobierno tur luna.
- E App Control di Prijs via cual e consumidor por haya tur informacion tocante e prijs di e productonan cu ta wordo regula pa Gobierno lo ser promovi mas den e periodo di gobernacion nos dilanti.
- Hunto cu esaki lo continua publica e Macuto di Compras cu ta keda publica tur siman den cual tin un comparacion di prijs di alrededor di 25 producto cu no ta regula na 10 supermercado.
- Tambe por haya tur e informacionnan aki riba Facebook Page Departamento Economico. Cu e informacion aki e consumidor mes por haci comparacion di prijs y dicidi na unda e ta bay haci su compras.
- Lo evalua ampliacion di canasta basico cu productonan sostenibel.

RED TAPE

- E eliminacion of reduccion significante di e red tape ta contribui na eficiencia eleva, cual por refleha den e funcionamiento economico, induci cu fluho improvisa di FDI y creacion di negoshinan nobo. Esaki por eleva tambe e produccion general y permiti alineacion di mercadeo financiero improvisa.
- Recientemente un estudio independiente haci pa Amsterdam Economisch Bureau hunto cu Sofiris a conclui cu Aruba tin e miho clima di inversion den Caribe. Esaki ta debi na e economia habri, e nivel di prosperidad y nos institutonan fuerte.
- Tin varios accion concreto inclui den e Masterplan y acuerdo cu Hulanda cu ya a inicia caba entre otro e proceso digitalisa di pidi y ricibi permiso na Departamento di Asuntonan Economico. Esaki ya caba a contribui na e proyecto aki cu un impacto positivo halto pa crea un miho ambiente di negoshi.
- Gobierno lo continua su maneho facilitador. E cadena DIP- DOW-DWJZ-Economische Zaken-Polis-Brandweer-DVG interno lo wordo modernisa na un manera cu peticionnan no por dura mas cu 30 dia (MAX 30). Lo reuni cu Notaris y Banconan pa drecha e proceso aki cu nan cooperacion pa asina procesonan por cana rapido.

ESPIRITO EMPRESARIAL

- MEP den gobierno ta sigui sostene Aruba Trade Board como plataforma di consulta pa fortalece e competitividad di haci negoshi na Pais Aruba. 'Aruba Trade Board' ta un iniciativa di Departamento di Asuntonan Economico cu a start na aña 2017 y ta un accion den e Plan Strategico Nacional 2020-2022 cu tambe a wordo inclui den e Masterplan 'Reposicionando e Rumbo di nos Pais'.
- MEP lo sigui apoya e proyectonan "Kidpreneur\$ with BIG Ideas" y "Kid\$ BIZ Market".
- Lo sigui duna San Nicolas un atencion special tanto den e centro medico ultra moderno unda lo desaroya turismo medico y tambe proyectonan Eagle LNG.
- Lo acerca European Investment Bank (EIB) pa asisti cu creacion di un fondo pa "underserved entrepreneurs".
- Lo enfoca riba stimula concurrencia sano den sector comercial, cu lo resulta den servicio y productonan di miho calidad y na prijsnan mas abou.



ENERGIA COMO FUENTE ECONOMICO

E direccion cu MEP den gobierno a busca den e plan di maneho aki, ta un maneho balansa. Un maneho unda ta pone e ser humano central, unda ta aporta na nos economia y unda ta aporta na medio ambiente y mitigacion di cambio di clima. Den esaki pa gabinete Wever-Croes, un di e puntonan di mas importante ta cu e metanan energetico mester ta realistico y responsabel. E sector di energia tambe ta un sector vital, un infraestructura critico, cu ta afecta e funcionamiento di nos economia y nos sociedad. Aruba mescos cu resto di mundo den e ultimo añanan a busca alternativa pa energia cu ta depende di petroleo. Generando asina e diversificacion di nos economia, cu ta asina necesario, generando miles di cupo di trabou, generando divisas, cu ta fortifica nos balansa di pago y nos moneda, cu ta reduci costo di bida, cu reduccion di tarifa di coriente y awa, y mes momento cumpli cu e condicionnan internacional pa cu cambio climatico.

HISTORIA COMO BASE

- Na aña 2004 nos compania di utilidad WEB NV a inicia un proyecto pa baha e dependencia riba fuel oil, e proyecto innovativo di ‘Reverse Osmosis’ pa produci awa y e generadornan RECIP pa produci coriente.
- Na 2009 e parke di Molina di “Vader Piet” a drenta den funcion.
- Na aña 2017 e parke solar riba tereno di refineria “Sunrise SolarPark” a drenta den funcion.
- E esfuersonan aki conhunto a percursa pa 18% di energia alternativo pa Aruba.
- E buskeda a sigui pa por yega na un porcentahe mas halto di energia alternativo, cu no ta causa molester ni peliger pa salud di hende, y cu no ta causa un impacto negativo riba medio ambiente. Pero principalmente, cu ta pagabel pa cada ciudadano.

• LOGRONAN DI GABINETE WEVER-CROES 2017-2021

HISTORIA COMO BASE

- Gabinete Wever-Croes, desde principio, a dicidi di recalibra e maneho di energia di pais Aruba, en bista cu e vision anterior, 100% green na 2020, tabata totalmente irealistico, y no tabata wordo sosteni pa tur stakeholder.
- Gabinete Wever-Croes pa medio di un proceso transparente y hunto cu tur stakeholder importante di sector priva, companianan di utilidad y NGOs a logra alinea stakeholdernan pa duna compromiso na un vision comun pa Aruba. E proceso aki a cana e ultimo dos añanan den diferente plataforma y cumbre.
- A presenta e plannan di energia na IMF na 2019; a traha den un comision di energia pa e Plan Strategico Nacional (NSP) na 2019.
- A organisa dos cumbre nacional di energia na 2019 (Energy Summit I & II) y un na 2020 (Energy Summit III), na unda a delinea e puntonan principal di e maneho.
- A traha den un comision di siguridad di energia pa e Masterplan “Reposicionando rumbo di nos pais”.
- A haci un “National Energy Policy Review” di september pa november 2020 unda a ricibi comentarionan valioso riba e nota di maneho, y den e cumbre na december 2020, a afirma e metanan energetico (“energy goals”) cu a stipula den e “Maneho Nacional di Energia 2030”.
- E proceso extenso aki a culmina den un maneho integral, realistico y balansa di energia nacional, cu nunca antes tabata existi, y cu ta carga sosten di tur stakeholder.
- E vision y maneho di energia pa Aruba ta delinea den e documento “Maneho Nacional di Energia 2030”, cu tin como vision segura acceso na energia pagabel (affordable), confiabel (reliable), y limpi (clean) pa tur ciudadano di Aruba, companianan y bishitante.
- E maneho ta alinia Aruba cu e metanan internacional pa combati cambio climatologico y cu e Acuerdo di Paris.
- Pa cumpli cu esaki lo tin cu baha e emisionnan cu 45% prome cu 2030 y pa esey yega na un nivel di 50% di energia renobabel prome cu 2030.
- No obstante, estudionan ta wordo haci pa mira si un ambicion mas halto ta factibel, pues pa logra un porcentahe mas halto di energia renobabel prome cu 2030. Si esaki resulta factibel den un forma responsabel, lo nos ahusta nos metanan energetico na nivel di Gobierno tambe.

PRIJS DI AWA Y CORIENTE

- Aparte di e “Maneho Nacional di Energia”, Gabinete Wever-Croes a enfoca tambe riba e ciudadano humilde. Esfuersonan pa reduci tarifa di awa y coriente a bira un realidad.
- Entrante 1 di januari 2020 tarifa di energia a baha pa residencia cu 10%, pa scol y misa cu 9% y pa comercio cu 7%.
- Tarifa di awa pa cunukero a baha entrante 1 oktober 2020 cu 40%.

REFINERIA Y/OF OTRO DESARROYO

- Desde cu Gabinete Wever-Croes a sinta, esfuersonan a cuminsa pa yega na reapertura di e refineria. E refineria aki ta hopi importante pa nos economia. Hopi hende ta puntra con un refineria ta pas den un vision di energia limpi.
- Locual MEP ta buscando awor ta pa tin un reapertura di e refineria unda cu e impacto ambiental ta wordo minimalisa. Pues, pa e refineria wordo opera mas limpi manera cu LNG of energia renobabel y asina logra un desaroyo economico den harmonia cu medio ambiente.
- Hopi trempan a bira obvio cu esaki lo no logra cu Citgo. Pues e esfuersonan a dirigi nan mes na terminacion di e contract cu Citgo. Dia 30 di april 2020 a termina contract cu Citgo despues di negosacionnan intenso.
- Mesora a cuminsa e buskeda pa otro operador, na forma transparente. Dia 18 juni 2020 a cuminsa un destaho publico pa busca otro operador, cu a wordo publica den medionan di comunicacion local y internacional.
- Dia 31 di juli 2020 a clausura e destaho, y un comision independiente a continua negosacion cu e interesadonan, y a evalua e proposicionnan.
- Dia 28 di november 2020 a entrega e propuestanan na gobierno.
- Dia 7 di december 2020 Refineria di Aruba NV (RdA) a cera acuerdo di intencion cu Quanten LLC, pa e rehabilitacion y operacion di e refineria, y Eagle LNG, pa industria di LNG.
- Negosacionnan ta andando cu ambos.





• PROGRAMA ENERGIA PA PERIODO DI GOBERNACION 2021-2025

- Durante periodo di gobernacion nos dilanti di Gabinete Wever-Croes, pa por logra e vision di energia y maneho di cambio di clima (climate change), tur stakeholder lo traha hunto pa realisa e siguiente metanan principal di e maneho nacional.
- Enfatisa un maneho responsabel di energia, cuminsando na reduci e uzo di energia den e departamentonan di gobierno, y ubicacion di panelnan solar na scolnan y amplia e proyecto aki pa edificacionan di gobierno.
- Aplica metanan nacional cu ta den cuadro di e Acuerdo di Paris pa mitiga cambio di clima y e meta di Nacionnan Uni pa limita 'global warming' na 1.5°C.
- Reduci emisionnan di CO2 cu por lo menos 45% pa 2030 y hisa e porcion di energia renobabel na por lo menos 50% pa 2030.
- Lo sigui explora hunto cu stakeholdernan un ambicion mas grandi pa decarbonisacion di un forma mas acelera, como parti di e proceso di implementacion di e maneho nacional.
- Aki lo haci investigacion cual ta e 'mix' di diferente forma di energia renobabel cu ta funciona optimalmente pa Aruba, pa asina yega na realizacion di e metanan 2030 talbes mas trempan. E 'mix' mester reduci gastonan di awa y coriente inmediatamente, y no por tin un impacto negativo riba nos comunidad.
- Crea un bon balansa entre naturalesa, medio ambiente y economia.

ENERGIA RESIDENCIAL

- Reduci tarifa residencial di awa y coriente, na momento cu WEB bay over na liquid natural gas (LNG) en bes di heavy fuel oil (HFO).
- Introduci un areglo social real pa tur cu ta den necesidad, specialmente esnan cu ta biba di onderstand, a traves di un areglo di cooperacion entre Utilities Aruba NV y Departamento di Asuntonan Social.
- MEP ta convenci cu e solucionnan aki ta esnan mas sostenibel, mirando cu e ta un forma di energia limpi, y na mes momento ta pagabel pa cada ciudadano, y pues sostenibel.
- Cu esaki MEP lo logra reduci costo di bida. Lo crea, promove, implementa y incentiva produccion y uzo di energia alternativo cu ta limpi pero alabes mas barata cu lo cual nos ta paga awor aki.

DESARROYO PETROKIMICO

- E meta ta pa logra reapertura di e refineria.
- Renoba y reconstrui e refineria di Aruba, pa despues logra su reapertura, agregando ekiponan nobo y haci uno moderno y sostenibel.
- E refineria a wordo traha pa e crudo Venezolano, pero e vision ta pa renoba e instalacionnan di tal forma cu e ta bira mas versatil y asina por busca otro tipo di crudo.
- E mision ta pa crea un refineria cu ta mas eficiente posibel y ta uza e tecnologia mas moderno, cu ta permiti e operacion draai constantemente cu un impacto ambiental mas chikito posibel.
- E meta ta pa establece un facilidad di LNG banda di e refineria, cu por suministra gas na e refineria y na WEB, pa asina baha e costo di produccion di tanto e refineria como WEB.
- Ademas lo exporta gas pa paisnan den region.
- Den futuro lo expande e servicionan di bunker pa suministra liquid natural gas na barconan di carga y barconan crucero.



TRANSPORTE Y COMUNICACION

Riba un isla di mas o menos 110.000 habitante y un cantidad di mas cu 70.000 vehiculo, transporte mester ta bon regula pa tin un fluho constante den trafico y pa evita tardansa y congestionamento. Regulacion di transporte publico tambe ta un parti esencial cu mester wordo regula di tal forma cu e ta accesibel den tur bario y na un prijs economico. Pa logra esaki transporte publico tambe mester ser adapta y mehora pa por tin transporte accesibel den tur bario y na un prijs economico. Pa logra esaki transporte publico mester ser adapta y nos leynan di transporte publico mester wordo modernisa. Tambe mester reorganisa y reforsa e departamento di transporte publico (DTP) pa sirbi e interes di e usarionan maximalmente.

MOBILIDAD INTERNO

- Den cuadro di un reforma completo den transporte ta necesario un plan di movilidad unda mester di input di tur stakeholder pa presenta un plan integral, cu den futuro lo sirbi como e guia pa mehora y reglamenta transporte publico en general.
- Desaroya y publica un maneho coherente pa otorgamento di permiso den transporte publico.
- Lo haci un estudio hunto cu e plan di movilidad pa por introduci sistemanan nobo den transporte publico y introduccion di app nan moderno den transporte.
- Arubus mester hunga un rol grandi na momento di introduccion di un plan nobo pa transporte publico.
- Arubus mester prepara pa e cambionan den e era digitalisa. Aplica y ricibi carchi di bus den forma digital. E carchinan aki por ser carga y recarga digitalmente.
- Tur informacion pa e usuario regardando busnan den servicio lo ser manda via un app , por ehempel cambio di ruta, cancelacion di servicio y orario.
- E bentahanan di uza e app nan digital ta cu e disponibilidad pa e chauffeurnan via e app ta mehora e manera pa pidi transporte.
- E tempo di espera pa un medio di transporte publico yega cerca e usuario lo bira hopi cortico.
- Esnan cu tin disponibilidad di un app ora di biaha den exterior por haci uzo di e app aki tambe.
- Na e momento cu bo pidi e servicio aki ya caba bo ta haya un indicacion di e prijs y por paga cu tarheta di credito tambe.
- Un otro bentaha ta cu bo por laga bo famia of amigo sa durante e biahe na unda bo ta cada momento.

MARITIMO

- Den reino a ser firma recientemente un protocol di cooperacion entre e cuatro paisnan, Hulanda, St. Maarten, Curaçao y Aruba.
- E acuerdo aki lo sirbi pa mehora e intercambio di conocimiento y cooperacion den e sector maritimo den reino.
- E acuerdo aki ta asisti nos pa prepara conhuntamente pa e IMSAS audit 2022 pa cumpli cu e areglonan di International Maritime Organization (IMO).
- Prome cu e audit aki e departamento maritimo (Directie Scheepvaart) lo reorganisa y fortifica su estructura di organisacion, pa asina cumpli cu e areglonan internacional y alabes cu su tareanan local.



AVIACION

- AAA NV lo sigui cu su plannan di expansion y mehoracion pa asina nos por duna un servicio di calidad halto tanto na nos bishitantenan como na nos localnan.
- Departamento di Aviacion Civil ta ehecuta entre otro e ICAO Correction Action Plan, Continuous Monitoring Approach y e No Country Left Behind.
- Tambe lo implementa e State Safety Program, e ICAO Global Aviation Safety Plan y e Global Air Navigation Plan segun e tratado di Chicago.
- Procesonan di automatizacion lo sigui y lo modernisa aparatonan cu ya mester ser reemplasa.
- Un plan pa reorganisa e departamento lo ser ehecuta pa pasa pa un identidad huridico nobo cu lo duna e departamento aki su autonomia financiero tambe.

TELECOMUNICACION

- E departamento di Telecomunicacion (DTZ) lo introduci e implementacion di tecnologia 5G.
- Esaki ta encera cu mester haci cambionan na e diferente aparatonan pa por controla usarionan.
- DTZ lo ehecuta banda di e 5G e Internet Over Things y television digital.
- Lo investiga e consecuencianan di tecnologia moderno, e Next Generation Networks, pa e mercado di telecomunicacion y pa e regulador.
- Lo intensiva inversionnan den IPTV, (Gigabit) internet, fiber y su infraestructura mobiel. Lo continua den 2022 cu e implementacion di e sistema 5G.
- Ta percura pa desaroya nos compania di telecomunicacion den un proveedor di ICT y alabes continua cu e digitalisacion di e compania.



DERECHONAN A BASE DI IGUALDAD

8



HUSTICIA

Criminalidad na Aruba y na mundo henter ta evoluciona continuamente. Crimen organisa mas y mas tin acceso na tecnologia avansa. Riba nivel local ta riparabel cu ta necesario pa husticia traha riba metodonan innovativo y riba prevencion pa logra mas siguridad na Aruba. Un colaboracion mas estrecho entre diferente departamento di gobierno y cu sector priva ta e yabi pa nos logra esey. Esaki door cu siguridad na Aruba tin influencia directo riba nos economia y tambe nos turismo.

Durante periodo di Gobernacion di Gabinete Wever-Croes, hopi trabao a wordo haci pa logra controla criminalidad y na mes momento fortifica e cadena Hudicial. MEP den siguiente gobernacion lo finalisa e trabounan cu mester a para pa duna prioridad na e maneho di pandemia, y lo enfoca riba algun tema specifico pa Husticia

LOGRONAN DI GABINETE WEVER-CROES 2017-2021

- E punto di mas importante pa Gabinete Wever-Croes durante e ultimo añanan tabata pa garantiza bek seguridad na nos fronteranan. Y pa e motibo ey a reintroduci radarnan y helicopter. Dos instrumento esencial cu a percura pa eleva seguridad.
- A percura tambe pa introduci un Academia di Ley pa por entrena huristanan den tecnica di traha ley p'asina modernisa nos leyman anticua. Actualmente tin alrededor di 20 persona cu ta atende e academia di Ley.
- E area turistico y comercial den coordinacion estrecho cu sector hotelero y comercial, a conoce atrobe e concepto di "tourism police", p'asina por tin contacto cu e turista y e turista por sinti su mes mas sigur.
- A aproba ley di aumento di castigo pa abuso sexual di menor. Esaki mirando e impacto cu maltrato y abuso sexual di menor y hende muhe, tin riba comunidad y e consecuencianan traumatico pa e victima y famia.
- A introduci e "Social Crisisplan" cual a conduci cu hopi proyecto den KIA, CPA, y Reclassering por a tuma luga p'asina fortifica e aspecto di prevencion y atende den un periodo mas trepan cu problemanan social. Asina a evita cu personanan a bira "cliente" di CPA of KIA.
- A introduci un uniform nobo pa Cuerpo Policial Aruba. E ta un uniform cu pa hopi tempo polisnan tabata anhela. Un uniform hopi mas practico y segun e polisnan mes esaki ta hopi mas comodo pa nan trabou diario.



• PROGRAMA HUSTICIA PA PERIODO DI GOBERNACION 2021-2025

- Reforma e structura y diversificacion di economia. Esaki por sosode solamente si tin un regulacion y strategia robusto, moderno y transparente pa sostene esaki.
- Adresa e problema di e capacidad pa traha leyman mester ta un prioridad. Bon leyman por contribui pa acelera recuperacion economico, crecimiento y sosten na e modelo economico nobo.
- Riba termino mediano y largo, reforsa e capacidad di legislacion local, combina cu desaroyo di capital humano.
- Conforme acuerdo lo reenforza e estado di derecho, fortalece e seguridad di nos fronteranan fortificando Kustwacht y Aduana, incluyendo actuacion mas severo contra criminalidad financiero economico pa medio di cooperacion mas estrecho entre Recherche samenwerkingsteam, Landsrecherche, Kustwacht y Koninklijke Marechaussee y mehoracion di nos institucionan di detencion.
- Inverti den e aparato Hudicial e proximo añanan. Pa por implementa un maneho exitoso ta importante pa enfoca riba henter e cadena Hudicial y tur “stakeholder”.
- Un maneho di Husticia cu ta tene cuenta cu (1) integralidad, (2) participacion, (3) continuidad Hudicial, (4) inteligencia y informacion como e parti esencial pa combati criminalidad.
- Brinda tur esnan cu ta traha den e cadena Hudicial e material (persoonlijke uitrusting), curso nan necesario y percua pa traha na drecha e posicion huridico di e trahadornan.

ATENCION PA PERSONAL DEN HUSTICIA

- Inventarisa tur departamento Hudicial (Guarda Nos Costa, Cuerpo di Bombero, Cuerpo Especial Arubano, Cuerpo Policial Arubano, Instituto Coreccional Nacional, IASA) riba kico ta e materialnan basico cu falta.
- Introduci un “meerjaren planning” pa evita cu tur aña tin e problema pa personal, cu nan no ta haya e materialnan basico cu ta necesario pa nan por eherce nan tarea na un manera sigur.
- Atende cu tur reorganizacion cu ta andando pa hopi aña y percua pa no tin retraso den asuntonan cu ta trata posicion huridico cu personal. Esaki a base di un proyecto, cu lo wordo “outsourced” y cu participacion firme di tur sindicato.
- Independisa nos academia di Husticia y na mesun momento haci inversionnan necesario den tecnologia y innovacion, p’ asina garantiza un sistema di formacion (opleiding) cu un bon fluho di “bevordering”.



INTEGRALIDAD DEN HUSTICIA

- A base di maneho integral lo percursa pa fortifica e aparato husticial di Aruba. Asina ta evita cu cada departamento ta traha riba nan mes. Na mes momento ta brinda tambe e oportunidad na personal di diferente departamento pa roulee entre departamentonan Husticial. Asina evitando cu ta perde experticio y experiencia den e cadena Husticial.
- Pa logra esaki nos academia di Husticia tin un tarea importante. Pasobra ta a traves di curriculum integral solamente por garantiza esaki. E enfoque di nos academia di Husticia lo ta uno, caminda e instituto independisa lo no solamente brinda programanan na e cadena Husticial, pero na ful e sector publico y tambe na sector priva (security, leadership Customer Service).

PARTICIPACION DEN HUSTICIA


- Participacion di sindicatonan ta esencial den e vision y maneho di Husticia.
- Empuhe pa prensa investigativo por haci nan trabou riba cierto topiconan di interes general (onderzoeksjournalistiek). Esaki for di e creencia firme den e poder di prensa pa loke ta controla y haci investigacion a base di codigo di prensa.

CONTINUIDAD DEN HUSTICIA

- Lo introduci un directorado fiho di Husticia. Di e forma aki por garantiza continuidad di proyectonan, rebaho di gastonan, depolitisa e Ministerio di Husticia.
- Establece un Ministerio cu den tur aspecto ta wordo guia pa informacion y conocimiento.

INTELIGENCIA Y INFORMACION DEN HUSTICIA

- Lo percursa pa finalisa e proyecto entre departamentonan pa loke ta acceso na informacion y comparti informacion. Di e forma aki, a corto plaso, lo percursa pa tur departamento por traha mas eficiente y eficaz pa combati tur tipo di criminalidad. Na mes momento por brinda miho servicio tambe na cada ciudadano.
- Lo introduci “tablets” den tur auto di polis, pa asina eleva e seguridad di cada polis pero tambe pa mehora e servicio cu por brinda na cada ciudadano.
- Lo introduci y activa e proyecto di camara combina cu un “real time intelligence center” cu ta forma parti di e departamento di informacion di Cuerpo Policial.





“HIGH IMPACT CRIMES”

- Prioridad ta keda pa combati fuertemente e tipo di delitonan cu ta afecta e ciudadano mas hopi. Esaki ta e crimennan di impacto grandi manera: (1) atraco (2) ladroncia den cas (3) ladroncia di auto (4) maltrato y violencia domestico (5) corrupcion y (6) abuso sexual.
- Pa loke ta combati corrupcion, cual practicamente tur ora tin un componente financiero na dje, lo enfoca riba “financiële opsporing”. Y den cuadro di esey lo inverti den e experticio aki na Ministerio Publico, Departamento di Impuesto y Cuerpo Policial.
- Tambe lo introduci e base legal pa “non conviction based confiscation”. Di e forma aki un intento serio ta wordo haci pa combati corrupcion.
- Despues di a consulta cu tur stakeholder manera, “Orde van Advocaten”, poder Hudicial, Ministerio Publico y Cuerpo Policial riba e tematica di abuso sexual, nos por conclui cu e parti mas importante pa logra castigonan halto ta e evidencia. Y pa bo por garantiza bon evidencia bo mester inverti den e departamento di Cuerpo Policial pa conocimiento riba e area di colecta evidencia.
- Banda di esaki tambe lo bin programanan di prevencion cualnan tambe lo contribui na menos delito cu ta afecta e ciudadano.
- Lo amplia e departamento di “Jeugd en Zeden Politie” cu tur e profesionalnan necesario pa garantiza cu na cada momento un victima por wordo atendi.

INSTITUTO PENITENCIARIO PA HOBENNAN

- Lo adapta e proceso pa construccion di un KIA nobo, incluyendo un instituto penitenciario pa hobennan y esnan cu mester di cuida psicologico. Den cuadro di esaki lo introduci un concepto innovativo pa un KIA nobo, den su forma structural y operacional.
- Transforma KIA y convirti'e den un sistema di prison progresivo den cual e rehabilitacion, reeducacion/formacion y reintegracion di esnan cu ta sali liber ta e prioridad. Di e forma aki por disminui e casonan di recidivismo enormemente.
- Lo introduci un tratamiento obligatorio den KIA pa esnan cu wordo encarcela pa un acto di pedofilia, di e forma aki ta yuda elimina e problema cu ta existi den e personanan aki.
- Lo studia e posibilidadnan pa introduci un sistema di libertad condicional pa esnan cu tin un bon comportacion y cu ta encarcela pa un crimen cu no ta un “high impact crime”. E personanan aki lo ricibi un tracking device na nan enkel pa asina por tin control riba nan. Esaki lo haci cu gastonan di e pais ta baha, e individuo ta reintegra den sociedad y e control ta keda.



MANEHO MIGRATORIO

MEP como principio ta kere den derecho igual pa tur ser humano, pa trece unificacion di nos Pueblo y NO segregacion. Aruba ta un Pais cu a wordo forma a traves di varios decada pa migrantenan cu a bin for di tur skina di mundo y hunto cu nos Arubianonan a construi nos Pais. Integracion ta keda e yabi pa crea un comunidad harmonioso y respetuoso di tur nacionalidad na Aruba.

Desde prome cu nos Status Aparte nos a habri nos fronteranan pa trahadonan di exterior bin duna nos un man den desaroya nos economia. Sinembargo debi na e cifra halto di desempleo actual, e maneho pa otorgamento di prome permiso lo ta mas estricto, esaki ta pa proteha e mercado laboral pa esnan cu ya ta biba na Aruba.



MANEHO MIGRATORIO MAS HUMANO, PERO ALABES MAS CONTROLA.

- Implementa un maneho pa integracion di tur esnan cu a scoge pa bin biba y traha na Aruba, den fase, acopla na cada prolongacion di permiso.
- Nos idioma Papiamento, nos cultura y custumbernan mester ta e base pa cada un participa y forma parti di nos comunidad.
- Nos norma y balornan tambe mester bira parti di e maneho di integracion.
- Lo pone enfasis riba programanan di integracion y na mes momento brinda sosten den traduccion di cartanan y splica procesonan.
- Lo realiza un plan pa logra un integracion exitoso, cu proyectonan multicultural y di estimulacion di formacion personal duna den nos Centronan di Bario.
- Proceso pa aplica pa permiso y pa pasaporte mester bira mas transparente, den cual sosten lo wordo brinda door di un centro di apoyo.
- Pasonan lo ser tuma pa encamina e cambio di e test di idioma pa naturalisacion, mirando cu e idioma Hulandes ta dificil pa esnan cu ta papia Spaño. Alabes lo plantia den cuadro di Reino Hulandes pa cambia e ley di nacionalidad di Reino Hulandes bek na local e tabata prome cu aña 2011, na unda un persona cu ta den proceso pa haya su naturalisacion por a scoge pa haci su examen na un di e lenguahenan oficial di Reino Hulandes, cualnan ta Fries, Hulandes, Ingles y Papiamento.



PERMISO, ADMISION, INTEGRACION

- E proceso di permiso lo bira uno mas transparente y e departamento mester por contesta e cliente (un si of un no) den no mas cu 4 siman.
- E proceso pa otorgamento di e prome permiso lo wordo revisa pa asina tin un control estricto den e casonan aki.
- Otorgamento di prome permiso ta acopla na cuponan di trabao vacante, despues di a haci tur esfuerzo pa yena e cuponan aki prome cu personanan cu ta bibando na Aruba caba.
- E proceso pa prolongacion di e permiso lo wordo adapta y agilisa, y lo cambia den cierto casonan na prolongacion un bes den cada dos aña. Aki ta wordo pensa na casonan cu e circunstancianan a keda igual y mesun doño di trabao.
- Lo introduci un maneho nobo riba integracion, unda cu e permiso lo ta mara na un plan di integracion. Aki pues tambe mester cambia e ley di admision.
- E permisionan di corto duracion lo mester ser procesa y emiti dentro di un siman, pa e departamento encarga cu labor y esun di admision y lo no por ser prolonga.
- Tramitadonan lo mester wordo certifica pa un comision forma pa departamentonan di Economia, Labor y di Integridad di gobierno.
- Cu e licencia aki e tramitado lo por haci tramitenan.
- E mesun comision aki tin e autoridad pa revoca e licencia aki, si constata maluzo di e licencia, cu of sin denuncia.
- Control na pia di trabao sin embargo lo ta den man di Departamento di Inmigracion, Guarda Nos Costa y Cuerpo Policial (“toezicht/rechtshandhaving”).
- Admision di turista y posibel prolongacion di admision como turista, lo ta den man di Departamento di Inmigracion.
- Lo bini cu cursonan intensivo y cu ekiponan necesario pa upgrade aun mas e personal di inmigracion y e control na nos hafnan y na Aeropuerto.
- Alabes lo agilisa e proceso di prolongacion riba estadia turistico, awo cu tecnologia moderno lo procesa esaki den tres (3) dia di trabou.

PREVENCIÓN Y SOLUCIÓN

9




PREVENCIÓN Y SOLUCIÓN

Un desarrollo óptimo de un país se ve estimulado por la creación de familias resilientes, flexibles y estables. Estas familias, con la guía de normas y valores saludables en el hogar y en la comunidad, crecen y florecen en un equilibrio y responsabilidad. El Manejo Social de un país se suma a la importancia y estimula a cada ciudadano y cada familia aquí en Aruba para sentirse mejor. Este conocimiento se basa en el documento Social Analysis del Departamento de Asuntos Sociales (DAS, 2017) que realizó un estudio de datos del Censo 2010, donde se indica que Aruba se enfrenta a un reto serio en el terreno social. La situación de Covid-19 desde el inicio del 2020 se ha empeorado más aún la situación social.

El Gobierno tiene como tarea proporcionar a las familias vulnerables, que no se encuentran en condiciones óptimas, una ayuda oportuna y proteger a las familias y comunidades vulnerables.

El Gobierno interviene ahora y mira a ciertas familias y grupos vulnerables que no se enfrentan a ciertos retos de vida. También el gobierno interviene si hay crisis social en las familias, violencia, hambre, negligencia y otras formas de abuso y maltrato. Es aquí donde se interviene a través de subsidios e instancias privadas, que se encargan de ayudar a las familias vulnerables y a los ciudadanos en su vida diaria. El Gobierno de otro lado también tiene la tarea de crear programas para sostener a las familias de una forma directa también. Así se logra empoderar más, pero no se sigue funcionando bien en nuestra sociedad y se necesita un apoyo adicional.



• LOGRONAN DI GABINETE WEVER-CROES 2017-2021

- Leynan y Codigo di Proteccion a wordo desaroya pa protega y duna siguridad na nos mucha y hobennan.
- Entre 2020 y 2021 a traha riba desaroyo di diferente ley pa aumenta e siguridad di nos mucha y hobennan. Ta trahando riba e Ley di Creche cu lo keda cla na juli 2021.
- A traha riba implementacion di un Codigo di Proteccion pa mucha y hoben. E ley aki a bin na vigor na 2021.
- Tambe a duna tur e profesionalnan den e cuater sectornan un training pa nan por uza e codigo mas eficiente y traha na un forma mas integral.
- A traha riba introduccion di un ley di Plan pa e muchanan na momento cu e mayornan divorcia.
- Ta den proceso pa lanta un Departamento pa Mucha y Hoben na 2021 pa garantisa y salvaguardia cu e leyman y e tratadonan di mucha ta aplica. Esaki lo tuma luga den un forma di evaluacion periodico y structural.
- Den e periodo aki a enfoca pa implementa y realisa e vision pedagogico na Aruba. E vision pedagogico ta duna concretamente seis instrumento con pa educa yiu na un manera balansa y sigur.
- Siguridad na e lugarnan unda nos mucha y hobennan ta acudi ta wordo crea door di duna debido atencion na e conductonan y e señalnan cu mucha y hoben ta duna, ora e no ta sinti su mes sigur. Na e momento ey nos mayornan y e profesionalnan mester actua. Mester crea siguridad na cas, na scol y na cada instancia unda nos muchanan y hobennan ta presente.
- Den 2019 a habri den cuadro di Social Crisis Plan (SCP) un centro pa mucha y hobennan special di 24 ora di cuidu compleho y intensivo y un centro di 24 ora di vivienda pa mucha y hobennan special aki na Aruba.
- Na 2020 a habri e Centro pa Hoben y Famia unda na un manera hopi accesibel ta enforsa y train e habilidadnan di e mayornan pa por educa nan yunan mas sigur. Aki ta traha cu alrededor di 15 partner p'asina duna tur servicio pa mayor bou di un solo dak.
- Na 2019 y 2020 a efectua 4 proyecto, unda a guia e mamanan soltero pa subi tereno laboral y drecha nan situacion socio-economico.
- Lo lanta na 2021 un Family Justice Center unda Jeugd en Zeden Politie lo bay traha man den man cu Ayudo Social y Psicologico bou di un dak, p'asina atende e casonan di violencia y negligencia contra mucha y hobennan.
- Den e centro aki lo por brinda ayudo integral p'asina segura un trato inmediato y safe pa e mucha. Tambe lo traha miho na acumula evidencia p'asina e casonan bay miho funda na Ministerio Publico (OM).
- Den e cuadro aki a ehecuta un estudio piloto bou di 8 scol na Aruba pa cu un Collaborative Partnership, unda ta traha na resolve e problemanan social di e muchanan na scol.
- Trainingnan di personal di Centro pa Hoben y Famia cu ta duna atencion na e aspectonan aki. Tambe ta enfoca riba e trainingnan intensivo di Heartcentered Leadership Foundation cu ta yuda e hobennan haci cierto escogencianan consciente den bida.

• PROGRAMA SOCIAL PA PERIODO DI GOBERNACION 2021-2025

E EFECTONAN SOCIAL

MEP ta apoya Ministerio di Asunto Social cu a formula e siguiente metanan strategico social:

- Lo traha na hisa resiliencia den e famianan vulnerabel aki na Aruba y na haci e famianan aki mas resiliente contra crisis social.
- Lo traha na activa e participacion social di e famianan vulnerabel na Aruba.
- Lo traha na crea un sentido di responsabilidad colectivo den cada barío y distrito na Aruba.
- Lo traha na hisa e bienestar di e famianan y e ciudadanonan vulnerabel aki na Aruba.
- Lo traha na e bienestar general y participacion activo di e gruponan vulnerabel, manera nos grandinan, nos muchanan, nos hobennan y nos gruponan special.

NOS METANAN DI MANEHO STRATEGICO

- MEP kier activa e resiliencia, e participacion social, e sentido di responsabilidad comun, e propio iniciativa y flexibilidad di e famianan vulnerabel na Aruba.
- Nos servicionan lo ofrece ayudo social na e famianan vulnerabel y na un momento trempan p'asina crea mas resiliencia y nan habilidad pa resolve y evita e problemanan social den futuro.
- A base di locual e urgencianan social di e famia vulnerabel ta lo haci uzo di diferente servicio material y inmaterial cu e meta pa empodera e famianan aki y haci nan mas resiliente.
- E servicionan social, manera guia social y guia psicologico, lo ofrece na e famianan y ciudadanonan vulnerabel ayudo cu e meta pa nan por yuda nan mes y participa mas activamente social den nos comunidad.
- Lo traha na activa e iniciativanan den barío y e districtonan pa yuda otro, yuda famianan vulnerabel y crea e barionan, unda tin bienestar general, siguridad y unda ta convivi bon cu otro y tin un sentido colectivo.
- Lo traha na surpasa e retonan social ocasiona pa e pandemia di Covid-19 den 2020 den e famianan vulnerabel na Aruba.
- Lo traha activamente pa e derechonan di e ciudadanonan vulnerabel ta protehi.
- Lo traha activamente na inclusion di e gruponan vulnerabel den nos comunidad, manera nos grandinan y nos grupo di hendenan special.
- Lo traha hunto cu otro departamento y instancianan aki na Aruba p'asina resolve e problematico social na un forma mas integral posibel.
- Lo monitor e gruponan di riesgo halto social den nos sociedad y busca e solucionnan pa mitiga e riesgonan.

MANEHO MATERIAL

Lo traha na revisa y actualisa e leyman y maneho di bijstand existente a base di estudio den poblacion p'asina haci e leyman aki actual y vigente na e desaroyonan den comunidad. Traha y actualisa maneho social a base di discusion cu e poblacion cu ta ricibi bijstand y nan necesidadnan:

- Lo traha na formula y evalua e gruponan di riesgo den bijstand y mitiga esakinan.
- Lo traha na haci e diferente servicionan di bijstand automatiza y digital, pa esnan cu no tin esaki disponibel lo traha kiosk pa duna e servicio.
- Lo traha na desaroya e ley di bijstand pa gruponan special den un ley separa.
- Lo traha na monitor y evalua mas frecuente e situacion social di gruponan di riesgo halto y vulnerabel den nos comunidad.
- Hunto cu DPL, DAO y Plataforma di Trabou ('Aruba kier traha') lo traha na crea trabou pa e gruponan vulnerabel y ekipa nan miho pa mercado laboral y yuda drecha nan situacion.
- Lo traha conhuntamente cu e Plataforma di DPL, DAO y Enseñansa pa Empleo p'asina sondea posibilidad pa mehora e situacion y maneho di bijstand y busca trabou.
- Ofrece guia na clientenan vulnerabel pa evita e situacionnan di insolvencia y otro situacion indesea socialmente.
- Lo haci uzo di e medianan social pa keda den contacto cu e gruponan vulnerabel y duna aporte y guia den nan situacion.

MANEHO INMATERIAL: GUIA SOCIAL & GUIA PSICOLOGICO

- Lo traha na optimalisa e servicionan di Guia Social y Psicologico p'asina haci esakinan mas accesibel pa publico.
- Lo traha riba e wachtljstnan cu tin actualmente hunto cu Departamento di Enseñansa y diferente gerencia di e scolnan y lo cuminsa traha na e problemanan social na e scolnan di mucha y hoben den un programa nacional ('Collaborative Partnerships').
- Hunto cu Departamento di Salubridad Publico lo studia e posibilidad pa drecha e situacion social y psicologico di e grandinan, e gruponan special y otro gruponan vulnerabel den comunidad.
- Lo evalua tur servicio inmaterial pa wak si ta cumpli cu e exigencianan, e necesidadnan y e retonan actual den comunidad.

NOS HENDENAN SPECIAL

- MEP su vision pa nos hendenan special ta un di Inclusion.
 - Lo enfoca pa sostene e persona special den henter e ciclo di bida.
 - Desde nacemento, cu cuidu y sosten pa mayornan.
 - Enseñansa, mas inclusivo posibel cu atencion debido na e alumno special.
 - Labor, cu sosten y guia, mas inclusivo posibel.
 - Vivienda, cu apoyo y acceso na edificionan, teniendo cuenta cu e necesidadnan special, por ehempel rolstoel.
 - Cuidu di grandinan poniendo atencion na e necesidadnan special.
-



NUCLEO FAMILIAR

- Fortifica e nucleo familiar y conscientisa famianan pa traha tempo pa e bida familiar, pasobra famia ta e base di nos comunidad.
- MEP den gobierno lo percura pa consolida tur esfuerso y atencion y lo duna prioridad na atende e problemanan social. Den e cuadro ey lo crea un Departamento di Famia, bou di cual lo pone e asuntonan di e muchanan, e hobennan, e hende muhernan, e famianan, y nos grandinan pa atende cu e problemanan social mas eficiente.
- E Departamento di Famia mester ta capacita y tin amplio experiencia pa traha riba diferente aspecto, por ehempel restauracion den matrimonio, conscientisacion, entrenamiento y coaching den tur area di famia. Esaki mester sosode den barionan pa responde na e necesidadnan urgente y trece solucion.
Yega na un convenio cu e instancianan concerni pa crea un programa pa integracion familiar teniendo na cuenta e constelacion familiar.
- Lo introduci “Plan di Mayor” obligatorio pa mayornan cu ta bay divorcia/separa. Esaki lo encera cu palabracionnan concreto y efectivo ta ser haci regardando e criansa y responsabilidadnan comparti pa nan yiunan.



NOS HENDENAN DI TERCER EDAD

Mirando e “vergrijzing” di nos comunidad, mas atencion mester wordo duna na cuido di nos grandinan, y e importancia pa yuda crea resiliencia cerca nan.

- Lo bin cu campaña nacional “Nos hende Grandinan Prome” caminda cu den departamentonan di gobierno e ciudadano 60+ lo haña trato preferencial den servicio.
- Un “Raad voor Ouderen” lo ser institui y e secretariado lo ta na Sociaal Economische Raad (SER).
- E organo aki lo conseha gobierno riba topiconan y impacto di decisionnan riba e ciudadano 60+.
- Lo introduci programanan special pa bienestar fisico y financiero di nos grandinan. Lo stimula centronan di bario pa programa actividadnan pa nos hende grandi.
- Enfasis lo ser poni ariba calidad di bida di nos grandinan. Programanan special dirigi riba estado di animo, autoestima, stress, ansiedad y depresion lo ser introduci.
- Lo tin programa special conocimiento basico digital (digital literacy) pa e ciudadano 60+
- Varios workshop innovativo specialmente pa e ciudadano 60+.
- Percura pa ofrece programanan practico y innovativo na adulto aplicando un bon andragogia y stimula educacion pa bida na e adultonan.
- Stimula pa nos hendenan di tercer edad ser involvi como voluntario cu un compensacion razonabel den diferente sector.
- Inverti den centronan di informacion y documentacion y invita nos grandinan pa ta participe den expansion di nos capacidad pa haci investigacion y educa riba tereno di arte y cultura.
- Lo stimula construccion di casnan special pa nos hende grandi caminda por garantiza nan seguridad y tranquilidad mental.



INCLUSION

Aruba, manera tur pais y sociedad rond mundo ta inclui ciudadanonan cu un gran diversidad di personanan. E diversidad aki ta ser demostra den diferente aspecto manera edad, sexo, rasa, religion, preferencia sexual, habilidad mental y/of fisico, posicion social, educacion y origen di nacionalidad.

Den e filosofia cu e ser humano ta central, MEP tin e meta pa crea un sociedad cu ta mas husto pa tur. Esaki a guia e maneho durante e gobernacion 2017-2021. Ta importante den e siguiente gobernacion pa sigui implementa e vision di e ser humano ta central y sigui desaroya un maneho unda cu ta mehora e calidad y nivel di bida di nos ciudadanonan sin importa e distincionnan cu ta existi. Lo stimula sinergianan den e diversidad entre nos ciudadanonan pa asina reforsa nos sociedad y economia. Di e forma aki e reparticion di e crecemento economico di Aruba ta mas husto.

INCLUSION 2017-2021

- Bou di presidencia di Minister President a institui un comision multidisciplinario pa promove inclusion den henter e ciclo di bida di e persona.
- Desde nacemento, cu sosten y guia pa mayornan.
- Pa cu enseñansa, adapta pero inclusivo.
- Riba tereno laboral, inclusivo, cu guia si tin mester.
- Riba tereno di cuida.
- E comision a atende cu varios tema, mas tanto riba e tereno di enseñansa.

INCLUSION 2021-2025

- E vision di e ser humano ta central ta traha cu e meta cu tur miembro di nos comunidad por hiba un bida digno y tin oportunidad pa desaroya su mes di un forma positivo p'asina por ta un miembro productivo di nos sociedad.
- E poder di diversidad por ser probecha solamente ora nos tur ta reconoce y aprecia e diferencianan y respeta y balora cada miembro sin distincion.
- E diferencia di entrada entre genero por ehempel ta pone presion riba sociedad y nos economia, y ta pone tension innecesario entre miembronan di nos comunidad.
- Den contraste, haciendo miho uzo y probecho di e diferencianan, lo nos por crea un sociedad cu miembronan mas satisfecho den nan propio bida cu ta sinti nan mes balora y alabes mas comprometi cu nan mes y cu e bienestar general di tur.
- Den e maneho aki tin atencion special pa esnan mas vulnerabel, cu mester di sosten, den e proceso pa inclusion.
- E aspecto di inclusion y diversidad ta uno hopi amplio y ta cuminsa cu cambio den pensamiento cu mester catalisa un maneho integral.
- Cuminsando na e maneho di gobierno, incluyendo tambe sectornan no gubernamental y sector priva.
- Gobierno tin e tarea den su maneho pa stimula e pensamiento y maneho aki como tambe crea un ambiente pa implementa mecanismonan cu ta yuda crea e “win-win” pa tur.
- Inclusion ta e meta, riba varios tereno, entre otro, educacion, cuidado di salud, labor, social, economia, finanzas publico, deporte, husticia, comunicacion, transporte, legislacion y tecnologia.





MANEHO DI GENERO Y EMPODERACION DI HENDE MUHE

Avanse den logra igualdad di genero y empoderacion di e hende muhe ta un pilar fundamental di derechonan humano. Pa Aruba por sigui progresa y recupera di e crisis ocasiona pa Covid-19 y reactiva economia, e ta crucial pa implementa un plan strategico, un cuadro institucional y un maneho nacional di genero ('National Gender Policy'). Igualdad di genero y participacion di hende muhe y mucha muhe den tur aspecto di nos sociedad ta clave pa promove desaroyo economico inclusivo, acceso na educacion, eleva calidad di bida di nos comunidad, y sigura estabilidad politico na termino largo.

Prome Minister Evelyn Wever-Croes ta e prome hende muhe cu a wordo elegi den e funcion aki na Aruba y e enfoko di su maneho ta pa pone e ser humano central, cu atencion especial riba eradica tur clase di discriminacion contra hende muhe y mucha muhe. Covid-19 a demonstra cu nos grandinan y hende muhenan ta e gruponan cu mas a wordo afecta pa e crisis.

Pa e motibo aki den tur programa nacional y di maneho mester sigui enfoka riba e rol importante di e hende muhe, p'asina nos no perde tur e avansenan cu nos a logra den e ultimo generacionnan riba e lucha di empoderacion di hende muhe. Nos mucha muhenan y hende muhenan ta innovativo y creativo, y tambe resiliente y pues lo hunga un rol crucial den e transformacion di nos economia y desaroyo sostenibel di nos pais.

Desde comienso di gobernacion di Gabinete Wever-Croes ya caba a tuma pasonan significante hunto cu stakeholders clave pa desaroya un vision comun y crea recursonan necesario pa por implementa un maneho nacional di genero.

LOGRONAN DI GABINETE WEVER-CROES 2017-2021

COLABORACION CU NACIONAN UNI RIBA MANEHO DI GENERO

- E esfuersonan di Gabinete Wever-Croes pa stimula un maneho integral di genero a resulta den un acuerdo cu Nacionnan Uni ('UN Women Multi-Country Office-Caribbean') pa sostene e trabounan di e Comision di Genero ('National Gender Steering Committee') cu a wordo instala den comienso di 2020 pa desaroya e Maneho Nacional di Genero (National Gender Policy) na Aruba.
- E detayenan di e programa di colaboracion cu Nacionnan Uni ta den pleno desaroyo y ta basa riba e siguiente obhetivonan strategico cu lo forma e fundeshi di e Maneho Nacional di Genero:

1

Institutionalisa cuadro di maneho y implementacion strategico y coherente pa promove igualdad di genero y empoderacion di hende muhe.

2

Provee guia y hermentnan necesario pa integra aspectonan di genero den institutonan publico cu un base multi-disciplinario.

3

Consientisa comunidad riba e importancia di igualdad di genero y empoderacion di hende muhe pa desoroyo sostenibel di Aruba.

4

Elimina normanan social tradicional, actitudnan y custumbenan cu ta encurasha y permiti consideracion di e rol di e hende muhe como uno inferior.

STIMULACION DI PARTICIPACION DI MUCHA MUHE DEN STEM

- Gabinete Wever-Croes a sostene y facilita diferente iniciativa exitoso cu ta enfoka riba estimulo di participacion di mucha muhe den ramo di ciencia, tecnologia, ingenieria y matematica ('STEM') y asina inspira nos mucha muhenan di un edad hoben.
- Entre otro a organisa diferente coding camps, innovation camps y otro programanan educacional innovativo cu enfoke di participacion (igual) di mucha muhe.
- Den contexto di e masterplan di resiliencia y recuperacion "Reposicionando e Rumbo di Nos Pais" tambe a inclui accionnan clave pa empoderacion economico di e hende muhe.
- Contraaresta e posicion vulnerabel di hende muhe cu a resulta di Covid-19 y encurasha nan participacion completo y contribucion na e proceso di recuperacion economico.
- Stimula y inverti den innovacion y entrepreneurship, incluso financiamento innovativo (p.e. micro loans)
- Desaroya hende muhe den IT como un mercado niche.



• PROGRAMA DI GENERO PA PERIODO DI GOBERNACION 2021-2025

MANEHO DI GENERO Y EMPODERACION DI HENDE MUHE

- Cu ayudo di Nacionnan Uni, lo finalisa y implementa e Maneho Nacional di Genero, cu lo ta un maneho transformativo y lo tene entre otro e proximo metanan den consideracion den e periodo 2021-2025.
- Alineamento y coherencia cu constitucion ('Staatsregeling') y leyman di Aruba, y metanan den e Plan Strategico Nacional (NSP) pa realisa e metanan di desaroyo sostenibel di Nacionnan Uni, particularmente SDG 1, 3, 4, 8, 16, y 17.
- Consistencia cu tratadonan of conveniennan internacional.
- Promocion di igualdad di genero y proteccion di derechonan di hende muhe y mucha muhe.
- Adresa impacto di pandemia di Covid-19 cu atencion special riba e impacto riba hende muhe.
- No laga ningun hende atras ('Leaving no-one behind') pa sigura cu tur ciudadano di Aruba wordo trata igual cu respet y ta liber di tur clase di discriminacion.
- Eradica tur clase di violencia a base di genero.
- Facilita y encurasha participacion di hende muhe den politica, liderazgo social y economico, y den desaroyo di maneho nacional.
- Eleva seguridad economico y kibra bareranan structural cu ta impedi e participacion completo di hende muhe den e forsa laboral y elimina posibel diferencia den salario y entrada ('wage and wealth gap').
- Empodera hende muhe y mucha muhe y stimula participacion den ramo di ciencia, tecnologia, ingenieria y matematica ('STEM').
- Adresa e necesidadnan di cuidu di famia (muchanan y dependientenan).
- Promove educacion y conscientisa riba e tema di igualdad di genero na scol y na cas, y particularmente cu e ser masculino.
- Facilita y stimula estudionan riba igualdad di genero y e situacion di hende muhe na Aruba a base di datos pa crea maneho innovativo.



MERCADO LABORAL Y AUMENTO DE PRODUCTIVIDAD

Modernización y actualización de ley de trabajo, no obstante un impacto inmediato de acción a término corto, no por sí misma es como un ejercicio de un mes. Flexibilización de ley de trabajo debe determinar en paralelo con alineación de su posición legal con la fuerza de trabajo del sector público y la fuerza de trabajo del sector privado y reducción de los gastos salariales del sector público. Junto con esto también lo contrario a la economía informal y el empleo ilegal. También el desempleo de largo plazo de nosotros hubiese sido mejor forma parte de un plan de reforma.

Con el cuadro de un acuerdo con Holanda ya se analizó integralmente al inicio de su terreno aquí para por identificar la onda y los puntos de atención que deben ser puestos. En el momento en que se hizo de esto un completo lo acerca al sindicato y representantes del sector privado para junto yega a un mihi adaptacionnan para el mercado laboral con lo que mejor contribuyeron a un desarrollo económico más fuerte.

La pandemia causó un impacto enorme en la comunidad y el comercio de Aruba. Desde el 13 de marzo de 2020, miles de personas inicialmente se quedaron sin trabajo de entrada. Gracias a la Fundación de Asistencia Social de Emergencia (FASE), combinada con el otorgamiento de subsidio de salario y el apoyo financiero a las compañías pequeñas y medianas para evitar el desempleo masivo como también con los negocios que se quedaron operacionales.

La pandemia sigue teniendo una oportunidad para diseñar el mercado laboral que nos da a Aruba, para una economía fuerte y resiliente. Ahora más que nunca nos debemos preocupar por una economía que contribuya a una calidad de vida para todos y que cree y proporcione el trabajo que es necesario.

• LOGRONAN DI GABINETE WEVER-CROES 2017-2021

- Aumento salario minimo dos biaha te na AWG 1.815,35.
- A elimina ontheffing y a hiba maneho di trahado, profesional y contratistanan local prome.
- Reduccion di desempleo te na 5.2% te ora cu e crisis di COVID a bati na nos porta.
- A institui e Dialogo Tripartiet Social Laboral unda cu sector comercial, laboral y gobierno a bin hunto pa tuma decisionnan importante pa Aruba.
- A institui y formalisa Dialogo Tripartiet Social Laboral (DTSL).
- Introduccion di diferente programa pa guia hendenan (na comienso specialmente tienermoeders) pa dreña (bek) mercado laboral.
- Diferente job fair exitoso caminda a logra yuda trahadonan haya trabou.
- Introduccion di FASE

• PROGRAMA MANEHO LABORAL PA PERIODO DI GOBERNACION 2021-2025

- Mehora e maneho di mercado laboral. Nos ta consciente cu ainda tin varios asunto riba e mercado laboral cu no ta cana bon.
- Traha un maneho nacional di empleo hunto cu su plan di accion, teniendo bon na cuenta nos mercado laboral actual, ki mercado laboral nos ta desea y ki ta e desaroyo y maneho economico actual y proyecta pa futuro. Mas cu claro tin cu tene cuenta tambe cu tur e retonan cu e pandemia a trece cu ne. Unabes esaki ta stipula lo por cuminsa traha riba revision di nos leyman laboral.
- Un maneho mas activo pa yuda nos hendenan haya trabao, specialmente den caso cu ta un persona cu bijstand. Alabes lo sigui implementa y amplia programanan dirigi riba inclui mas hende muhe den mercado laboral. Lo combina esaki cu “omher-, of bijscholing”.
- Crea un plataforma di cooperacion entre sector publico y priva pa traha riba posibilidad di empleo y desaroyonan necesario riba nos mercado laboral.
- Trece bek estabilidad y tranquilidad riba mercado laboral. Mes momento lo sigui enfoca riba aumenta productividad.
- Traha riba e recuperacion gradual di salario di nos trahadonan. Manera economia cuminsa recobra su forza lo yega bek na coreccion nacional di entrada di nos trahadonan, tanto den sector publico como sector priva.
- E punto di salida cu empleo mester ta na prome lugar pa nos hendenan local, pues tur hende cu ya ta biba na Aruba. Principalmente na e momentonan aki hopi hende a perde trabou of entrada. Pero si no tin hende local, anto mester yega na proceso y proceduranan pa atrae trahadonan di exterior cu ta miho controla, menos complica y mas transparente.

- Crea condicionnan structural y duradero pa evita perdida di empresa y cupo di trabao y cu mester genera mas inversion pa nos pais y crea mas empleo. Empleo digno, decente y cu oportunidad igual pa homber y muhe, cu salarionan husto cu ta supera necesidadnan basico.
- Bienestar di e trahado, siguridad, pago, tempo di sosiego y vacacion. MEP ta constata cu ainda tin hopi incumplimento cu nos leyman laboral. P'esey lo pone como prioridad e parti di inspeccion di cumplimiento cu nos leyman laboral.
- Introduccion di cambionan pa mehora e posicion di e clase trahado na Aruba caminda lo percursa pa siguridad di trabao y/of proteccion di continuidad di trabao. Ta di suma importancia cu garantianan den ley den cuadro di continuidad di trabao ta keda vigente.
- Fomenta cooperacion y percursa pa e cuadro legal den cual e doño di trabao y trahado ta dialoga pa por yega na acuerdonan di condicionnan di trabao progresivo na bienestar di nos economia.
- Un papel mas activo di Departamento di Labor y DPL den brinda asistencia na empleado, specialmente esnan cu haya nan den un conflicto laboral y ta core riesgo di keda sin trabao, pero tambe pa yuda esnan cu ta buscando of kier cambia di trabao.
- Introduccion di TIO (Tijdelijke inkomensondersteuning) na luga di FASE mientras ta traha riba introduccion di un estructura permanente den forma di Ley di Beneficio di Desempleo (werkloosheidswet) cu simultaneamente lo crea un red di seguridad social.
- Reformacion y recapitacion personal y profesional di nos forza laboral pa aumenta nan posibilidad pa yega na un trabou. Nos lo introduci e programa "Aruba Kier Traha". E crisis ocasiona pa e pandemia a trece cambionan inespera di un forma acelera den nos mercado laboral. Hunto cu e cambionan aki a bin e necesidad pa un proceso di reorientacion, reformacion y recapitacion profesional (her-, om- en bijscholing).
- Esaki tin como meta pa stimula integracion di nos hendenan sin trabou bek den mercado laboral. Logicamente cu un hende sin entrada lo no tin ni e manera ni e tranquilidad pa participa den un proceso di reformacion y recapitacion. P'esey TIO t'ey, cu lo duna nos hendenan e tranquilidad di un entrada mensual pa finalmente por integra nan mes den mercado laboral garantizando nan un trabou digno atrobe.
- Introduccion di e trayecto di Asesora cu Saneamento di Debenan (ASD) cu lo mester yuda nos conciudadanonan cu e proceso di saneamento di debenan personal acumula den e periodo di COVID-19. E iniciativa aki, combina cu TIO y despues e Ley di Beneficio di Desempleo mester asegura un futuro social nobo pa henter nos pueblo.
- Eliminacion di desigualdad na pia di trabou y a base di posibel futuro desaroyo economico lo stimula e hende muhe pa studia y traha den e sector di industria.
- Introduci posibilidad pa traha menos ora, pero sin perde derechonan secundario. Experiencia den otro pais a demostra cu esaki a contribui na aumento di productividad.
- Mehoracion di e posibilidadnan pa trahadonan hoben y esnan di edad 50+ por subi mercado laboral. MEP lo aplica incentivanan fiscal pa dunadonan di trabou cu tuma e personanan aki den servicio y inverti den nan educacion of recapitacion.
- E maneho di empleo lo ta pa stimula dunado di trabao pa duna cursonan di educacion of recapitacion na nan personal.
- Introduccion di un "Stichting van de Arbeid" den cuadro di mehoracion di e posicion di e clase trahado, na unda doñonan di trabao y trahadonan lo dialoga riba un base regular, hancra den ley, pa yega na acuerdonan di condicionnan di trabao progresivo.
- Introduccion di un "Raad van Onderwijs en Arbeid" cu tin cu percursa pa un mihor conexion entre nos enseñansa y nos mercado laboral.

INFRASTRUCTURA SOSTENIBEL DESARROYO PA FUTURO

10



INFRASTRUCTURA SOSTENIBEL DESARYO PA FUTURO

Infraestructura y desarrollo territorial estructura ta condicion pa desarrollo di un pais. Partido MEP den Gabinete Oduber 4 a introduci den 2009 e ley di Ordenansa Teritorial di Espacio (ROP Ruimtelijke Ontwikkelings Plan 2009). Cu e introduccion di e ley aki nos a enfoca e problemanan fisico den forma integral y multidisciplinario. Cu un plan di ordenansa teritorial lo stipula unda por permiti actividad economico, unda ta traha cas, unda ta proteha naturalesa, unda por traha hotel y cual beachnan mester wordo proteha. Den e plan aki a purba di haya un balans entre actividad economico, social y espacial.

Meta di e vision di Partido MEP ta pa evita actividadnan conflictivo den barío y sigura calidad di bida. Pa por logra esaki lo mester ekipa y optimalisa tur e departamentonan cu ta di importancia pa logra esaki.



• LOGRONAN DI GABINETE WEVER-CROES 2017-2021

- E prome ROP di Aruba a wordo publica na aña 2009 y a caduca na 2019. Gabinete Wever-Croes a opta pa traha un ROP nobo, ROP 2019. A inicia e trayecto na juli 2018 hunto cu conseheronan di RHO Adviseurs.
- A institui un “Raad van ruimtelijke ontwikkeling” cu tin participacion di entre otro ATIA , ADIAA, AHATA, Flora en Fauna Commissie, Aruba Birdlife Conservation, y hunto cu otro stakeholdernan, DEZHI, Santa Rosa, DOW, DLV, Stichting Monumentenfunds, Monumenten Bureau y stakeholdernan externo, NGO’s manera ABC, Stichting Rancho, KVK, ATIA.
- A organisa diferente sesion pa yega na e ROP 2019.
- Conforme ley e proceso a sigui na 2010, unda cu a institui comisionnan.
- A revisa diferente nota y conseho.
- A aplica un proceso transparente di duna informacion y trata e obheccionnan y puntonan di bista di ciudadano y empresanan.
- A traha e ROPV nobo, cu a wordo aproba na maart 2020. Na e momento aki e ta na Raad van Advies pa conseho.
- A cuminsa cu e esfuersonan pa elimina e lista di espera di ciudadanonan cu a aplica pa un tereno pa construi cas.
- A logra te na e lista di espera di 2014. Debi cu no tin hopi tereno mas disponibel, e proceso lo ser profundisa.
- Ta buscando tur forma pa yuda esnan cu tin hopi aña ta warda pa tereno, pa logra yega na nan cas.
- Pa prome biaha den historia di pais Aruba, tin un desaroyo hotelero na Colony. A pesar cu e pandemia mundial Covid a causa hopi retraso, e proyecto lo cuminsa na mei 2021.
- A cera convenio pa traha casnan social. 14 na San Nicolas, 36 na Tanki Leendert, 12 na Santa Cruz y 12 na Hato.



• PROGRAMA INFRAESTRUCTURA Y DESARROJO TERRITORIAL PA PERIODO DI GOBERNACION 2021-2025

SOSTENIBILIDAD

- Restruktura desaroyo di infraestructura y ordenansa teritorial den cuadro di e ROP 2019/ ROPV.
- E ROPV ta accesibel on-line pa tur ciudadano por mira kico ta e posibilidadnan y kico ta e condicionnan, aplicando asina e maximo grado di transparencia.
- No tin duda cu e ROPV ta hisa e calidad di un pais, unda cu bo por planifica y ordena un pais su infraestructura estetico.
- Den esaki a tene cuenta cu nos flora y fauna marcando zonanan restringi pa diferente parha y otro animal.
- Lo habri mas plan di parcelacion particular pa yuda nos ciudadanonan yega na nan cas y pa stimula nos economia.
- Introduccion di maneho build with nature y "aanlegvergunning" pa garantisa cu ta tene cuenta cu e aspecto di naturaleza y medio ambiente. Esaki ta encera e.o. cu tur e kraternan coba na Aruba lo ser sometidos na regulacion y lo pasa pa pasado.
- Alineamento di maneho cu e 'sustainable development goal's (SDG).
- Legalisacion di structuranan actual (actualisa e mapa) cu pa añanan no a pasa.
- Zonificacion ta wordo introduci oficialmente na Aruba, zonanan special pa compania, industria, residencia etc.
- Pone un maximo na camber di hotel pabou di brug, y pariba di brug.
- Introduccion di un proceso di otorgamento di tereno comercial basa riba e maneho economico "promising sectors".
- E identidad di Aruba a wordo salvaguardia, a identifica areanan di Aruba cu ta mantene nan estado natural of actual.
- "Landmarks" a wordo identifica, incluyendo rooi y dam importante pa e retencion di awa di Aruba.
- Viabilidad ("leefbaarheid") di e pais ta wordo mehora, cu introduccion di un ROPV.

ELIMINA BUROCRACIA ("RED TAPE"):

- E listanan di espera pa midimento di tereno, pa otorgamento di tereno, pa cambio di destinacion, pa prolonga erfpacht, pa permiso di construccion lo wordo elimina gradualmente, y esaki lo crea un desaroyo economico cu e fin di crea cupo di trabao.
- Automatiza procesonan na departamentonan di infraestructura , manera DLV, DIP, DNM, DOW, DTI pa logra mas eficiencia den e departamentonan. Mas transparencia y coherencia den e procesonan, y finalmente un miho servicio na cada cliente.
- Adapta e maneho pa otorgamento di tereno pa facie mas efectivo y transparente pa e ciudadano, teniendo na cuenta cu nos espacio pa duna tereno ta limita, brindando e ciudadano mas opcion pa por yega na su cas.
- Importante den esaki ta pa pone enfasis riba integridad di e procesonan, pa crea confiansa bek di e ciudadano den e departamentonan.
- E periodo pa trata cada peticion ("doorlooptijden") lo wordo limita na maximo 3 luna, dentro di cual periodo e cliente mester a haya un contesta riba su peticion. Esaki mester bira posibel ora e retrasonan existente wordo elimina.
- Fortifica e departamentonan cu ta trata cu infraestructura y nan personal; ekipa e departamentonan pa por analisa y adapta e plan di teritorio espacial den cuadro di un desaroyo sostenible, cu enfasis riba transparencia y servicio eficiente y rapido na e cliente

DESARROYO REGIONAL DEN CADA DISTRICTO

- E plan regional (“vlekkenplan”) pa Oranjestad lo wordo ehecuta, hunto cu Aruba Ports Authority pa e desaroyo di Port City.
- E desaroyo aki ta inclui un desaroyo den Caya Betico Croes y Wilhelminastraat, di edificionan di gobierno. Entre otro e edificio di Niki Habibe y ex-edificio di Aduana lo wordo converti den vivienda, y ex-edificio di warda di Polis, den un boutique hotel.
- Gobierno lo otorga e terenonan aki na desaroyadornan local pa desaroya e proyectonan aki.
- E plan regional pa San Nicolas lo wordo ehecuta, y enfasis lo wordo poni na desaroyo den Seroe Colorado, cu desaroyo turistico sostenibel y desaroyo di maximo 80 camber di boutique hotels.
- E area di Seroe Colorado lo ta e punto di crecemento (“groeï pool”) di San Nicolas, y stimula desaroyo pa ciudadanonan y pa turistanan.
- Lo sigui inverti den Seroe Colorado su beachnan y e facilidadnan pa por crea un calidad di bida mas sostenibel.
- Lo inverti den infraestructura y renobacion di cayanan cu iluminacion.
- Lo otorga tereno pa construccion di casnan, convirtiendo e area decai den un centro revitalisa Caribense.
- Esaki ta cuadra cu Plan Sasaki San Nicolas y atrae mas Foreign Direct Investment.
- Lo desaroya plannan regional pa Savaneta/Pos Chiquito, Santa Cruz, Paradera, Noord/Tanki Leendert, teniendo na cuenta e identidad di e barío.
- E desaroyo lo inclui vivienda, infraestructura y desaroyo comercial segun e maneho economico.

MANEHO PA CU EDIFICIONAN DI GOBIERNO

- Edificionan cu ya no ta den uzo mas y no por ser uza mas tampoco, lo wordo bendi a traves di un maneho di propiedad (“vastgoedbeleid”).
- MEP lo continua cu e esfuersonan pa baha gasto di huur, manera acorda cu Hulanda den e ‘Landspakket’, y entre otro ta evalua pa construi edificionan propio di gobierno pa asina, riba termino largo, no mester depende riba huur di edificio pa departamentonan di gobierno y pues baha e gastonan di huur.
- Tur contract di huur of prolongacion di contract di huur lo pasa via un destaho na forma transparente.
- Lo prepara un plan di mantencion pa edificionan di Gobierno.

MANEHO DI CARETERA Y ILUMINACION DI BARIO

- MEP lo haci un estudio riba e estado di tur caretera na Aruba, cu pa hopi aña ta wardando riba asfalt of iluminacion, y a base di e estudio aki lo prepara un Masterplan con pa cumpli cu e necesidadnan di asfalt y iluminacion den cada barío.
- E plan di iluminacion di barionan lo wordo ehecuta segun e criterianan: (1) siguridad di trafico, (2) siguridad social y (3) teniendo cuenta cu medio ambiente, flora y fauna.
- Lo reintroduci e fondo di caretera cu un presupuesto tur aña pa mantencion di caminda asfalt den tur barío y pone y mantene iluminacion tur aña den diferente barío.
- Lo construi mas caminda pa por core bicicleta y pa hende por cana.
- Lo drecha e sistema di riolering den barionan na unda tin necesidad.
- Piernan den mal condicion lo wordo renoba y piernan nobo lo wordo construi.
- Stimula uzo di servicio di contratistanan local den otorgamento di obra di caretera y edificio, dunando preferencia na companianan estableci na Aruba. Lo introduci criterianan na cual contratistanan mester cumpli, pa garantisa calidad di e trabou.

MANEHO DI VIVIENDA Y HUUR

- Prioridad di MEP ta pa yuda cada ciudadano cu aplica pa un tereno of un cas, pa yega na nan propio cas of un cas di huur.
- Esaki lo bay den esfuerzo conhunto cu FCCA pa casnan di huur, di compra y casnan social.
- Pa loke ta otorgamento di tereno pa construccion di cas, lo maneha e poco terenonan cu tin disponibel na forma mas eficiente posibel, y lo brinda ciudadanonan cu ta en espera di un tereno otro opcionnan pa yega na nan vivienda propio.

TERENO PA PLANTACION, CRIA Y PESCA (“HUURGROND”)

- MEP lo desaroya un pilar economico nobo di agricultura, cria y pesca, y pa esaki lo agilisa maneho di otorgamento di tereno di huur pa plantacion, pa cria bestia, pa pesca, na costa y den lama.
- Lo elimina e atraso cu tin den otorgamento di terenonan huurgrond.
- Lo stimula, conhuntamente cu departamento di Asuntonan Economico, pa establece inversionistanan riba e tereno di agricultura, cria y pesca.

MEDIO AMBIENTE

Percura pa un medio ambiente sostenibel y adresa preocupacion di cambio di clima ta temanan delicado y compleho, pero necesario. Delicado y compleho pasobra semper mester pone nan den balansa cu desaroyo. Necesario, pasobra nos recursonan natural ta limita. MEP den e vision di nos metanan medio ambiental y sostenibilidad ta reconoce importancia di educacion, participacion civico, liderazgo gubernamental, maneho y ley solido. Pa e motibo aki e vision medio ambiental sostenibel ta delinea un cuadro di escogencia pa enfoca riba dje den e periodo di gobernacion 2021-2025.



- Introduccion di ley di prohibicion di uzo di productonan di plastic di un solo uzo y di styrofoam, manera saco di plastic, material di empake, cups, tayo, forki, etc.
- Prohibi uzo di e productonan ey den departamentonan di gobierno.
- A establece Parke Marino.
- A proteha area natural adicional.
- A salvaguardia e sitio cu biodiversidad halto na Isla de Oro.
- A reinstitui Commissie Flora en Fauna.
- A apunta cuater sitio nobo cu lo ta candidato pa nominacion di Ramsar.
- A crea pa prome biaha e plan nacional medio ambiental 'Onze Natuur en Ons Milieu'.
- A ubica e departamento Directie Natuur en Milieu den un edificio monumental restaura y sostenibel pa asina eherce nan tarea mas miho.

PROGRAMA MEDIO AMBIENTE SOSTENIBEL PA PERIODO DI GOBERNACION 2021-2025

EDUCACION Y CONSCIENTISACION

- Un revolucion medio ambiental duradero solamente ta posibel si cuminsa na e elemento esencial: comportacion humano. E elemento esencial aki ta educacion y conscientisacion.
- Ampliacion di curiculo na scol cu ta trata e tema di medio ambiente y incorpora den curiculo e topico di cambio di clima y e peligernan di esaki pa nos isla y incorpora uzo di flora y fauna local den les di biologia y stimula excursion pafo di klas of scol.
- Organisa programa educativo medio ambiental pa mucha y hoben den colaboracion cu NGO local.
- Cera un convenio cu medio di comunicacion pa incorpora un segmento yama 'Climate TV', un programa educativo riba television nacional.

MANEHO Y LEY

- Introduccion di e milieuverordering: Introduci e ordenansa specificamente di medio ambiente cu ta cubri tema amplio di proteccion, control y sancion. Asina hancra un maneho nacional y fiho di proteccion di nos medio ambiente den ley. E ordenansa aki tin varios aña den concep- to pero no a wordo implementa ainda.
- Finalisa e ley di ROPV: E trayecto di ROP ta uno largo unda cu finalisacion di e trayecto aki lo tuma luga den forma di ROPV. Cu e ROPV pa prome biaha den historia di pais Aruba lo hancra den ley e maneho specifico territorial.
- Ratifica e tratado di Escazu: E tratado di Escazu ta un tratado di Nacionnan Uni specialmente pa region Latino Americano y Caribense. E enfoke di e tratado aki ta pa sigura acceso na informacion medio ambiental, stimula participacion di ciudadano y sigura derecho medio ambiental. Esaki cu e meta pa mehora y reforsa den forma holistico y efectivo nos maneho medio ambiental riba nivel nacional.
- Stimula accesibilidad di productonan sostenibel: Un tarea importante di gobierno ta pa sti- mular acceso na uzo sostenibel cu ta contribui na proteccion y promocion di nos medio ambiente.
- Restructura maneho di tarifa di impuesto pa producto sostenibel, di tal forma cu e maneho aki lo ta transparente pa un y tur y accesibel riba portal gubernamental.
- Evalua incorporacion di productonan sostenibel den canasta basico y asina provee esnan di menos recurso cu e oportunidad pa contribui na nos metanan sostenibel, specialmente pa minimalisa uzo di producto di plastic pa un solo uzo.



GOBIERNO COMO EHEMPEL

Gobierno como lider riba tema di medio ambiente y sostenibilidad: Pa promove un era nobo di conscientisacion y comportacion sostenibel, ta esencial pa esnan cu ta na mando lidera y duna e bon ehempel. Un gobierno mester ta un refleho di e maneho cu e kier eherce. Pa logra esaki e siguiente pasonan lo wordo tuma pa contribui na proteccion di medio ambiente y promocion di sostenibilidad:

- Reduccion di uzo di papel den aparato gubernamental cu minimo 20%.
- Minimo 20% di dienstwagen di pais Aruba lo ta electrico.
- Minimo 20% di inventario di Bureau Interne Diensten lo ta consisti di material sostenibel.
- Proyectonan di infraestructura di gobierno lo inclui plantacion di vegetacion local.
- Tur contratista cu ta traha cu gobierno (DOW) den proyecto infraestructural lo mester wordo certifica pa nan conocimiento di flora y fauna local, y construccion sostenibel pa asina preveni destruccion di naturalesa door di proyectonan gubernamental.
- Institui dia nacional pa haci limpieza di 'beach' y 'mondi' riba dia di tera (Earth Day, 22 april).
- Crea plan di transicion pa reduci uzo y baha consumo di energia den aparato gubernamental.
- Restructura RWZI pa asina frena contaminacion di awa di desperdicio di RWZI den nos laman y contribui na salvaguardia nos coralnan.
- Alabes crea posibilidad pa e awa aki ta disponibel pa Santa Rosa.
- Incorpora den legislacion e requisito di rapportnan di MER den maneho di tereno comercial di pais Aruba.
- Haci cambio di clima un tema oficial riba agenda nacional, y pone esaki riba agenda di reino y asina urgi tur pais den reino pa formula un plan di accion colectivo.

UN PILAR ECONOMICO PA FUTURO

Turismo y recreacion sostenibel:

- Gobierno lo trata nos lama y playanan como e recurso mas valioso natural y turistico. Esaki ta resulta den frena construccion den awa y riba nos playanan, adapta practica sostenibel y no dañino ora cu ta traha riba mantencion y limpieza di nos playanan.
- Introduci certificacion local di hotel pa cu cumplimiento di normanan medio ambiental.
- Enfoca riba strategia pa incorpora area cu boei pa asina boto por hancra den forma responsabel, frena tiramento di anker y protehando nos coralnan.
- Enfoca mas intenso riba proteccion di nos turtuganan den awa y restriccion di uzo di luz durante 'nesting season'. Como tambe reforsa proteccion di neishi di turtuga riba beach, den estrecho colaboracion y guia di nos NGO'nan den sector di medio ambiente local.
- Gobierno lo pone prioridad na e estado di e coralnan rond di nos isla, mirando e importancia di e reefnan di coral pa e calidad di nos playanan, y lo restaura nan.

STIMULA INTERCAMBIO Y CONOCIMIENTO CIVICO

Promove establecimiento di area biosferico conforme e modelo di UNESCO:

- Promove establecimiento di area biosferico conforme e modelo di UNESCO:
- Area biosferico ta un sitio cu ta yuda paisnan analisa y compronde e interaccion entre ser humano y e medio ambiente.
- E areanan aki por ta area terrestre, marino y di costa.
- E areanan biosferico ta involvi e comunidad local den planificacion y maneho enfocando riba mantencion di biodiversidad y diversidad cultural, un maneho economico sostenibel for di perspectiva medio ambiental y socio cultural.
- E areanan aki lo wordo sosteni door di un programa di desaroyo scientifico y educacion.
- E meta principal ta pa formula maneho medio ambiental y socio cultural a base di experiencia practico.
- Organisa Aruba su prome Klimaattafel. Na aña 2022 lo organisa Aruba su prome Mesa di Clima ("Klimaattafel") local cu meta specifico pa organisa e 2 bes pa aña:
- Invita NGO's activo den sector medio ambiente y partnernan den sector priva pa presenta nan vision riba tereno di cambio di clima, proteccion di medio ambiente y sostenibilidad cu meta pa defini e asina yama 'Nationally Determined Contributions' (NDC'S) pa Aruba. NDC'S ta un elemento central di e Acuerdo di Paris (Parijs akkoord).
- Institui un Consul di Clima consistiendo di partners di NGO's, sector priva y movimiento civico cu lo ta un di e organonan di consulta pa gobierno di Aruba.



MANEHO DI DESPERDICIO Y DUMP

Gobierno tin e deber di haci areanan residencial habitabel (“bewoonbaar”) pa su ciudadanonan, y pa proteha e ambiente den cual nan ta biba. Den esaki Aruba su gobiernonan den e ultimo 35 añanan, a faya. Den un siguiente gobierno, MEP lo haci su mes fuerte pa e cartera aki.

Aruba mester cu urgencia un maneho sostenibel y realistico pa loke ta maneho di desperdicio y dump. E problema mas grandi ta e gran cantidad di desperdicio, specialmente plastic. Riba un isla manera Aruba, cu capacidad y espacio limita, e desperdicio ta impacta tambe nos naturalesa. E sero grandi y creciente di dump, ta un di e problemanan mas serio den nos pais.

E problema di dump ta un problema serio pa e bario y su habitantenan, y ta causa enormemente hopi molester pa e bario. E ta causa molester tambe na aeropuerto. Por ultimo e situacion actual di dump ta un menasa pa e hende y nos medio ambiente den e area.

GOBIERNO TIN E DEBER DI HACI AREANAN RESIDENCIAL


- Gobierno lo stimula ciudadanonan pa reduci desperdicio mas tanto posibel, tanto residencial como comercial.
- Lo inicia pa regula material cu ta produci hopi desperdicio, manera plastic.
- Na Aruba plastic di un solo uzo ya ta prohibi.
- Den e periodo di gobernacion nos dilanti, lo enfoca riba cambionan den e legislacion di produccion di plastic, pa facilita ehecion di e prohibicion.
- Tambe lo enfoca riba recompensa esfuersonan di ciudadanonan pa produci menos desperdicio.
- Importante ta pa separa e desperdicio mas trempan posibel den e proceso, por ehempel glas y material di construccion.
- Lo enfoca tambe riba reusa desperdicio, y pa recicla materialnan cu ta reciclabel.

RECOGEMENTO DI DESPERDICIO Y HIBA NA LUGA DI PROCESAMENTO

- E servicio di recogemento di sushi actualmente ta den man di Serlimar, y algun compania priva.
- E servicio aki lo wordo mehora pa evita cu desperdicio ta plama riba tera of den lama.
- Aki lo enfoca riba recicla desperdicio den productonan cu balor comercial.
- Desperdicio cu keda atras despues di reciclahe, lo wordo procesa.

PROCESA DESPERDICIO

- E solucion cu MEP ta wak ta cu na entrada e desperdicio lo wordo separa.
- E parti cu por wordo recicla, ta wordo recicla.
- E parti cu no por wordo recicla lo wordo kima den un incinerator cu ta cumpli cu standardnan di medio ambiente sostenibel, cu tin filter pa evita cu gasnan dañino por scapa y bay den aire.
- Lo recobra energia di desperdicio y residuonan lo bay dump den un landfill adecua cu ta cumpli cu standardnan di medio ambiente sostenibel
- Asina ta pone menos presion riba e espacio schaars cu nos tin na Aruba.
- Material peligroso, y asbest lo bay den un sanitary landfill, cu tambe ta cumpli cu tur exigencia.
- Lo sana e dump na Parkietenbos.
- Lo sana e landfill na Sero Tiji.
- 'Waste water' lo wordo sana na RWZI Bubali, den awa di calidad pa agricultura.



ATENCION NA E PROBLEMANAN INMEDIATIO

- Percura pa paga e candela riba dump cu santo.
- Introduci cu urgencia un ley di medio ambiente y desperdicio.
- Sanea y profesionalisa e compania estatal Serlimar, y sak'e for di e 'surseance van betaling'.

RUMAN TA KEDA RUMAN

11



ASUNTONAN DI REINO

“MEP ta kere den Aruba como parti di Reino y den un bon relacion den Reino, cu respet pa nos Status Autonomo y e boluntad mutuo pa coopera cu otro. Alabes nos kier mira un Aruba cu tin tur posibilidad pa desaroya economicamente y financieramente, a base di su propio esfuersonan den relacionnan internacional. E relacion aki ta basa ariba 3 principio:

1. Un relacion a base di respet mutuo, principalmente respetando nos autonomia.
2. Un relacion a base di madurez y confiansa unda ta reina igualdad y ekidad entre partnernan den Reino. Caminda no ta existi un deficit democratico.
3. Un relacion na unda cu nos por traha cu demas partnernan den Reino a base di cooperacion mutuo, caminda cu ta posibel pa encamina proyectonan hunto y pa un yuda otro. Sostene otro y coopera cu otro tur caminda cu ta posibel den relacionnan internacional.

• PROGRAMA REINO PA PERIODO DI GOBERNACION 2021-2025



MANTENE UN BON RELACION DEN REINO

Desde 1986 cu pais Aruba a logra su Status Aparte y despues na 1996 a anula e fecha di independencia for di e Statuut di Reino,

- E pueblo di Aruba den su mayoria ta na fabor pa Aruba keda forma parti di Reino Hulandes.
- E relacion y aprecio di nos pueblo pa cu e Famia (di Cas) Real, e pueblonan di Hulanda, Corsou, Sint Maarten y islanan BES lo keda e vinculo pa nos sigui traha cu otro den Reino Hulandes.
- Den e ultimo añanan, pero sigur e delaster cuater añanan MEP a sa di surpasa e distanciamiento cu por tabata existi entre e partido y cierto politiconan Hulandes.
- E brugnan cu a wordo construi a convence Hulanda cu MEP ta un partner serio den Reino y cu mester tene cuenta cu ne.
- MEP den historia politico di nos pais a hunga un rol grandi den realisa y construi pais Aruba autonomo den Reino Hulandes.
- MEP ta kere den un bon relacion den Reino, basa riba madurez y respet mutuo.

LUCHA PA IGUALDAD Y EKIDAD ENTRE PARTNERNAN DEN REINO

- MEP a experencia desde e inicio di su Gobierno na 2017 un crisis financiero, economico y social, e crisis na e pais bisifia Venezuela y por ultimo e crisis di COVID-19.
- MEP a demostra tanto den Gobierno como den Parlamento madurez politico, capacidad, responsabilidad y seriedad den su decisionnan y maneho pa soluciona e problemanan grandi cu e crisisnan menciona a ocasiona.
- MEP ta boga pa tin tranquilidad, siguridad, estabilidad, confiansa, cooperacion y respet den Reino Hulandes entre e partnernan den Reino.
- Den e cuater añanan cu ta bin MEP tin como meta pa soluciona e crisis constitucional cu ta existi den Reino.
- Concretisa e Geschillenregeling manera a wordo stipula den e cambio di Statuut na 2010.
- Restablece e posicion constitucional di Aruba den Reino, yega na acuerdonan bilateral cu Hulanda riba tereno financiero, economico y social preservando Aruba su autonomia.
- Tambe ta hopi importante pa organisa un conferencia di mesa rondo (RTC) unda partidonan como partnernan igual por yega na acuerdonan na bienestar di e paisnan den Reino p'asina trece e confiansa, cooperacion, respet y harmonia den Reino.
- Hopi importante ta pa pone enfasis riba e obligacion cu cada pais den Reino tin conforme Statuut pa percura pa un bon gobernacion, siguridad huridico y salvaguardia e derechonan y libertadnan fundamental di tur ciudadano.
- E crisis di COVID-19 a afecta Aruba fuertemente siendo un pais chikito. Aruba a haya un ayuda di Hulanda pero cu exigencianan desproporcional. MEP lo keda na mesa y convence Hulanda cu argumento y yega na exigencianan rasonabel.
- MEP lo haci loke ta posibel pa reestablece e balansa entre e exigencianan Hulandes y e posibilidadnan y alcance real di Aruba pa por cumpli.
- Decisionnan riba legislacion di Reino actualmente ta den man di representantenan di pueblo cu ta exclusivamente scogi pa ciudadanonan di Hulanda. Pero e leyman ta aplicabel pa ful Reino. Esaki sigur mester cambia. Un cantidad selectivo di delegadonan di Aruba, Curaçao y Sint Maarten tambe lo mester haya derecho di voto ora ta concerni asuntonan cu ta regarda y di importancia pa e islanan.

OPTIMALISA COOPERACION CU OTRO

- Respet ta encera tambe cu ta tene cuenta cu e realidad di nos limitenan y nos posicion geografico, e importancia y situacion geopolitico di nos region.
- Finalmente respet kiermen tambe pa brinda espacio pa nos pais por emancipa, crece y sigui desaroya.
- Traha mas cu e otro islanan riba tereno di husticia, aviacion civil, transporte maritimo, cuidado medico, enseñansa, servicio di inmigracion y aduana, agricultura, cria y pesca.
- Hulanda ta consciente cu mester mehora e conexion entre educacion y e mercado laboral, tanto na Hulanda mes como den e otro paisnan di Reino.
- MEP lo colabora cu Hulanda pa, por ehempel, cursonan di LBO, MBO (y posiblemente titulo asocia den cierto areanan manera agricultura, pesca, biodiversidad, sector di servicio, energia sostenibel y IT) ta disponibel pa e hobennan di Aruba por mehora nan oportunidadnan riba e mercado laboral.
- Tambe ta ora pa pone atencion special na conocimiento y habilidadnan digital. Inverti den calidad di educacion ta fundamental pa un bon desaroyo di e hubentud Arubano.
- Mirando cu finanzas publico di Aruba ta bou presion grandi, MEP lo busca posibilidad di educacion faborabel den Reino pa salvaguardia e conexion entre educacion superior y academico.
- Den e ramo cultural Hulanda tin intencion pa crea un fondo pa patrimonio cultural y un plan di incentivo pa colaboracion y e innovacion creativo entre e artistanan y e industria creativo. MEP lo busca cooperacion pa logra beneficio pa nos artistanan y e mundo creativo local.



RELACIONAN INTERNACIONAL

- Aruba, mescos cu e demas paisnan autonomo den Reino, lo beneficia di un posicion mas solido den e area economico internacional. Formando parti di Reino, Aruba mester hunga un rol mas activo den diplomacia y politica comercial.
- Aunke ta existi un limitacion den capital humano den e campo di diplomacia, derecho internacional y economia, Aruba tin e potencial pa tin un cuerpo (quasi) diplomatico chikito den un periodo corto. Dicho grupo posiblemente lo por tin un papel mas activo den e necesidad di Aruba na e embahadanan cu ta importante y interesante pa nos den e ramo di inversion y desaroyo (por ehempel Colombia, Panama, Republica Dominicana y Canada).
- Den cooperacion cu nos partnernan den Reino nos mester trata na yega na un maneho y acercamento comun den relacion cu nos paisnan bisifa manera Colombia y Venezuela.
- Nos mester cuminsa participa atrobe na encuentronan regional riba tereno di salud publico, agricultura, cria y pesca, labor, energia, turismo, deporte, educacion, transporte maritimo y aviacion pa a base di esfuerso mutuo, por yega na progreso y bienestar di nos pueblo di Aruba.
- MEP lo coopera pa establece un grupo di trabou entre e islanan Hulandes riba e topiconan di politica di migracion y asilo.
- Den e cuadro aki MEP lo sigui activamente busca apoyo den Reino pa mantene su posicion economico den e region y promove estabilidad na Aruba.
- E poblacion di Aruba no mag bira victima di e crisis na Venezuela of otro desaroyonan geopolitico dentro di region.
- MEP haciendo uzo di Aruba su posicion den EU (OCTA) lo busca fondonan Europeo.
- Lo profila Aruba riba foronan regional y internacional pa beneficio di Aruba (por ehempel SIDS-Small Islands Development States, UNDP).



ATENCIÓN PA NOS LOGRONAN ESTATAL DEN PASADO

Lo pone atención special pa nos logronan estatal di pasado. Ta importante siña for di nos pasado. Pa e motibo aki tanto Gobierno como Parlamento lo mester pone atención special na entre otro fecha di aniversario di:



- **Na 2022:** 45 aña Referendum di independencia, 25 di maart di 1977;
- **Na 2023:** 40 aña di Conferencia di Mesa Rondo (RTC), 12 di maart di 1983;
- **Na 2023:** 160 aña di abolicion di sclavitud, 1 di juli di 1863;
- **Na 2024:** 30 aña di expiracion di articulo 62 di Statuut, 10 di januari di 1994;
- **Na 2024:** 70 aniversario di Statuut di Reino, 15 di december di 1954.
- Lo establece un Centro di conocimiento estatal pa promove den comunidad elementonan basico di estado di derecho.
- Pa medio di e iniciativa aki lo sigura tanto un conscientisacion publico riba e tema aki na Aruba como tambe un creacion di consciencia politico den Reino cu Aruba ta trata e tema di autonomia y derechonan fundamental na un manera serio.

Cruise Terminal



Surfside Beach 2km

Hotel Area



Shopping & Dining

SI BO NO CUIDE
AWE, MAÑAN BO
NO TIN PA YUDA
BO MES

12



SI BO NO CUIDE AWE, MAÑAN BO NO TIN PA YUDA BO MES



FINANSAS PUBLICO


Partido MEP ta para pa un maneho financiero sostenibel riba termino largo. Finanzas publico saludabel ta e garantia pa desaroyo sano y logra un pais resiliente cu por enfrenta shocknan fuerte den futuro. Maneho di sostenibilidad di debe lo ta e punto di enfoke pa e añanan nos dilanti.

Partido MEP ta haci su mes fuerte cu reduccion di debe mester keda e punto di salida di un gobierno siguiente. Creacion di surplus ta e unico forma realistico a termino mediano pa reduci e debe. E mito cu solamente crecemento economico lo saca Aruba di debe mester pasa pa pasado. E situacion di debe di pais Aruba ta di tal indole cu Aruba su so no por a enfrenta un pandemia di e magnitud aki.

Na momento cu a tuma gobierno na 2017 Gabinete Wever-Croes a enfrenta un deterioro den finanzas publico. Den 8 aña di gobernacion prome cu 2017 a redobla e debe di pais Aruba y a fia mas cu 2 biyon florin. E suma aki ta mas halto cu locual pais Aruba a fia desde su Status Aparte y mas placa tambe cu Aruba mester a fia durante e pandemia mas fuerte cu mundo a conoce. E debe aki no a empuha crecemento economico cu lo por a hustifica e fianza di placa aki. Resultado ta cu a hinca pais Aruba den un debe sin precedente. Consecuentemente Hulanda a scoge pa interveni y impone un supervision financiero na 2015 pa evita cu e Gobierno anterior continua y hiba e pais den un ruina total. Esaki a kita e autonomia financiero di pais Aruba y a somete Aruba na un supervision financiero pa medio di CAft.

• LOGRONAN GABINETE WEVER-CROES 2017-2021

- Gabinete Wever-Croes a cambia e rumbo financiero negativo pa uno sostenibel riba termino largo.
- A scoge pa den un forma structural traha pa realisa un surplus riba presupuesto p'asina cuminsa reduci e debe di pais Aruba.
- Un memorandum financiero-economico cual a forma e base pa yega na palabracionnan nobo cu Hulanda.
- Acuerdo financiero nobo cu Hulanda na november 2018 a base di normanan realistico.
- Presupuestonan realistico cu a muestra e caminda pa reduccion di debe.
- Realisacion di finansas den cuadro di normanan financiero palabra cu Hulanda.
- Rapport positivo di Fondo Monetario Internacional na 2021.
- Mantencion di investment grade door di Standard and Poor's.
- Mehoracion dentro di un aña di investment grade di FITCH.
- Presupuesto presenta den un forma cu Parlamento y Gobierno di Aruba lo por hiba maneho y control mas eficiente.
- Den 2019 Aruba a realisa un surplus door di e maneho consistente di e Gabinete Wever-Croes despues di a premia un deficit.
- A presenta un surplus di 46 miyon den presupuesto 2020 pre-Covid-19.





• COVID-19 ESCOGENCIA CONSCIENTE GABINETE WEVER CROES 2017-2021

Covid-19 a para tur e desaroyo positivo cu Aruba a inicia riba e tereno di finanzas publico. Debi cu Aruba ta un pais dependiente di turismo Aruba a conoce e recesion mas fuerte den su historia. Esaki a haci cu e escogencia pa adapta hopi lihe di maneho mester a tuma luga. E enfasis na e momento ey tabata pa laga e maneho cu ta dirigi riba reduccion di debe y scoge pa un maneho nacional pa garantiza cu e famianan na Aruba sobrevivi e pandemia. E maneho aki a percura pa esnan cu a perde entrada mester a ser yuda pa keda cu algo di entrada pa por sobrevivi.

AYUDO DIRECTO

- Subsidio di salario (60% salario).
- FASE (950 florin pa luna) pa esnan cu a perde trabou of un entrada.
- Ayudo na empresanan chikito y mediano (4000 florin pa kwartaal).
- Salvaguardia e fondonan di AZV y SVB pa por garantiza gastonan den salubridad publico y pensioen di nos grandinan.
- **Tambe a scoge pa duna diferente pakete como Alivio Fiscal I y II pa yuda empresanan y personanan di Aruba durante e pandemia y pa surpasa esaki mas miho posibel.**

ALIVIO FISCAL I

- Prolongacion di e termino legal di pago di e impuestonan mensual.
- A absolve e dunado di trabou di su deber pa paga e contribucion di AOV/AWW di luna di april, mei y juni 2020.
- Prolongacion di e termino legal pa entrega declaracion y pa haci pago di winstbelasting 2019 cu excepcion di e institutonan financiero.
- Riba acuerdo di pago vigente ta pospone e pago cu 3 luna.
- No lo cobra boet pa incumplimento, ora cu no a paga e debe di impuesto.
- Ta suspende interes riba debe pendiente.
- Areglo di pago flexibel.
- Maneho pa sanea debe (di impuesto) ora cu paga e suma den un solo biaha.
- Suavisa maneho encuanto reduccion di tarifa riba pago di dividendo.
- Stipulacion pa cu repentimento.
- Aplasa e proceso di cobramento cu forsa di ley.
- Maneho pa cu control di buki.
- Mehoracion di servicio pa medio di declaracion online.
- Comunicacion transparente.

ALIVIO FISCAL II

- Pa comerciante chikito cu un venta te cu 84 mil florin pa aña ta liber di paga BBO, BAZV y BAVP desde aña 2021 (KOR).
- Pa compania den sector prometedor un deducccion di 50% di prestamo te cu 30 mil florin pa aña 2020, 2021 y 2022.
- Deducccion di 300% di gasto di formacion profesional pa aña 2020, 2021 y 2022.
- Deducccion di 200% di gasto y promocion y mercadeo te cu maximo di 30 mil florin pa aña 2020, 2021 y 2022.
- Compensacion di perdida fiscal di aña 2020, 2021 y 2022 te cu 7 aña.
- Maneho suavisa di tarifa di 10% di dividendo pa accionista biba na Aruba.
- Maneho mas amplio di e regulacion di fondo di "spaar en voorzieningsfonds" pa aña 2020 y 2021.
- "Investeringsaftrek" a ser subi pa 10% y ta conta tambe pa producto di inversion cumpra den exterior.
- Anulacion di impuesto riba auto y motorcycle di huur entrante e di cuater kwartaal di aña 2020.
- Areglo di pago flexibel pa empresa, particulier y cuidadano 60+.
- Por sanea debe di impuesto den un solo pago cu un descuento di 30% te juni 2021.
- Reduccion di tarifa di invoerrechten riba material di construccion.

Resultado di a scoge pa e ser humano central den e pandemia aki manera tabata e palabracion den programa di gobernacion 2017-2021 a haci cu e debe di pais Aruba a subi contra tur expectativa contrario na e ruta prome cu e Covid-19. Pero esaki tabata un escogencia consciente di gobierno pa pais Aruba no kibra y muestra asina cu su hendenan ta esnan mas importante bou di cualkier circunstancia

• PROGRAMA FINANZAS PUBLICO PA PERIODO 2021-2025

- E normanan estableci pre-Covid-19 ya no ta cumpli cu e situacion despues di e pandemia. Den e deliberacionnan cu Hulanda esaki lo ta e punto di salida.
- Aruba ainda no a sali di e pandemia aki. Esaki ta haci cu mester keda evalua durante tempo y adapta maneho na un forma coherente na e cambionan cu Covid-19 ta trece riba mesa.
- A base di e resultado di e pandemia partido MEP ta di opinion cu mester yega na normanan financiero realistico pa por yega bek na reduccion di debe riba termino largo. Instancianan internacional a muestra caba nan disponibilidad pa yuda den esaki.
- MEP ta distancia su mes di focus solamente riba crecimiento economico como unico factor pa reduci debe.
- Aruba mester realisa surplusnan financiero cual den combinacion cu crecimiento economico lo baha e debe riba termino largo.
- Den cuadro di e palabracionnan cu Hulanda a inicia proyectonan specifico pa enforsa finanzas publico y e sector financiero di pais Aruba, e siguiente proyectonan lo continua den e proximo gobernacion.
- Lo fortifica e kolom financiero integralmente.
- Lo fortifica e control di gasto financiero tanto central como na tur e departamentonan di gobierno.
- Auditoria lo haya mas atencion.
- Analisa e posicion di Raad van Advies y Algemene Rekenkamer.
- Analisa con informacion estadistica lo hunga un rol mas eficiente pa substancia maneho.
- Maneho di subsidio lo ser studia den profundo pa esaki ta mas eficiente y eficaz.
- Maneho di compra di gobierno lo ser somete na un estudio pa por realisa compranan mas efectivo y na un mihor prijs pa gobierno.
- Sistema di impuesto lo ser someti na estudio pa por realisa un sistema mas husto pa pais Aruba. En principio lo ta ampliacion di e base pa cobra y lo move di impuesto directo pa impuesto indirecto.
- Lo amplia e base di informacion di departamento di impuesto cu informacionnan bancario.
- Programanan pa un miho compliance lo wordo introduci.
- Lo yega na un areglo di belasting nobo entre Aruba y Hulanda.
- Un estudio lo ser haci riba e sector financiero na Aruba pa wak si ta cumpli cu tur e rekisitonan internacional.
- Un estudio riba supervision financiero tambe lo ser efectua cu miras ariba mehoracion di e supervision.
- Lo introduci ley pa garantisa depositonan na banconan local.

Cu bista riba futuro MEP lo sa di tuma e decisionnan corecto y concreto pa garantisa futuro generacionnan un pais caminda nan por tin miho oportunidad di desaroyo basa riba nan propio ideanan.

DUNA CESAR LOKE TA DI CESAR

- Tin un diferencia grandi den maneho di finanzas publico entre MEP y gobernacion cu MEP no a forma parti di dje.
 - MEP semper a percura pa hiba un maneho responsabel den finanzas publico.
 - A mantene deficitnan financiero na un nivel responsabel.
 - Deficit a ser distortiona debi na crisisnan. Na 2008 crisis financiero mundial y na 2020 debi na Covid-19.
 - Awe cu cifra por muestra cu contrario na MEP oponentenan politico den tempo bon ta scoge pa endeuda Aruba.
 - MEP lo continua cu un maneho responsabel den e añanan nos dilanti.
 - E meta di MEP semper ta pa reduci deficit nan financiero mas hopi posibel creando surplus pa por paga e debenan aki bek.
 - Manera muestra den e grafico akibou esaki ta e meta cu lo maneha pais Aruba den e añanan nos dilanti.
- Lo trata di jega mas lihe posibel atrobe na un surplus financiero.**





**EVELYNA C.
WEVER-CROES**

LISTA DI CANDIDATO

MOVIMIENTO ELECTORAL DI PUEBLO

ELECCION 2021



CU UN SOLO META: **ARUBA!**



**XIOMARA J.
RUIZ-MADURO**



**DANGUILLAUME P.
ODUBER**



**GLENBERT F.
CROES**



**ROCCO G.C.
TJON**



**ARTHUR
VALLEJO**



**HENDRIK W.G.
TEVREDEN**



**ENDY J.H.
CROES**



**EDGARD G.A.
VROLIJK**



**ALVIN
MOLINA**



**SHAILINY M.
TROMP LEE**



**GUILLFRED F.
BESARIL**



**JUAN E.
THIJSEN**



**LOUISETTE J.
CHRISTIAANS-
YARZAGARAY**



**DARLAINE B.
GUEDEZ-
ERASMUS**



**SUEANN S.J.
RAS**



**MARCO
BERLIS**



**RICKY
HOEK**



**JOE G.
KOOLMAN**



**JAIME
WINTERDAL**



**RUDY R.
RICHARDSON**



**EDMOND L.
PARIS**



**REINWALD R.
RODERICH LOPEZ**



**GERRIT
CROES**



**STEPHANIE M.
CROES**



**SHANNON
HENRIQUEZ**



**MICHELLA
LACLE**



**ERICH
GENSER**



**RODYMAR
GERMAN**



CU BO
ARUBA
TA AVANSA